



الكتاب الأول

# بائع الأقنعة و كذب الجاميز

صلاح الوسيلى

المجلس الأعلى للثقافة

٢٢٢



Bibliotheca Alexandrina



0016456



١- بائع الأقنعة

٢- كارب الجماميز

مسرحتان

صلاح الوسىمى





## لجنة الكتاب الأول

مدير التحرير / منتصر القفاش

شاكر عبد الحميد ( مقرر )

حسين حمودة

حلمى سالم

خيرى شلبى

سمية رمضان

عبد العال الحمامصى

محمد كشيك

مجدى توفيق

يسرى حسان

إشراف فنى / هشام نوار

التصميم الأساسى للغلاف محى الدين اللباد ، أحمد اللباد

لوحة الغلاف للفنان / فاروق بسيونى



١ - بائع الأقنعة



## الجزء الأول

لا وجود لخشبة المسرح التقليدية كراسى الجمهور موزعة بشكل يساعد على الرؤية ، والإحساس بالتواجد داخل عربة غريبة - غير تقليدية - أمام كرسى السائق توجد لوحة صغيرة مكتوب عليها « النزهة » الزجاج الأمامى للعربة يمكن أن يحل محله شاشة عرض سلويت .. يدخل الجمهور ليجلس فى الإضاءة العادية. تترك أماكن محددة للممثلين الذين يدخلون فى ملابس عادية مختلفة ويجلسون فى أماكنهم بجانب الجمهور . يسمح لهم بالحركة .

- يدخل السائق بعد جلوس الركاب جميعاً ليغلق الباب ويبدأ فى جمع النقود من الركاب وتوزيع التذاكر ويتجه للتحرك بالسيارة يفاجأ بشاب وفتاة يواجهان السيارة ويحاولان القفز لداخلها

وهما يحملان طاولات مبيعات مختلفة وحقائب مليئة  
بالبضائع .

- يتوقف بعنف منزعجا ويصرخ فى البائع والبائعة  
لكنهما يدخلان بسرعة داخل السيارة ويصيحان فى  
مواجهة السائق والركاب معا .

البائع :

يلا ندخل بسرعة .

البائعة :

المهم أنه مقدرش يفلت مننا .

السائق :

هو إيه اللى مقدرش يفلت .. خلصونا انتى وهو .

البائع :

ماشى يا حلاوة .. زباين غسل .

السائق :

غسل بصل .. خف تعوم .. توكلنا .

البائعة :

يلا يا خفيف وخليك خفيف .

البائع :

ويدينا بالصلاة والاستفتاح والرزق على الفتاح وزودناه

كمان صلا . واللى ميصليش يجيله الأوا .. واللى

ماينفعناش تجيله مصيبه محبكه وملبكه مايقومش

منها إلا والدنيا على دماغه متدريكة .. قولوا أمين .

البائعة :

( تلاحقه ) ومعانا أحلى حاجات ومحتاجات ويابخت

اللى اشترى وقال هات . النفطلين بليه . والمستكه

والحبهان والكراسات .. وجلد الحنفيات . والأمشاط

والفلايات والشربة والمغات للنفسه والولده وكل

الحاجات والمحتاجات .

البائع :

والشيكولاتة . والغوايش . والحلقان والبازارات

والخردوات ومعروضات السوير ماركات .

- البائعة : وأدوات المكياج والبواريك وكافة أنواع الأكسسوارات  
وطرح المحجبات ..
- البائع : والشيكو بيكو .. الشيكولاتة اللذيذة يابهوات . ويا  
أفندية ياهوانم وياستات هه . مين نده وقال هات ..  
أيوه أيوه يلا قول قول هات وحسهل باقى الحسابات .
- البائعة : ياسلام سلم بضاعتنا بتتكلم ..
- البائع : عشان الحبايب الأربعة بجنيه .
- البائعة : يامجلى للقلب ياسكر نبات . يامجلى صوت البنات  
وموفر الحسابات .
- البائع : ياعينى . ياعينى ع الأوكازيون وعلى كل الأصناف  
والحكايات . مين رد ، وقال هات . من غير خناقات .
- البائعة : طيب زدونا هم الستة بجنيه .
- البائع : تقف علينا بالخسارة ياوليه ..
- البائعة : وعشان الباشا بقم التمانية بجنيه .
- البائع : إيه ؟ الهانم قالت العشرة بجنيه وعشان عيونك  
الاتناشر بجنيه . يعنى الثلاثة ..
- البائعة : بربع جنيه
- البائع : الثلاثة ..
- البائعة : بربع جنيه ( تصفق ) ..
- البائع : يلا شيل بسرعة . والفرصة معاك .
- البائعة : ألحق وشيل .
- البائع : التاجر محبوس وعاوز فلوس . وقلنا نبيع بخسارة .

- البائعة : ماشى هه . ثلاثة للهانم  
 البائع : وخمسة للبيه .. أيوه جاى ..  
 البائعة : والأستاذ بسرعة عاوز دسطة . يلا شيل .  
 البائع : ويابخت من أخذ واشترى فى البراح .. وفى الآخر  
 حايبقى مرتاح .  
 البائعة : اشتروا . اشتروا . انتولسه فى الأمان .  
 البائع : وادى الزياين ولا بلاش . وأنا مش واد بكاش .  
 وحوش يا حواش . مالكم ساكتين ليه ؟ .  
 البائع : لقمه بالحلال . ولا مدة الإيد بالسؤال . ( بانفعال ) .  
 البائعة : أصبر عليهم شوية .. ونديهم فرصة تانية .  
 البائع : ماشى . طب آخر كلام ولما نشوف . أقولكم شيلوا  
 بلاش ..  
 البائعة : الراجل اتجنن ..  
 المحامى : دى بضاعة أهلكاش .  
 البائع : أنت بكاش . اكسر ودوق .  
 البائعة : أنت خوشنى . وشو يش يازياين ودوقوا بلاش وجربوا .  
 الممرضة : ( منزعجة ) الله . إيه ده .. مش عاوزين . أف .  
 إيه ده .  
 البائعة : خلاص ياختى محدش غصبك .  
 الشاب : شغل تسول وصياعة  
 المحامى : مظبوط والمتسولين المفروض يمسكوهم  
 البائع : بقى بنقولكم بالذوق . تقوموا تشتمونا .. وتسول



- وصباغة . ومظبوط .
- المحامي : مظبوط .
- البائعة : وعمالين ندلعمكم . ياهوانم . وبابهوات .
- البائع : وبأريتهم حصلوا حاجه . أصل الباشاوات بتركبوا  
 زلكات . والبهوات بتركبوا عربيات وانتو بتوع  
 الأتوبيسات .
- السائق : جرى إيه يا اخوانا . انتو طالعين تببيعوا ولا تبكتوا  
 الزباين .. خلصونا .
- البائع : جرى إيه يا حلالة .. كله بشوايه .. وانت .
- السائق : أنا إيه .. غير اللون وخف نفسك .
- البائعة : عندك حق .. ماشى .
- البائع : وماله .. أمرك ياسيد الناس .
- الحساب : الكلام كتير وكله فى الهوا .
- المحامي : مش مظبوط .. الكلام له قانون وأصول
- البائع : كله كلام فى كلام .. أهو كلام ..
- البائعة : هو أنت منهم .. ده كلام فى الهوا . ماتيجى نشغله  
 معانا ..
- البائع : لسه بدرى . يشتري الأول .
- البائعة : ميت فل وعشره .. الشرا الأول .
- الشاب : اشتري . ( يضحك ) .
- المرضة : إيه ده .. ضحككتك غريبة مالهاش معنى ..
- الشاب : الكلام ده غلط .

- المرضة : أيوه .. خلاص غلط ( فى تراجع ) .
- المحامى : مضبوط .. وإيه اللى صح .
- البائع : أنكم تشتروا بقى وتخلصونا .. أحسن لكم ياساتر
- ش ١ : هو البيع ده أصله إيه ؟ .
- ش ٢ : والشرا كان برضه ليه ؟ .
- طالبة : أيوه بنشتري المذكرات والكتب فى الجامعة .. وبرضه بنشتري الماكياج .
- الشاب : والشرا غلط .. والبيع غلط . ما أنا اشتريت طلع غلط أكبر غلط .
- البائعة : باين عليك لا أنت شارى ولا أنت بايع . ومقشفر وحالك عدم ..
- الشاب : وخدوها من غير بيع ولا شرا . ويرضك غلط
- المحامى : مضبوط .
- السائق : هو أنت منهم وإلا إيه . عمال صح وغلط . وخدوها وما خدوهاش . ماتقول كلام صح .
- المحامى : مضبوط .. أكيد السكة غلط .
- السائق : السكة دى اختصاصى ومحدث له دخل بيها خليكم أنتم فى نفسكم ..
- البائع : والسكة مفتوحة للبيع والشرا .. يللا اشتروا .
- البائعة : استفيدوا بالوقت
- الشاب : ضاع هدر راح فطيس
- البائع : اشتري بقى . سيبك من الكلام الفارغ ده ما هو

محسوب عليك ..

- المرضة : إيه ده .. هو ماله زى الحقنة ليه ؟ .  
الطالبة : حاجة غريبة . أنا مش فاهمة حاجة .  
المحامي : مضبوط .. ده بيع بالإكراه . القانون يمنع .  
الشاب : قانون .. ماهو ضاع . وبالقانون  
السائق : الواد ده شكله مش طبيعي .  
المحامي : مضبوط .  
الشاب : أنت منهم أو على الأقل زيهم ..  
المحامي : مضبوط .. أنت مش طبيعي .. وأنت زيهم ..  
المرضة : هو إيه ياختى ده .. معاهم معاهم .. عليهم عليهم  
( للشاب ) ومين ياخويا اللي أخده منك ..  
السائق : ويعدين فيكم وفي يومكم اللي مش قايت ده  
المحامي : ماهر أنت ..  
السائق : أنا أيه .. أنا شايلكم وماشى بيكم وبهمكم وغمكم  
من ساعة ماركبتكم . ومفيش فايذة .  
الشاب : أنا ماقلتش حاجة على حد . أنت اللي  
المحامي : ( مقاطعا ) أنت القانون معاك .. يس مش فاهم خد  
٣٢ شارع شبرا . كارت للبيه . كارت للهامم ..  
البائع : ما أنتم مختلفين مع بعض أهه .. آمال متفقين علينا  
ليه أفهمم .. أشتروا  
الشاب : المهم أن كل حاجة إتأخذت وأتوضعت . وبالقانون برضه  
الطالبة : أن باتعلم أعزف على القانون لأنه حلو .

- المحامي : ما تجييش الغلط فى القانون ..
- البائعة : انهو قانون ..
- المرضة : ليه مش بتداوى أمورك وتربط شغلك ..
- البائع : ما هو لازم تشتروا مفيش وقت .
- الشاب : الوقت ضاع .
- البائع : اشترى . ما هو البنى آدم واحد من اتنين يابيبع يا بيشتري . وأنا يابيع . يبقى لازم تشتري
- البائعة : ( تصفق ) حلاوتك يامتور .
- البائع : شفتى يابت ..
- المحامي : مضبوط .. الدنيا بيع وشرا .. كارت . كارت .
- البائع : الحق نفسك واشترى .
- البائعة : اشترى انفسكم . شقولكم سكة . اشترى أنت
- ش ١ : هى إيه الحكاية .. هو بيع ولا ...
- ش ٢ : لا ده شرا .. بس إزاي .
- الطالبة : فعلا أنا نفسى اشترى . لكن منين . مفيش
- البائع : أشترى انغد بجلدك . دى فرصتك . اشترى
- الشاب : ما هو أنا طالع عشان .
- البائعة : ( تقاطعه ) ده جاهز ماناخده معانا . ( للبائع ) .
- برضه لازم يشتري الأول .
- البائعة : يلا فرصة . أوكازيون اشترى . وعندك فرصة الاختيار والخيار .
- السائق : الله . الله . إيه ده بقى . هو إيه أصل الحكاية .

- البائع : وأنت مالك خليك فى حالك .
- السائق : ما اتفقناش على كده ..أنتم غيرتم الكلام .
- البائعة : أتوييس سكة وزياتن سكة ..
- المحامى : مش مظبوط .
- المرضة : أيه ده .. ياي .. يتقول إيه دى .
- المحامى : ( للبائعين ) أنتم كلكم كلامكم مكشوف والرول بتاعكم مش مظبوط
- المرضة : عاملهم بالقانون بتاعك .
- السائق : مكقول للجميع . وإحنا ماشيين معاكم بيه ، والكل راكب والتسعيرة موحدة . وعمالين تقولوا وتعيدوا ..
- محدث قلكم حاجة . حتى أنتم ( للبائعين ) .
- البائع : روق . روق .. إحنا برضه بتوعك وأنت عمنا
- السائق : أبوا عممنى بقى . ماهو الغلط متى فى البداية . أه سبتلكم الحبل على الغارب
- البائع : مش كده أمال . أستغفر الله ( يداهنه ) لاتعميم ولاحاجة . أنت سيد الكل ... ( للركاب ) ياأخوانا اشترو دى فرصة ضايعة اشتروها .
- المحامى : مظبوط .. على كل حال أنت المسئول عنهم وإحنا مش حانشتري .
- الشاب : معاك حق .. ( يضحك بألم ) .
- المحامى : مظبوط .
- السائق : ( للمحامى ) أنت كلامك كتير على القاضى .

- المرضة : أف .. إيه ده .. خلاص يا اسمك إيه .. اسمك إيه ؟
- الشاب : أنا اسمى ..
- البائع : خلاص كله يشخشخ جيبه ..
- البائعة : ويرمى بياضه ..
- البائع : والمستخبى بيان .
- البائعة : واللحاليج تتلحاح وتقب .
- البائع : ومعانا التوك والغوايش والحلقان . والبواريك والضفاير والماكس فاكستور . والبودرة والمسكرة والمسخرة بكل الألوان .
- البائعة : وبالاختيار . لازم من الشرا ومن غير لف ولا دوران ..
- المحامى : مرفوض كله مرفوض .
- الشاب : ومن حقهم يبيعوا ويشترؤا .
- البائع : دول مش مقدرين اللى هما فيه
- البائعة : مع أنهم مخيرين ..
- البائع : وساعتها حايبقوا مسيرين ويكل حاجة ملتزمين .
- البائعة : قانون الحياة لازم يكون .
- الشاب : سبحانه خالق الكون .
- البائع : يبقى كل واحد ياخذ حقه . وهما حقهم دلوقت ..
- البائعة : خلاص يختاروا .
- السائق : هوايه اللى يختاروا . أنا اللى من حقى أختار الطريق .
- الطالبة : أنت السواق وده حقك .
- البائعة : لون بسرعة

- البائع :** ومعانا نجيب محفوظ والتفسير للشيخ الكبير .
- السائق :** وأنتو مالكم ومال الحاجات دى كفاية عليكم البنس والفلايات والشيكولاته والحاجات دى .
- البائعة :** ماهم برضه لهم زباين وإحنا نحب نشتغل على الكل .
- المحامى :** بياعين مثقفين .
- الشاب :** مش قلتلكم بتوع كله .. أكيد هو ده اللص بتاع نجيب محفوظ
- البائع :** ويعدين فاكر نفسك ناصح ولا أنت بس اللى بتقرا ماهو لو أنا اللص يبقى أنتم الكلاب
- البائعة :** حلاوتك يامثقف يادارس .. أيوه كده .
- المحامى :** وليه الغلط ده .
- السائق :** أتلّم يا جدد أنت وهى ويلاش غلط .. بدل ما أنزلكوا من العربية ..
- المرضة :** أه نزلهم دول لسانهم طويل وبيشتمونا ..
- الطالبة :** أيوه عيب كده .
- البائع :** أنا برّد على الأستاذ وكلامه معايا مش أكثر ..
- يعنى نجيب محفوظ عنده ناس كتيره اشتريت الكتب بتاعته والقصص . واستفادت من حرية الاختيار
- الشاب :** وعنده ناس باعت وماشترتش حاجة
- المحامى :** واللى اشتروا عنده كان لهم هدف ومعنى واشتروا حاجات مهمة ..

- البائعة : أنا مش فاهمة حاجة غير أنهم اشتروا . وأنتم لازم تشتروا زيهم . يلا اشتروا ..
- البائع : وحتى اللى باعوا عنده كانوا تحت ظروف .
- السائق : مش زيك بلطجية .
- البائع : أنا بابيع لأن شغلى كده أنا أبيع وأنتم تشتروا
- السائق : عليه النعمة آخر نزاجه ..
- المحامى : على كل أظن دى فلسفة كاتب فى أعماله وحياته وحياة مجتمعه . ودى فوق مستواك وأحسن لك خليك فى حالك .
- البائع : أنتو نازلين فينا بهدله على كل العبره بالآخر وحاشوفوا
- البائعة : وساعتها أبقى أتفلس يا جميل .
- المرضة : أنتم حاشرين نفسكم فى كل حاجة ليه
- البائع : خلاص نرجع مرجوعنا للأوكازيون الكبير .
- البائعة : والشرا عندنا مالوش نظير . ويلا يا أستاذ . يلا يا أبلة خديلك شنطه .....
- البائع : ومعانا التفسير للشيخ الكبير
- البائعة : أه .. الشيخ الكبير..
- المحامى : وده راخر ليك فيه ؟ .
- البائع : الدين لله .. وحق للجميع .
- الشاب : ونعم بالله .. يس أنتم
- البائع : إيه .. إحنا نعرف ربنا أكبر من ناس كتير منكم ..



- البائعة :** وعندنا ضمير كمان ..
- السائق :** عظيم يبقى تسيبوا الناس فى حالهم وتتكلموا على الله
- المرضة :** مش عاوزين نشتري إيه ده .
- البائع :** إحنا تكلنا على الله مش على حد منكم . ويعدين
- إحنا قلنا عندكم حرية الاختيار يعنى تشتتروا والا
- ماشتتروش أنتم حرين لكن دى فرصتكم وأحسن لكم
- تشتروها .
- البائعة :** وإحنا قلنا عليكم
- البائع :** على كل حال أنتم ناس مفلسين
- المحامي :** عيب لما تقول كده إحنا معانا مراكزنا وفلوسنا لكن
- مش عاوزين نشتري .
- البائع :** فلسكم مش فى الفلوس بس . أنتم مفلسين فى
- كل حاجة . يعنى فى عقولكم وفكركم وفلوسكم
- وحياتكم وشراكم وبيعتكم وعقيدتكم كل حاجة كل
- حاجة .
- السائق :** أنا حاضطر أنزلك لأنك عمال تزودها قوى . يعنى إيه
- مفلسين فى عقيدتنا
- البائعة :** ومقشفرين كمان ..
- البائع :** ماهو . حتى التفسير محدش حاول يشتريه مع
- إن ده مفيد والناس كلها اليومين دول نازلة شرا
- فيه . أنتم محدش عاوز يشتري .. إيه حكايتهكم
- أنتم إيه ؟

- الشاب :** أنت اللى إيه .. ثم أنت مالك . عندنا ياسيدى  
اشترناه من غيرك .
- المحامى :** ويعدين الدين معاملة وحياة وسلوك ومبدأ
- المرضة :** فعلا إنما الأعمال بالنيات . المهم النية السليمة
- السائق :** الله هو أنت طالع تبيع ولا تعمل إيه بالظبط .. خليك  
فى حالك وشوف أكل عيشك وبيعك ولا تنزل  
وتخلصنا .
- البائعة :** بيع ياعم وأهو كله فايده ليهم برضه ..
- البائع :** خلاص . ومعانا كرارىس وأساتيك وأقلام رصاص .
- البائعة :** للتلميذ الشاطر والخبيلان . ( تشير للشاب ) اللى  
زيك كده ..
- الشاب :** عيب كده إنتى آيه . خليكى مؤدبة . ثم أنا مش  
خبيلان
- المحامى :** لسانهم طويل . أنا عمرى ماشفت بياعين بالشكل ده .
- المرضة :** دول مش بياعين .. دول لزقة .. ليخه حاجة كده ..
- الطالبة :** طفيليين .
- السائق :** عاجبكوا كده طالعين تبيعوا كرهتم الناس فيكم ..  
خفوا بقى واتكلوا على الله .
- البائع :** من عرف الله ولم تغنه معرفة الله فذاك الشقى .
- البائعة :** ونتوا بقى الشقى .
- المحامى :** ويبتكلم بالنحو كمان وأنت مصيبتك سوده .
- الشاب :** لا وإيه . إحنا بقى الشقى .. أمال أنتم إيه ؟

- المرضة : دول أى حاجة غير أنهم بياعين .
- البائع : إحنا أى حاجة وماله . بس حانبعلكم وبالعاية وغصب عنكم ولما نشوف .
- السائق : يعنى وبعدين فيك أنت وهى بقى .
- المحامى : ماهو أنت .
- السائق : أنا إيه . أهو أنتم كده . كل حاجة تحدفوها على غيركم
- البائعة : على كل حال محدش غصب على حد وبعد كده الكلام حايبقى جد .
- الشاب : ده تهديد بقى .
- المحامى : كده غلط .. أكبر غلط ..
- المرضة : أف إيه ده .. سيبونا فى حالنا بقى .
- السائق : خلاص . كفاية كده . كله يلزم حده .
- البائع : أنتم ناس عاوزين
- البائعة : خليك حلیم .
- ش ١ : العيال دى تبقى إيه
- ش ٢ : أسكت أسكت لیسمعوك
- البائع : ماشى . ومعانا الفرفشة والنعشه .
- المرضة : هو إيه ده ياخويا . أتوبيس ولا كباريه .
- البائع : ياواد ياملقاط يا ملقط . تعالى غنيلي واتنطط ( يغنى )
- الشاب : وكمان يتنطط .. ( فى سخرية ) .

- الساائق : ياجدع أنت أهدم السكه صعبه .
- الممرضة : والعلاج فى التأمين عذاب فى عذاب . شغل موظفين  
تبقى خلصت .
- البائع : ومعانا شرائط إغراء .. أحلى أفلام الموسم .
- الممرضة : ياي ده إغراء
- الطالبة : يالهوى دى حاجة عيب .
- الشاب : ضياع فى ضياع .
- المحامى : أيه ياأخى . (للشاب) كده مش مضبوط .
- الممرضة : ( منزعجة ) إيه ده .. باين عليك مجنون ..
- الشاب : أنا مجنون .. عالم مخايليل قاضين .
- البائع : ماتهمد . خلينا نشوف شغلنا .
- المحامى : ماتهمدوا كلکم .. ده اعتداء على الحريات .
- الممرضة : كفاية بقى ( تصرخ ) أعصابى مش قادره
- الساائق : خلاص كفاية كده . أنا صبرت عليكم كتير . كله  
يسکت ومش عاوز ولا كلمة ..
- البائع : ( بانفعال ) خلاص كده . مابقاش منه . إحنا جربنا  
كل حاجة .
- البائعة : يعنى .
- البائع : خلصوا كل الفرص وزيادة .
- البائعة : بس ده صعب عليهم ..
- البائع : نقطع العرق .
- البائعة : طب ..

البائع : لامفیش فایدة .. أجهزى ..

البائعة : ماشى .. یلا أطلع .

البائع : ( یبدو السلاح .. تبدو حركة تأثير ظهور السلاح فى

حركات الركاب مع موسيقى تصويرية وتغییر إضاءة

وأصوات متداخلة للركاب ) . ومعانا كل أنواع

السلاح وألوانه ..

البائعة : والكلام دلوقت للسلاح وأن أوانه .. ( ینطلق

الرصاص من جميع الاتجاهات مع الصوت والإضاءة

والرعب الشديد ) .

## الجزء الثاني

الممثلون فى حالة رعب وذهول .

الحركة غير طبيعیه ، وفى كل الاتجاهات . البائع

والبائعة يقفان كما هما فى نهاية الجزء الأول .

الشاب : سى .. سى سلاح .

المحامي : إجرام .. إجرام .

المرضة : وليه .. أصله إيه .

الطالبة : ضاع .. ضاع .

السائق : ما اتفقناش على كده . ما اتفقناش .. ممنوع هنا حمل

السلاح

البائع : وإيه يعنى ما اتفقناش

الشاب : وليه ؟

ش ١ : العيال دى تبقى إيه ؟

ش ٢ : هما بيعملوا كده ليه ؟

- المرضة : يالهرى .
- المحامى : مش مضبوط .
- السائق : ده صوت الشكمان
- الشاب : حرام عليكم .
- المرضة : تكونش دى غرفة العمليات .
- الطالبة : المكان غريب .
- المحامى : هى دى قاعة المحكمة
- السائق : هو إيه اللى حصل .
- البائع : أيوه خليكو فى التوهان ..
- البائعة : حلو ده عز الكلام .
- البائع : فرجونا كمان وقولوا .
- ش ١ : الحاجات دى كانت زمان ..
- ش ٢ : هو ليه راح اللومان ..
- السائق : كل وادى صاحبه فيه
- الشاب : هو سافر .
- المرضة : ماهو أصل الجرح واسع .
- السائق : لا مش كده .. لا يا أخونا . لا لا لا .
- البائع : عندك ( يهاجمه ) .
- البائعة : إيه .. حاتنسى نفسك .
- البائع : ولا إيه
- السائق : لا بأه أنتوا اللى .
- البائع : أصحى فوق . إحنا إيه ؟ .

- السائق : ما هو أنا دلوقت كشفتكم خلاص
- البائعة : عاوز تقول إيه .
- السائق : أنتوا عيال بلطجية .
- المحامى : مظبوط .. أيوه فعلا .
- المرضة : أيوه حرمية .
- السائق : أنا أدبتهم فرصة يركبوا ويبيعوا عشان يسترزقوا لكن هما نسيوا أنفسهم ..
- البائع : جرى إيه .. أنت أدبتنا الفرصة أه .
- البائعة : خذ وهات ...
- السائق : بس من غير بلطجة وسلاح .
- المحامى : أيوه استعمال سلاح نارى .. ده اعتداء على الحريات
- دى جريمه ضد المجتمع
- البائع : ده حقنا وإحنا بنمارسه
- المرضة : حقكم تعملوا كده ؟
- الشاب : ومين أداكم الحق ده .
- البائعة : إحنا ..
- البائع : أيوه .. من رأى منكم منكرا .
- السائق : وهوفين المنكر
- البائعة : عندكم
- السائق : ده وضعكم هو اللى منكر
- الشاب : ومحتاج تقويم .
- المحامى : مظبوط وبالقانون .



- البائع : وانتم محتاجين الى يحاسبكم .
- السائق : الغلط منى فى البداية .. ماحسبتهاش صح وسبتكم على راحتكم ..
- البائعة : لازم تعرف أن إحنا عاملين حسابنا من الأول .
- السائق : يعنى إيه ؟ .
- البائع : يعنى سواء حسبتها ولا ما حسبتهاش إحنا حاسبناها ومرتبينها من الأول . ومن قبل ما نركب ده بقى مع سبق الإصرار والترصد .
- المحامى : وإيه المطلوب ؟ .
- الممرضة : انتم ناس غشاشين .. وخلص بقى البيع مش بالعافية ..
- الشاب : والعنف مرفوض يا أخوانا .
- البائع : على كل حال إحنا لسه ما ابتديناش الحساب .
- السائق : ويبقى أيه الحساب ده كمان .
- البائعة : ( تتوه ) قصده يعنى حساب البيع .
- السائق : ومين أداكم حق الحساب وحق البيع .
- البائعة : ( تنافق ) أنته .
- السائق : وأنا لغيته .
- البائع : ما بقاش ينفع . فات الآوان .
- البائعة : ودلوقت بقى كله بالأمر .
- السائق : واحنا بنرفض الكلام ده .
- المحامى : والسلاح اللى معاك . مايدكش الحق فى اللى أنت بتقوله ..

- الشباب : طب ممكن نتكلم .. نتحاور .
- السائق : ده صنف ماينفعلش معاه الكلام ..
- المحامى : القانون والقوة . أحسن حاجة مع الصنف ده .
- المرضة : أى حاجة بس خلصونا منهم ..
- البائع : كلامكم كله فى الهجايب .
- البائعة : وإحنا خلاص سبقناكم ..
- البائع : واللى سبق أكل النبأ ..
- البائعة : وحكايتكم وخبيبتكم مش على حد ..
- البائع : والكلام بقى للسلاح ..
- السائق : إحنا صبرنا عليكم كتير ( البائع والبائعة يزيدان من استعمالهما للسلاح ويتراجع الجميع ويبدو المحامى فى محاولة التفاف وتحاور ) .
- المحامى : القضية عاوزه صبر .
- الشباب : هو كل شوية .. صبر صبر .
- المرضة : ياما صبرنا كتير . ( فى يأس ) .
- الطالبة : طول عمرهم يقولوها .
- الشباب : أصل بعد الصبر قبر .
- ش ١ : هو صبر القبر ليه .
- ش ٢ : هو أصل قبر الصبر فيه ..
- البائع : قبركم .. صبركم .. مركم .. بكاكم .. ضحككم ..
- غليكم . ذنبكم . سقاكم . عذابكم . عذركم . حسابكم
- ليكم كلكم .. وذنبكم على جنبكم .

- البائعة : أثمكم . وطهركم ، وزرعكم . وخلعكم من أرضكم  
 وأنتم شاربين من الكاس كلكم على بعضكم  
 البائع : لكنكم نسيتموا أنفسكم . وخلاصكم لازم من قلبكم .  
 البائعة : هم ناس منكم . لكن لعبوا بكم وغرقوكم وفي الوحل  
 حطوكم والخلاص ليكم . لازم يكون بأيديكم ..  
 السائق : ده تحريض واضح مرفوض  
 البائع : الذنقة والكفر زادوا في الميزان ..  
 البائعة : والذنوب ملت الصحف .  
 البائع : يعنى لازم نتغسلوا من جواكم ..  
 البائعة : وتتطهروا من براكم ..  
 البائع : والخلاص لازم جى .  
 البائعة : والهلاك أصبح مصيركم ..  
 البائع : ولا بد من التطهير . يمكن يخفف المصير  
 السائق : ( بانفعال ) . ده كلام ناس مجانيين ..  
 المحامى : دى المسألة وصلت للتكفير والتطهير  
 الشاب : والهلاك مصيرنا ليه ؟ .  
 الممرضة : ياساتر يارب . دول ناس مش طبيعيين  
 السائق : محدش حايستلحكم ولايسلملحكم ..  
 المحامى : وانتوا بقى اللى شرفا ..  
 ش ١ : بينى وبينك ده كلام عبط .  
 ش ٢ : أيوه دول عيال لبط .  
 الممرضة : أه .. نشال . ورقاصة .. هى هى .

- الطالبة : أخص .
- المحامي : رقاصة نقل عام . ( يضحك )
- السائق : والطبال إرهابي .
- الشباب : بتوع كله .
- البائعة : باقولكم إيه .. إحنا بياعين أه .
- البائع : ( مقاطعا ) لكن نشالين وحرمية والكلام ده لا ..
- البائعة : متزعش نفسك سيبهولى .
- السائق : أنتو فاكرين إيه ؟ هو يعنى عشان ما أنتم ماسكين سلاح مش حانواجهم . لا أصحاب . فوقوا
- المحامي : أيوه .. مطبوط .. وبعدين إحنا أقل واحد فينا أشرف وأنصف منكم ..
- البائع : جاي زى مابتقول كده . لكن أنتم ذنوبكم كبيرة وواضحة .
- المرضة : ذنوبنا واضحة . أنتم اللى عايشين على التنظيط والنصب .
- البائعة : على كل حال . المغالطات عندكم كتير ..
- البائع : وما فيش إنسان من غير أخطاء ..
- المحامي : خلاص يبقى مش من حقك تقولنا ذنوبكم ونظهركم ..
- المرضة : أه .. وتعملوا فيها مش عارف إيه ؟ .
- المحامي : يعنى اللى بيته من قزاز مايحدفش الناس بالطوب .
- السائق : أظن كده انكشفت أنت وهى . واتلموا بقى
- الشباب : ومن كان منكم بلا خطيئة

- البائع : يرضه لا . ولازم نحاسبكم .. لأنكم أنتم اللي  
وصلتونا لكده . من غير ماتسألوا نفسكم  
البائعة : وحانقرض عليكم كل اللي إحنا عاوزينه .  
البائع : واللى اتعمل معانا منكم ومن رجالتكم وناسكم . إحنا  
حانعمله هنا فيكم ومعاكم ..  
السائق : دى صياعة .. وعجز وقلة أدب  
البائع : ماشى . حتى إن كان لكن كله حايشى  
البائعة : وبالطريقة "ننى على مزاجنا  
المحامى : على كل ده ضد الشرعية .  
السائق : وضد الناس كلها .  
الشاب : والإنسانية .  
الممرضة : مرفوض . القسوة والعنف . مرفوض .  
الطالبة : والعذاب ليه ؟  
السائق : ده أسلوب العجزة اللي ناقصين عقل ودين ..  
المحامى : على كل حال أنتم نهايتكم محتومة وحكمتم على  
نفسكم ..  
البائع : كان عندكم فرصة الشرا بالحرية ..  
البائعة : وكان كله فى البراح .  
الممرضة : إئتوا تستاهلوا الإعدام ..  
الشاب : فعلا .  
المحامى : ده أقل حاجة ..  
السائق : أيوه تستاهلوا الإعدام .

- البائع :** أنتم بقى اللى لازم تموتوا ..
- البائعة :** وإحنا الوجود والقوة .
- البائع :** وأنتوا العدم والندم .. وريهم حايندموا إزاي .
- ( يطلقان النار بقسوة والبائعة تفجر قنبلة دخان كثيف لتعطى تأثير انفجار ويبقى الممثلون فى حالة أخرى من الذعر ويبدو الجميع فى حالة مواجهة وبأس ويبدو الممثلون فى جلوس قرفصاء ورعب من حالة إطلاق النار وتغير الموسيقى التصويرية والإضاءة ) .
- البائع :** كله يسكت ..
- البائعة :** مكانكم بسرعة .
- البائع :** إيه . فوقوا . مكانكم .
- البائعة :** آن الآوان ..
- البائع :** وزعى عليهم البضاعة من كل نوع ومن كل صنف .
- ( تتحرك بسرعة لتوزع عليهم أتواب غريبة تشبه الأكفان لكنها ليست أكفان لكى يستعملوها فوراً وتشير لهم بالاستعمال الفورى - موسيقى تصويرية لذلك ) .
- البائعة :** كله يلبس اللى ياخذه على طول .. دى ناس ضايعة ضيعوا كل حاجه حتى وقتنا ووقتهم
- البائع :** صنف نمرود .. لازم يتأدبوا .
- البائعة :** كله يلبس على طول مفيش وقت ..
- المرضة :** ( فى رعب ) إيه ده .. مش حالبسه ( تبكى )

- الطالبة : شكله غريب .
- الشباب : ده كفن .
- المحامى : مش شكل كفن .
- الشباب : أى حاجة الأمر لله .
- السائق : إنتم إيه حكايتكم بالظبط ؟
- البائع : إنته مابتفهمش .
- البائعة : أصل فهمه تقبل شويه .. معلىش .
- البائع : وزعى عليهم بقية البضايح .
- البائعة : استعملوه وألبسوه بسرعة
- المرضة : إيه ده ماكياج .. مفيش مراية .. أعمل بيه إيه ..
- الطالبة : باروكة غريبة قوى .
- البائع : خلصنا أنتى وهيه استعملوه كده . يللا يا أختى .
- الشباب : باروكة حريمى أعمل بيها إيه ؟
- البائعة : البسوا وبلاش غلبة .
- المحامى : غوايش وحلقان دى حاجات حريمى . كده مش مظبوط .
- البائع : ياخويا خلصنا .. مظبوط ومش مظبوط .
- السائق : وأنا كمان بودره . لا بأه .. ده شغل جنان ولعب عيال ..
- البائعة : هيه .. استعملها بدل الضرب . أنت فاكر إيه .
- يا للا ياخويا . ياللا ياسيدى .
- البائع : حاورىكم النجوم فى عز الظهر والليل . والنهار ..

البائعة : البسوا بسرعة .. يلا اتمسخوا . كل واحد يستعمل  
الى معاه وكفاية كلام . ( تستعمل الكرياج ويظهر  
صوته ) .

البائع : ( يضحك ) غشاشين .. مضللين .

البائعة : بداية تكفير الذنوب .

البائع : أهه الشرا والبيع بالأمر والضرب .

البائعة : شفتم قيمة فرصة الاختيار .. خلاص كله بالضرب ..

المرضة : ( تبكى ) . إيه ده . فى عرضك ..

الشباب : العذاب فى كل مكان .

الطالبة : وألوانه بقت ألوان ..

المحامى : هو يعنى إزاي ده يحصل معنا ..

ش ١ : العيال دى تبقى إيه

ش ٢ : أسكت أسكت ليسمعوك .

السائق : أنا مش مصدق نفسى . أه ياولاد الأفاعى .

البائع : لازم تدفعوا ثمن الضلالة .

السائق : ياما أديت وعملت كتير لكن ماتمرش .

البائعة : آن الآوان لتسديد الدين .

المحامى : انت فاجر مجنون .

البائع : وانت ماجن عرييد .

البائعة : وانت نتاشه مفتره .

المرضة : إيه ده . أنا .. ياعينى عليه .

السائق : حاجة غريبة . ناكر . ونكير .



- البائعة : ( للسائق ) أما أنت بقى .  
البائع : مصيبتك كبيرة .  
البائعة : شوف غلابة أزاى يا عينى .  
البائع : وزعى الشربه عليهم ..  
البائعة : الكل ياخذ شربته ويشربها . ياللا تنظف وتطهر .  
البائع : أشربوا على طول .  
الشاب : المصايب من كل ناحية .  
المحامى : أياه الحظ المنيل ده .  
البائعة : مالکش دخل لابلحظ ولا القدر ولا الحاجات دى  
المرضة : ( تصرخ ) إحنا فين .. إحنا عايشين  
الشاب : دنيا دى ولا جحيم .  
الطالبة : نفسى فى دنيا حلوه . مش كده .  
البائع : أنتم عيشتكم كلها سحت فى سحت  
الشاب : يعنى من الدار للنار .  
السائق : أدى اللى إحنا أخذناه منكم .. الخراب والدمار  
والعذاب  
البائع : الخراب ده طالع منكم .  
البائعة : منكم فيكم ..  
البائع : أنت أدتينا الفرصة .  
البائعة : لكن العيب جواناسك  
المحامى : احنا مظلومين .  
الشاب : ومالناش دخل فى اللى بيحصل .

- البائعة : أخذتم فرصتكم ورفضتم تشتروا .
- البائع : والاختيار حدد مصيركم .
- البائعة : أشربوا . ( أصوات مختلفة تصدر منهم ) .
- المرضة : عذاب فى عذاب .
- المحامى : خراب فى خراب .
- الشاب : أنتوا ناس زى الهباب .
- الطالبة : واكتئاب .
- المحامى : يامين يغيثنا منهم .
- السائق : أنا ياما قلت لكن مكنش حد بيسمع ولا بيجاب .
- البائع : أنتوا مابتفهموش .. دى عمايلكم وتصرفاتكم .
- البائعة : والحساب جوا الكتاب .
- البائع : ومافيش مغالطة ولا يحزنون . يلا وزعى شرايط الكاسيت .
- البائعة : يلا كله يشغل الشريط اللى معاه ويرقص عليه .
- المرضة : معاناش كاسيت .
- البائعة : مالكيش دعوه . حطيه فى العلبة اللى قصادك وهو حايشتغل . ويرقصك بلدى ياختى ( تتداخل أصوات الشرائط والجميع يرقص فى هيسيريا وبطء وبؤس . وترداد سرعة الشرائط والحركة معها . يرقصون فى أشكال مختلفة يضحكون يبكون يقفون يجلسون على الأرض إلى آخره ، أثناء ذلك يضع البائع والبائعة خشبة تابوت فى نهاية السيارة )

- البائع : عظيم اتفرجوا على الأفلام بالمره .
- البائعة : فيلم الهيلاهوب الهيلاهوب . واخبط كرسى فى الكلوب .
- البائع : ( للمحامى ) أنت ورينا زيهم . وانتى مثلى زيها ..
- المرضة : ( تبكى ) ما اعرفش .
- البائعة : وأنت مثل زى الشباب اللى فى الفيلم . ورينا .
- الشاب : أنا عمرى مامثلت ولا أعرف .
- البائع : لازم تمثلوا . بالذوق بالعافية هاتمثلوا
- الشاب : خلا .. أهه ( فى بؤس ) .
- البائعة : وأنتى ( تزغدها ) . وأنتى .
- المرضة : حاضر .
- الطالبة : أهه . ( تجرى ) .
- المحامى : كل ده ياربى ليه كده . ؟
- البائع : إحنا بنقول تمثل مش تغنى ( يضحكان ) .
- السائق : وكمان بتهزؤنا وتضحكوا علينا . المسألة زادت عن حدها
- البائعة : نعم ياخويا حاتسكت وإلا .
- البائع : إحنا لسه عاملين لك خاطر .
- السائق : كمان .. سبحان الله .
- البائعة : أقولك نشوفلهم حاجة تانية . يلا كفاية كده .
- البائع : خلاص آن آوان كشف الذنوب وبالحساب كله مكتوب .
- البائعة : كلكم غش .

- البائع : هاتى المحامى نبتدى بيه الحساب .
- المحامى : أنا طول عمري ..
- البائعة : ( تقاطعه ) سرقت ورق من قضية الشيكات المزورة مع أمين السر .
- البائع : حصل ولا لأ ..
- المحامى : حصل .. طب و .
- البائعة : ( مقاطعه ) وقضية الموكله ضد جوزها .
- المحامى : فعلا . بس هي
- البائع : بس خلاص .. يعنى حصل .
- المحامى : شغل أكل عيش
- البائعة : وقضية الرشوه .
- المحامى : بس أنا كنت بعيد .
- الضمير : ( بصوت إذاعى فى الخلفية ) كذاب الرشوه وكل حاجة كانت من تدبيرك وأنت اللي اتفقت على كل التدابير والخطط .. وأنت بتغالطنى أنا كل يوم . وكل وقت
- المحامى : أيه ده .. مين اللي بيتكلم .. أنا مظلوم .
- البائع : ده ضميرك . وضمير القانون اللي أنت بتشتغل بيه بيكشف كذبك . واحتيالك ..
- البائعة : وقضية المخدرات والخمور ودفاعك فى المحكمة عنها وإخفاء الأدلة .
- المحامى : أنا لا شلت خمور ولا مخدرات ولا شريتها .. دى طبيعة عملى الدفاع عنهم ده شغل . أكل عيش .

- البائع : فلوس الحرام تبقى حرام وسحت .
- البائعة : ودفاعك عن الباطل . ذنب وباطل
- المحامى : أنا كده مظلوم .
- البائع : خلاص روح أقعد هناك .
- المحامى : يا أخوانا مش كده . حساب إيه ده .
- البائعة : روح أقعد من غير كلام .
- الشاب : إحنا فين . وليه العذاب ده
- البائع : هاتيه مدام مستعجل .
- البائعة : ده اتظلم كثير .
- الشاب : إحنا مظلومين . وعشان لقمة العيش أنضرينا وانطردنا بالقانون .
- البائع : أنت حسابك على قذك .
- البائعة : وفقرك قدام ذنبك .
- البائع : وكله حايبان فى الحساب
- الشاب : المهم الحق والعدل بيان .
- البائعة : أنت فى طريقك للبداية .
- الشاب : بداية . ياريت هى فين
- البائع : هو أنت مش حاولت وابتديت
- الشاب : والله حاولت وتعبت وما خلتش على قلبى الميه .
- البائعة : وفشلت .
- الشاب : لا أنا مش فاشل
- البائع : يعنى هما اللي ..

- الشاب :** سلبوني كل حاجة وحاسبوني على كل حاجة وأى حاجه .
- البائعة :** يبقوا ظلمة .
- الشاب :** صرخت محدش سمعنى . جريت رحت جيت مفيش فايده .
- البائع :** ويعدين .
- الشاب :** قلت الشاطره تغزل برجل حمار . وابتديت من الأول
- البائعة :** عليك نور . واد مجدع .
- الشاب :** سابوني شوية فى الأول .
- البائع :** يعنى إيه ؟ .
- الشاب :** قبل ما أشعر بثمرة تعبى . طبوا على زى القضا المستعجل
- البائعة :** وهما محتاجين .
- الشاب :** الحيتان كتير وعينهم زاغت على الغلبان
- البائع :** حسدوا القرد ( يضحك ) .
- الشاب :** مع أنهم مش محتاجين ولا حاجة . يعنى فراغة عين .
- البائعة :** ويعدين
- الشاب :** وفى الآخر طلبوا منى أروح أستعطفهم وأطلب السماح
- فعلا حاولت واتظلمت وانكلمت لكن
- البائعة :** ياسا تر .
- الشاب :** برضه محدش سمعنى .
- البائع :** خلاص كفاية كده

- البائعة : أنت فى طريقك للبداية .
- الشاب : وأنا مستعد .
- البائع : روح أقعد هناك
- الشاب : حاضر وأنا فى الانتظار
- السائق : أنت قاعد عمال تلف وتدور عليهم . وظلم وضياع  
وزمان . إيه حكايتك ( للشاب ) .
- الشاب : وأنت يعنى عملت إيه ؟ . لا أنت قادر تحمى نفسك  
ولا قادر تحميننا . ولا حتى تساعدنا ..
- السائق : أنا حاولت واديتكم الفرصة . وما زلت باساعدكم .
- الشاب : أنت ماديتهاش دى اتفرضت عليك فى الأول وفى  
الآخر
- البائع : خلاص أنت وهو .
- البائعة : روح أنت هناك دلوقت .
- البائع : ( للسائق ) تعال وخذ حسابك معانا .
- البائعة : حسابك كبير مالوش نظير .
- البائع : ماتضيعيش معاه وقتك . يللا هاتى حسابيه
- السائق : يا أخوانا .. أنا ساعدتكم وخدمتكم إيه نسيتموا
- البائع : خاللى بالك ابتداينا أهه .
- البائعة : ساعدتنا أه .
- البائع : لكن قبضت التمن . وفورى .
- البائعة : دلوقت جه الحساب .
- البائع : والدفع فورى .

- السائق :** مش كده يا أخوانا . أنا ما اتأخرتش عنكم فى حاجه وساعدتكم كتير .
- البائعة :** أنت وراك ناس شغالة على الكل ويتنهب الكل .
- السائق :** مش ذنبى .. وأنا مش مسؤول عنهم .
- البائع :** لادى مسئوليتك فى الأول والآخر . ثم أنك عارف وساكت عليهم ..
- البائعة :** وهما شغالين نهب عيني عينك ..
- السائق :** طيب أعمل أيه فات الوقت .
- البائع :** سيب الأتوبيس لغيرك يسوقه .
- البائعة :** يمكن يعمل حاجة أو يقدر يوقفهم حتى .
- السائق :** أنتم ليه بتحملونى فوق طاقتى .. أنا باخدم الكل وأساعد الكل .
- البائع :** أنت بتشجع الكل ينهب بعضه ويأكل بعضه .
- السائق :** ما أنتم أهه .. أديتكم الفرصة وفى الآخر عضيتوا أيدي ويتحاسبونى
- البائعة :** الشر لما يزيد عن حده ينقلب ضده .
- السائق :** وياه اللي زايد .. إنتوا اللي زودتوها .
- البائع :** واللى مايشوفش من الغربال يبقى أعمى .
- السائق :** أنا شايف الطريق وماشى ببيكم ..
- البائعة :** بس غلط .
- السائق :** وعلى أى أساس حكمك ..
- البائع :** كل شئ باين الصح باين والغلط باين . والحلال باين



## والحرام باين

- السائق : بص الصبح والغلط مش مطلق . دى حاجات نسبيه .  
البائعة : خلاوتك يامعلمة ..  
السائق : وليه الكلام ده . إيه يعنى معلمة ومش معلمة .  
البائع : أصل إحنا برضه بنفهم زيك .  
البائعة : وبعدين عملت إيه باللى بتعرفه . وأنت غرقت الكل .  
السائق : لأن كل واحد مسئول عن نفسه . وعن تصرفاته  
وأخطائه . لكن أنا ركبت الجميع .  
البائع : كل راع مسئول عن رعيته .. وأنت دلوقت المسئول .  
البائعة : حتى عننا .  
السائق : أنتم أقولكم آيه . الله لايسامحكم .  
البائع : كان لازم تفوق من بدرى وتلحق ناسك . أيوه . قبل ما  
الكل يبعد عنك .  
البائعة : ويبقى ضدك .  
السائق : رغم اللى باعمله عشانهم ..  
البائع : أصلك بتبنى باليمين .  
البائعة : وتهد بالشمال .  
البائع : يبقى ماعملتش حاجة ..  
البائعة : أهه .. لا طالوا سما ولا أرض .  
السائق : الكل ناكر للجميل .. إن كان همه ولا أنتم ياظلمة ..  
البائع : انتهينا نرجع للحساب .  
البائعة : وحسابك محتاج سنين .

- البائع : وحسابك محتاج سنين ..
- البائع : والوقت محسوب علينا .
- البائع : فى النهاية عذرك أقبح من ذنبك . روح هناك لوحذك ..
- المرضة : ( تبكى ) عذاب .. عذاب .
- البائع : تعالى أنتى .
- المرضة : إحنا اتظلمنا .. سيبونا فى حالنا .
- البائعة : وماله يا أختى .. بس حسابك سدديه .
- البائع : بتشتغلى ممرضة .. والنهب على ودنه ..
- المرضة : مظلومة .. وبعدين محتاجة . والكل ماهو شغال سرقة أشمعننى أنا يعنى .
- البائعة : على رأيك السرقة عندهم خمس نجوم .. والمرضى غلابة .
- البائع : ماهو المرض بقى بالنجوم راخر .. واللى معهوش مايلزموش .. يموت مكانه ..
- البائعة : ومات مريض بسببك أنت والطبيب المناوب لأنكم كنتم مشغولين عنه .. هه مش كده ..
- المرضة : أزمة قلبية .
- البائع : إهمال منكم وفراغة عين ..
- المرضة : كان غصب عننا ،
- البائعة : طبيب والدكتور اللى خربتى بيته ووقعتى بينه وبين مراته ..

- المرضة : هو كان مفتري ويعدين حاول معايا .. وهى اللى  
عرفت مش ذنبى . وهى مرة واحدة كل الحكاية ..
- البائع : ويرضه مش ذنبك .. ( بسخرية ) .
- البائعة : آمال ذنب مين ؟ .
- المرضة : أنا مظلومة .. ودايما نيتى سليمة وقصدى خير  
( بدلع ) لأنى باحب الكل .
- البائعة : ( بتقليد ) بتحبى الكل . طيب يا أختى
- البائع : طيب ومعاملة مرضى التأمين الصحى اللى زى  
الزفت .
- المرضة : ده نظام التأمين الصحى . ودول موظفين ..
- البائع : الكذب خيبة .. ومش علينا .
- البائعة : ولازم تدفعى قمن الضلالة .
- البائع : الدنيا غرورة . غرتكم . المهم كله لازم يدفع الحساب  
محدث حايفلت .
- الشباب : حساب وعذاب ( يصرخ )
- المحامى : إحنا فين .
- البائع : ( يفرقع بالسوط ) أقعد مكانك ..
- المرضة : هو إحنا متنا .
- السائق : ده جحيم .. فعلا .
- المحامى : لاهو موت ولا جحيم . هى العربية ماشيه إزاي .
- السائق : ماعرفش . ما أنا قاعد جنبك أهه ..
- البائع : أخرس أنت وهو .

- الشباب : شكلهم شئ مش طبيعى .
- المرضة : شئ غريب .
- المحامى : حتى شكل المكان ده ذاته .. والناس دى برضه
- السائق : هو إحنا بقينا فين . ؟
- المحامى : والمكان ده إيه ؟ .
- الشباب : شكله غريب .
- البائعة : خليك فى حالك أنت غيرهم ..
- البائع : تعالى يابنى . أنت من الأول خط التواصل بينك وبينهم مش موجود . أنت لازم تبقى معانا وكان ممكن تشتري وتبيع معانا .
- البائعة : تعالى هنا خليك جنبنا . ماتخافش ..
- البائع : هانوفر لك كل حاجة ..
- البائعة : دى فرصتك انتهازها .
- الشباب : والأسلوب .
- البائع : مش مشكلة .. سيبك ..
- السائق : على كل حال كلكم ولادنا برضه . وأنا قلبى عليكم .
- مش كده ..
- الشباب : يعنى إيه . ؟
- السائق : أنت ابتنا . وهما ولادنا . لازم برضه نتحمل ونراعى الكل .

- البائع : ما كنا معاكم .. من غير مشاكل .  
 البائعة : والبيع كان كله فى الأمان .  
 الشاب : هو ده المفروض .  
 البائع : بس لقينا المعاملة صعب خالص .  
 البائعة : وإحنا قلنا نبيع ونأكل .  
 البائع : والكل يبقى جنب بعضه .  
 السائق : بس برضه فيه ملاحظة .  
 المحامى : كل واحد له مكانه .  
 البائعة : وإحنا حاولنا كتير وباما .  
 البائع : وإحنا لخبطنا الأماكن ..  
 الممرضة : إيه ده .. خلاص . خلاص .  
 البائعة : أصلهم لا حايعرفوا . ولا حايفهموا . ولا يسمعوا .  
 والوقت ضايع .  
 السائق : إنتم اللى ضعتم وشبابكم ضاع ..  
 البائعة : سبيلنا نفسك والباقي علينا .  
 الشاب : وبعدين .  
 البائع : الكل أخذ فرصته .. واختار بنفسه  
 البائعة : أتفقوا على أنفسهم . الضلالة خدتهم ولازم نصح  
 طريقهم  
 الشاب : خلاص .. أنا مستعد أبقي معاكم بس  
 السائق : ( يقاطع ) الضلال مالوش نظير . هو ليه واقف بعيد .

- المرضة : كان معنا سابتا ليه .
- المرضة : العبان .. مش هوده اللى كان ..
- السائق : ضللنا . ضحك علينا .
- المرضة : يعنى راح معاهم ..
- المحامى : لف ودار .
- السائق : الكل احتار .. هو لعب واختار .
- الشاب : يا أخوانا .. أنا اتظلمت .
- السائق : الواد ده .. باع ونصب وما اشتراش .. كداب .. ملاوع .
- المحامى : ولسه بيقاوح .
- المرضة : ياخسارة .. العذاب عمال يزيد .
- الشاب : كل واحد خد طريقه .
- المرضة : سبتنا ليه .. كنا سوا .
- الشاب : مش بإيدى .. كل شئ مفروض مقدر ..
- السائق : بس لو تبان .. وتعرف . الحقيقة مش بعيد ..
- المحامى : ياترى إيه المكان .
- السائق : السرعة كبيرة وغريبة .. والسكة مش واضحة
- المرضة : إحنا فعلا مش عارفين .
- ش ١ : لكن شايفين .
- ش ٢ : لا هى دنيا .. ولا هى أخرة .
- ش ١ : ولا جهنم .
- ش ٢ : لكن شئ العذاب فيه مالوش نظير .

- الطالبة : يعنى ده حساب الذنوب . والا إيه ؟ .
- المرضة : آمال يبقى إيه . قولوا حاجة .. إحنا فين .
- البائع : خلاص .. وده وقت تسوية الحساب .
- البائعة : ( للشاب ) تعال خد أشارتك أنت منا .. واتصالك بينا إحنا ..
- البائع : ده كان اختياركم .. واتفاقم .. وادى حسابكم .
- المحامى : لازم نخرج بسرعة من هنا .
- الشاب : ياللا نجبرى .
- المرضة : هو فين الباب .
- المحامى : أخرجوا من أى فتحة .
- السائق : مقفولة من كل ناحية ..
- الشاب : مش باين حتى الأبواب .
- المحامى : الضباب كثيف . مش شايف حد .
- الشاب : يعنى نبقى فين .
- المرضة : نبقى فى السما .
- السائق : آمال الأرض فين . مش باين أى حاجة . ولا لاقى أى حاجة .
- البائعة : تعبتونا قوى عشان نجمعكم مع بعض جوا الاتوبيس .
- السائق : إيه النفق الغريب ده .
- المحامى : نفق .. هو إحنا فى مترو الإنفاق .
- الشاب : ده طويل قوى .
- المرضة : ضلمة خالص .

- السائق : بس ماهواش المترو .. ومافيش قضبان ولا حاجة ..
- البائع : إنتوا لسه مش قادرين تفهموا .
- البائعة : أغبيا .. لحد الوقت وما فهموش .
- المحامى : ده مافيش حتى محطات .
- الشاب : يعنى ده نفق حقيقى .
- المرضة : آمال أيه فهمونى .. إحنا ..
- المحامى : قصدك نفق الموت .
- المرضة : لا مش عايزة أموت .
- الطالبة : ونموت .. هو إحنا عملنا حاجة .
- الشاب : لكن فعلا مخيف .
- المرضة : مخنوقة .. عذاب فى عذاب .
- ش ١ : من الأول وأنا عمال أقول العيال دى تبقى إيه .
- ش ٢ : كان قلبى حاسس بس مش فاهم .
- المحامى : حر نار .. حر .. نار ..
- المرضة : حتى الموت مش طايلاه عذاب .
- ش ١ : سلام قول .
- ش ٢ : هو أنت لسه أهدم بقى .
- السائق : مهما كان العذاب .. أسمعونى عشان نقاوم نقف من جديد .
- الشاب : ( يضحك بسخرية ) عندك أمل فى أيه . بعد اللي إحنا فيه .
- البائعة : ( للسائق ) . لسه بتعرضهم خليك مكانك .



- السائق : مش حا أسلم .. أنتوا معلش لكن أنا لا .
- البائع : ما أنا عارفك . لكن برضه مش حانسيبك .
- السائق : المهم اللي يضحك فى الآخر .
- البائعة : إحنا اللي حانضحك . عليك وعليهم .
- السائق : دأنا واثق من النهاية .
- البائع : البجاجة طبع فيك .
- السائق : والأيام بينا مداوله
- البائعة : وإحنا معاك للآخر .
- السائق : المهم الناس دول .
- البائع : دول خلاص سلموا .زى ما أنت شايف
- البائعة : وينلعب بيهم أهه . بص شوف ( يتم ملاعبة وتعذيب بعض الموجودين )
- المحامى : النفق مالوش نهاية
- المرضة : النفس .. مافيش نفس .
- الشاب : ولا فيش نهاية .
- السائق : الاختناق زاد .
- البائعة : ( للبائع ) وأنا كمان اتخنقت
- السائق : ( يضحك ) هه .. أبتدينا ..
- البائع : بس برضه إحنا أقوى .
- البائعة : الحقنى أبتديت أضعف زيادة .
- البائع : شدى حيلك إحنا لسه فينا قوة .
- المرضة : حتى هما كمان معانا .

- المحامي : أحسن عشان نبقى فى الهوا سوا .  
الشباب : يا أخوانا قولوا إحنا فين .  
البائع : خلاص مش عاوز كلام كله يسكت ..  
ش ١ : العيال دى تبقى أيه .  
ش ٢ : أسكت أسكت .. ليسمعوك ..  
المحامي : الضغط زاد . والضعف زاد .  
البائعة : ( للبائع ) . أمسك نفسك .. أنت مالك .  
السائق : الله . هو راخر داخ . أنا قلت المهم اللي يضحك فى الآخر .  
البائع : لاهما كان مش حاسلم . قبل ما أخلص عليك  
السائق : أنا قلتلك الشاطر اللي يضحك فى الآخر .  
البائعة : وإحنا لسه القوة والسيطرة .  
البائع : والسلاح أه فى أيدينا .  
البائعة : أه هانضربكم . ( صوت ضرب ) أضرب قوى .  
المرضة : ( تبكى ) وكرمان نازلين فينا ضرب . حرام عليكم  
السائق : دى علامة اليأس . أه . ما أنتوش قادرين ترفعوا أيديكم ..  
البائعة : أنا دخت مش قادرة .  
البائع : ( يصرخ ) أمسكى الكرياج وأضربى فيهم ..  
ماتديهمش فرصة يشمتوا فينا أو حتى يفوقوا  
الشباب : العربية بتجرى بسرعة غريبة جدا .  
السائق : جه علينا الدور علشان نحاسبهم إحنا .

- المحامى :** نحاسب مين .. إحنا عاوزين نخلص .. مش باين نهاية للنفق
- السائق :** وبرضه مش باينله آخر .. لكن برضه حانوصل
- الممرضة :** أمتى .. ياما قلت وما فيش فايدة .
- ش ١ :** السكة دى تبقى أية .
- ش ٢ :** مش باين لها أصل ولا فصل .
- الطالبة :** إحنا ضعنا .
- السائق :** السكة دى ليها آخر .
- البائع :** وأخركم قبل آخرها .. والكراج أهه معايا .
- البائعة :** آن الآوان للخلاص منهم .. والضباب زاد والظلمة زادت والخنقة زادت ويلا بينا نلحق نفسنا .
- السائق :** أنكشتم على حقيقتكم ..
- المحامى :** بس لو فيه أى أمل .
- السائق :** أطمئن .
- الممرضة :** أى حاجة خلصونا .. مش قادرة .
- الشاب :** الخلاص بقى شكله صعب . لاهما طاييلينه ولا إحنا كمان طاييلينه ..
- السائق :** شفت يعنى أنت رقصت على السلم لا طلت ده . ولاده .
- الشاب :** يا اخويا أنت راخر خليك فى المصيبة دى وخلصنا وورينا شطارتك .
- البائع :** ولومت لازم واحد منكم يتحط جوا الصندوق اللى

هناك ده ..

**البائعة :** أيوه لازم .. حاولوا تمسكوا أى واحد منكم وتحطوه  
**السائق :** لا لا ماتسمعش الكلام . أتماسكوا .. كملوا معايا ..  
إرجعوا .. اتحدوا .

**البائع :** ( يتماسك ) حانشوف . بالكرباج . ( يفرق بالصوت  
ويجرى الجميع خلف بعض يتقاتلون يرضخون .  
يضحكون . يبكون . يبدو الجميع فى حالة هستيرية  
غريبة يتصاعد بهم الموقف إلى أقصى الدرجات من  
السرعة والعنف تتصاعد الموسيقى التصويرية  
والا بخره الكثيفة جدا .. تبدوا إضاءات مختلفة  
وسلويت وأشكال غريبة . . تتداخل الأصوات جميعا .  
يبدو صوت السائق ) .

**السائق :** الطريق طويل وصعب ماتسلموش ( تتداخل بقية  
الأصوات فى تعقبات مختلفة ) .

**المحامى :** الخلاص .

**المرضة :** أنقذونا . بأى طريقة .

**السائق :** الأتوبيس لسه معنا . والطريق لسه معنا

**البائع :** والكرباج لسه معنا

**الشاب :** كله كلام فى كلام .

**السائق :** كله أوهام .

**البائعة :** أوهام .. أوهام .. ( يتصاعد الصوت والكل يدور  
حول بعض ) .

- المحامي : لازم لكم الإعدام  
السائق : الإعدام .  
الشاب : كلام ..  
ش ١ : كلام  
ش ٢ : كلام .. ( تظهر يافطة مفترق طرق بالضوء الأحمر ) .

إظلام

نهاية المسرحية



## ٢ - كارب الجماميز

مسرحية كوميدية استعراضية





## شخصيات المسرحية

- لوفـة : الحاوى الكبير وأبو أمورة .
- الدهشورى : أخو لوفه وعضو المجلس .
- أمـورة : الحاوى الصغيره أبنة لوفه .
- جـلال : الرسام .
- عم سيد : بائع الكتب .
- دومـة : صبي القهوة .
- القـط : ابن الشيخة بطة .
- الشيخة بطة ذكر الندامة : كودية الزار .
- فرغلى : مزين بالشارع .
- بعـزق : الأراجوز .
- زبائن القهوة .
- بائع باطاطا - بائع عرقسوس - بائعة يانصيب .
- أعوان الدهشورى .
- طبيب المستشفى - تمرجى ١ ، تمرجى ٢
- طبيب المستشفى .
- بعض الجماهير .
- ضابط شرطة - صول شرطة - عسكرى .



خشبة المسرح مظلمة تماما . تضاء بقعتا ضوء  
متعاكستان فى منطقتين متضادتين على مستويين  
مختلفين ..

**البقعة الأولى :** تبدو فى مقدمة بين المسرح حيث يقف لوفة الحاوى  
يقدم ألباه لبعض الجماهير ( الوهمية ) .

**البقعة الثانية :** تبدو فى يسار منتصف المسرح فى قهوة تقريبا حيث  
يقف الدهشورى يخطب فى بعض الجماهير  
( الوهمية )

**لوفة :** جلا جلا - جلا - جلا

قرب - قرب - قرب

العب ياواد ألب

قرب ياواد قرب

**الدهشورى :** الإخوة الناخبين الألباء

الأخوات الناخبات الجليلات

السادة المناضلين .. السيدات المناضلات

**لوفة :** جلا .. جلا .. جلا

وأنت ياشيخ منصب بس أوعى تستغرب

**الدهشورى :** فعلا مش غريب عليكم أبدا .. اختياركم العظيم ..

وأنا نصبت نفسي لخدمتكم ..

**لوففة :** اللعب ده أصله .. مرسوم ومتوضب

**الدهشورى :** واختيارى منكم كان من غير توضيب ولا ترتيب ..

لكن القدر .. القدر هو اللي فرض كلمته ..

**لوففة :** وتوت .. توت توت حاوى توت .. وادى البرغوت

**الدهشورى :** وأنا .. لن أتوانى أو أتردد فى خدمتكم بكل ما أملك

من طاقة وحركة وإنطلاقة قافزين للإمام

**لوففة :** ماسك نبوت وأبعد عن الحوت

**الدهشورى :** إحنا طبعاً مش ممكن حانسبكم لوحدكم أبداً .. إننا

جميعاً فى قطار واحد ..

**لوففة :** يلا .. ياتعبان زرياب .. أطلع من الجراب .. وأرقص

وفرّج الأحباب

**الدهشورى :** ومن غير لف ودوران .. آن الآوان نتحرك فى كل

مكان .. ونسابق الأزمان ..

**لوففة :** حانلحق الكلام ونغير المكان وهناك حانقول كمان

وكمان .. وتوت توت .. حاوى توت ..

## الفصل الأول

### المشهد الأول :

( شارع درب الحماميز حيث يمتاز بالعديد من المكتبات وقهوة على ناصية الشارع ومحل حلاقة قديم ومحل رسام صغير تتفرع منه حارة وهى حارة عبد الباقي . الشارع شعبى بسيط . الأحداث عام سنة ١٩٥١ . يبدو دومة يجهز قهوته ويدخل عم سيد ليفتح مكتبة للكتب القديمة ويصبح على دومة الذى يرتب الكراسى وطاولات لاستقبال الزبائن )

عم سيد : صباح الخير يادومة ..

دومة : صباح الفل ياعم سيد .. نهارنا فل ياسيد الكل .. استعراض دومة

عم سيد : ( يتجه ويبدأ فى فتح المكتبة ويرتب الكتب ويخرج كرسيه بجانب الباب على الشارع ) هات الشاى يادومة ..

دومة : ماشى جاى .. وعندك شاى كل يوم والمية بيضة وصلحه ..

( يدخل جلال الرسام ويلقى الصباح على دومة وعم

سيد ) ..

**جلال :** سلامو عليكم ..

**عم سيد :** وعليكم السلام يابنى ..

**دومة :** والسلام والرحمة .. على سيد الفنانين العترة ..

والشأى يبقى اتنين .

**جلال :** ( يفتح المحل ويخرج اللوحات التى يرسمها ويخرج

لوحة بندق . يضعها أمام المرسم فى الجانب الآخر من

باب المحل . ) يتجه لعم سيد وهو يجلس بجانبه (

آية الأخبار ..

**عم سيد :** الأخبار عندك أنت .. إلا أنت ناوى تخلص الصورة

دى إمتى ( بخبث )

**جلال :** آه ياعم سيد جينا للكلام ..

**عم سيد :** ( يضحك ) أنا والله نيتى سليمة .. أنا قصدى يعنى

أنها طولت ..

**جلال :** ماهو كله على إيدك ياعم سيد ( دومة يحضر الشأى

وهو بتصنت )

**دومة :** وادى الاتنين شأى آخر مزاج .. أى خدمة .. أيوة جاي

( يتحرك )

**جلال :** الواد ده مش حايبطل الحكاية المنيلة اللى فيه دى ..

( يدخل زبون القهوة )

**الزمائن :** صباح الخير يادومة ..

- دومة :** يامرحب بالزباين المجدعة .. وعندك اتنين شاي بوسته ..
- زبون :** والطاولة يادومة ..
- دومة :** ماشى . وعندك طلب البهوات والولعة تمام .. والزهر كمان وصلحه ..
- أيوة جاي .. ( يتحرك داخل القهوة ) ..**
- زبون :** زبط الشيشة يادومة .. ورص الولعة ..
- جلال :** يا عم سيد مانتش غريب ..
- شخص :** صباح الخير
- جلال وسيد :** صباح النور
- عم سيد :** أيوة . ياسيدى .. كمل كلامك ..
- جلال :** البنّت آخر مجدعة .. وحلوة فعلا .. لكن بقى ما أنت عارف أة . إحنا أصحاب راجل .. لراجل ..
- عم سيد :** يعنى مع كل ده .. ماقدرتش تفتح فى الكلام ..
- جلال :** لاطبعا قدرت ..
- عم سيد :** عملت إيه ..
- جلال :** أهة .. بارسم اللوحة .. واهى كل يوم هنا ..
- عم سيد :** يافرحتى ع الشباب الأبهة .. ياراجل أنت لازم تتحرك
- جلال :** البنّت راجل يا عم سيد .. ( يدخل فرغلى ويلقى الصباح على دومة ثم ينظر إلى جلال وعم سيد ويلقى السلام عادى )

- فرغلى :** صباح الخير يادومة .. أخبارك إيه .. ( بخبث )  
 شايفك شغال على الصبح . ( ينظر إليهما ) سلام ..  
**عم سيد :** سلام .. إيه يافرغلى مالك ..  
**جلال :** ( مؤخرا ) سلام ..  
**فرغلى :** ( يفتح الدكان ) ولا مالى ولا حاجة . سلام والسلام ..  
 وكمّلوا الكلام ( بخبث )  
**جلال :** سيبك منه .. ده راجل سوسة وغاوى كلام فارغ .. أهو  
 أتلم على دومة ..  
**عم سيد :** نرجع لكلامنا ..  
**جلال :** أولا وطى صوتك ( يشير إلى دومة وفرغلى )  
 أنت شايف كل حاجة وعارف كل حاجة .. والبت مش  
 مديانى فرصة خالص  
**عم سيد :** طيب ماهوده دورك .. ابتديت ترسم .. وقلنا  
 حان رسم ..  
**جلال :** يا عم سيد .. أنا مش فاهم أيه حكايته بالضبط ..  
**عم سيد :** كلمها .. لاغيها .. خد وادى  
**جلال :** يا عم سيد أقولك صدانى . تقولى خد وادى أنا نفسى  
 أعرف أيه الحكاية بالضبط ..  
**عم سيد :** ماهو لازم تحاول .. وتتناقش وتتكلم وتعرف بنفسك ..  
**زبون :** آه محبوسة ..  
**زبون ٢ :** وأيه يعنى ده قشاط واحد .. ( يدخل القط ويتجه إلى  
 دومة ويسلم عليه )



- القط :** سلام يادومة ( ينظر لعم سيد ) أخبارك إيه ..
- دومسة :** يامرحب بسيد الشباب والمجدعة ..
- جلال :** أهوه ( يشير إلى القط ) أهو داينخ على الفاضى وهية مفرجة عليه الحتة وأهلها يرضيك يعنى تعمل فيه كده ..
- عم سيد :** وهو أنت زيه ..
- جلال :** أنا مش عارف هيه عايزه إيه .. رفضانى ليه طيب تعمل إيه فى دى بقى ..
- ( يدخل بائع بطاطا بالعربة ويقف على الناصية فى مواجهة القهوة ) ..
- البائع :** بنار القرن يابطاطا .. يامعسلة قوى .. ومستوية قوى .. يابطاطا
- عم سيد :** أنا أقولك حاول .. وكل حاجة عاوزة وقتها .. بس أنت عينك زايغة الناحية الثانية ..
- جلال :** قصدك عدلات . ياعم . دى هى اللى مش سيبانى فى حالى ( يضع رتوش )
- القط :** ( يتحرك تجاه جلال والصورة ) قال يعنى الصورة حلوة . وكمان رسمك وحش
- جلال :** ياسيدى ( ينظر لعم سيد ويبادلہ النظرات ) أهو على قد الحال ..
- ( تسمع أصوات دق الزار من داخل حارة عبيد الباقي ) ..

- عم سيد : صبحنا وصبح الملك لله .. ليل ونهار الدق على طول  
والزار شغال .
- دومة : ( ينادى ) أبوة جاى .. ( يتجه للقط ) كله حاضر .  
كله جاى .. والدق شغال والشغل شغال ..
- القط : يلا . هات الحلبة باللبن .. ( يدخل طفل يتجه إلى  
فرغلى )
- الطفل : عم فرغلى .. أمى بتقولك أدينى التحويجة بتاعة  
الإسهال ..
- عم فرغلى : أيه ياواد .. تعال .. ( يعطيه ورقة ) قول لامك ..  
التذكرة دى تغليها فى مية وتشرب المية على طول ..  
وتفوت عليه بكرة .. فهمت ..
- الطفل : ( ياخذ الورقة ) حاضر . فهمت . تغليها وتشرب المية  
على طول . ( يجرى )
- الرجل ١ : ( ومعه زميل القهوة ) ياللا ياعم . ورينا اللعب  
بتاعك قفلت معاك
- الرجل ٢ : وادى خانة الدبش قفلت معاك .. ( تدخل عدلات  
من الشارع متجهة إلى جلال ترى الصورة تشتعل  
غضبا )
- عدلات : صباح الخير ياعم سيد . صباح الخير ياسى جلال .  
( فى دلال ) أيه ده . هو أنا كل ماأجى . ألاقىك  
ماسك فى الهبابة دى ياخويا ... شوفلك حاجة  
تبيعها أحسنلك ..

- جلال :** أيوة ياعدلات . جرى أيه .. ماهو ده شغل .. ويعدين ..
- عدلات :** ( مقاطعة ) مش قصدى . يقطعنى . والنبي أنا قلبى عليك
- ياسيد الكل أنا ياخويا رايدالك الخير ..
- عم سيد :** ( يداوى الأمور ) فعلا عدلات بنت حلال وتجبلك الخير ..
- عدلات :** أه .. والنبي ياعم سيد ده سى جلال غالى .. قوى قوى
- دومة :** قوى ياسيدى قوى ( يتابع ) ماهو بقى الناس أرزاق .
- ( ينظر للقط ) والا إيه ..
- عدلات :** بس ياواد أنت .. وأنت مالك هوكان حد سأللك
- القط :** هو مايقصدش .. ده هو بيتقول على حاجة تانية ..
- ياست عدلات ..
- عدلات :** باحسب أسمع ياواد أنت مالکش دعوة خالص بس
- جلال .. أنت فاهم ( بدلع )
- بائع البطاطا :** يابطاطا . يامستوية بابا .. طا .. طا .. ( يأتى
- صوت الشبخة بطة ذكر الندامة من داخل الحارة وهى
- خارجة ) ..
- الشبخة بطة :** ياواد يادومة . أنت ياواد يادومة . يوه مالك فيك
- أيه .. مش ترد .. ( تدخل الشارع تجد الجميع ) الله
- ده الحبايب هنا كلهم . ياصباح الخير ياعم سيد ( تنظر
- له ) أنا عارفة حاتقول أيه . طب أعمل أيه . ياخويا
- الزباين والنبي طلبوا الدقة دى ما أقدرش أقولهم لأ .
- وأنت مايرضيكش أزعلهم .
- ( لجلال ) صباح الخير ياسى جلال . خليك ياخويا

خليك قدام البتاعة بتاعتك دى .. ( تلاحظ عدلات )  
 يوه يقطعنى . أهلا يا عدلات . يا حبيبتى ( تقبلها )  
 ورننا ياختى ينصرك . وحشانى والنبي . أبقي تعالى  
 يا أختى أعملك حجاب . هى . هى . للأحباب بس  
 هاتى قطرة هه .. وأنت يا فرغلى فين ياخويا الحاجات  
 اللى قلتك عليها . والتحويجة أياها . هه والكلام .  
 هه . والكلام ورقة اللى قلتك أكتبهم .. يلا ياخويا  
 خلصنى آه .. مش محمد رننا مشغلاك أحسن ميت مرة  
 من شغلتك التلمة دى . هى .. هى

**فرغلى :** أنت يا ولية من ساعة مادخلتى الشارع وأنتى عشرة  
 فى بقك . أيه . طب أدى لسانك راحة .. ( يعطيها  
 طلبها ) . خدى . أيدك على المعلوم .

**الشيخة بطة :** يوه . ياواد يا قط . قاعد تعمل أيه . وسايبنى لوحدى  
 وسط الزباين والفرقة شغالة .. تقوم ترقص الزباين  
 ياواد . يلا قوم .

**القط :** جرى أيه ياامة . مش كده أمال .

**دومة :** أبوه يا شيخة أنا جاهز . وجاى بس بجهاز الطلبات .  
 كل طلباتك جاهزة حالا حادخلها للزباين ..

**الشيخة بطة :** أبوه كده . يلا ياخويا يخليك .. هات الحاجة وتعال  
 بسرعة هه ..

( بسرعة تنطلق داخل الحارة . يدخل لاعب أراجوز  
 يحمل عدته وهو يعزف ينتصف الشارع وينادى )

**بمـزق :** الأراجوز ( توت ) الأراجوز الأراجوز النوزى كونزى .  
جمهورك جايلك بالجوزى ( يلتفت حوله أهل الشارع  
والأطفال )

( يدخل معه الطبال .. ويقدم استعراض الأراجوز

**الأراجوز :** أراجوزى . ياجوزى . النوزى كونوزى ..

**الأراجوز :** أنت عاوزه آيه ياولية .. يارزية .. يابلية ..

**الأراجوزة :** أنا بلية .. يالى الزمان بلانى بيبك .. ونافشلى ريشك

زى الديك .. غيرش أنا اللى صابرة عليك .. وأنت

لابايدك ولابرجليك ..

**الأراجوز :** أنا طيب .. أن ماوريتك .. يا أم الغراب وبقك بوابة

من غير باب .. واللى يصطبح بيكى يبقى يومه

زى الهباب ..

**الأراجوزة :** ما أنا عارفاك ..

ياقلاتى والسهر برة ليلاتى .. وأنت من غيرى

ماتسواش

( يخرج بندق بسرعة منطلقاً لداخل الحارة ) .

**الأراجوز :** ماهو اللى يصطبح بيكى يروح الكراكون وأنت صوتك

عامل زى الميكرفون وأكيد كنتى مرضعة قلاوون ..

**الأراجوزة :** أنا .. إن ماوريتك يا صدمان . ياعدمان يالى الغراب

يقولك يا أبو قردان والحمار يقولك يا أبو ودان ..

**الأراجوز :** إن ماوريتك .. واتجوزت عليكى بنت حلوة صغيرة ..

وأمورة ومصنيرة .. وطرية ومغندرة ( يدخل بندق ودومه ) ..

**الأراجوزة :** ما أنا عارفة إنك خسيس يامنيل .. ياخريج بنك  
التفليس وأنت مشبكينك بالدبابيس .. ومقيدينك فى  
كشف الملاحيس ..

**الأراجوز :** ماهو أنت عاوزه العلقه اللى هية عشان تفوقك ..  
وتعقلك وبالعصاية حا أشخلعك ..

**الأراجوزة :** وأنا اللى باختى أسود ومهيب والهم على راسى مكيب  
والضرب أهو نازل ملهلب . يالهوى . يالهوى .  
( يضرب الزوج تجرى الزوجة ويجرى خلفها )

**أمورة :** فيه آية . هواية ده اللى أراجوز وغيره .. مين  
الواد ده ..

**بعزق :** توت .. توت .. أراجوزى النوزى كونوزى ..

**أمورة :** لابويا الحاوى وقوله على البرغل وهات العدة وشنطة  
السروح .. مع المعلم الكبير ( يخرج دومة )

**أمورة :** ( تصفيق ) توت .. توت .. أنا الحاوى . أنا  
الحاوى . اللاوى ترولاوى .. وجلا .. جلا ..

تعالى عندى ياولا .. ( يدخل دومة ولوفة والأدوات )  
**لوفة :** فيه آيه ياأمورة .. يلا .. يلا .. يلا .. جلا . جلا .

تعالى شوف الحاوى ياولا . ( يتجه الجمهور  
تجاهها ) .. تعالى قرب . قرب . قرب .

**أمورة :** على اللعب قرب . وشوف وجرب حظك معانا .  
( يتحرك جلال وعم سيد تجاه بعزق لإخراجه من  
الساحة لكن بعزق يرفض بشدة ) ..

**جلال :** تعال يا أخ .. تعال من وسط الشارع وأبعد عن المشاكل

**عم سيد :** تعال يا ابني وأقصر الشر ..

**بعزق :** شرابية يا عم أنت وهو . ده أكل عيش وأنا مش حاسكت لهم . أنا لازم أضحك الجميع عليهم . أما أشوف أنا ولاهما . بص وشوف . أما أشوف  
ينادى ثانيا ) ..

**الأراجوز :** أراجوزى . يا أراجوزى . ياجوزى . ياكايده العدوين ،  
مخليهم مفلفلين وواقفين متغاضين . وأهم قدامك محتاسين . ( الجمهور يضحك . وتصح حلبة ) ..

**أمورة :** أراجوز ده أيه يابلية وأنت ياواد هفية وبطلع فى الغلايه منك ميه .. وأبعد لاديك روسية وأخليك رمية .  
ويلموك حتت من الأرضية ..

**الأراجوز بعزق :** أنت يا أبوها . هو أنت حاوى ..

واللا بلاوى .. أصل أنت غاوى شغل الحساوى ..  
ترقص وترقص على القهاوى

**الحاوى أمورة ولوفية :** قال أيه أراجوز . وأنت منبوذ . روح أنتيل . وأنت يحموك بالكوز أه يافرقع لوز . وباريتها ياشيخة جابت منك جوز ويبصو فى قفاك .. يلاقوة ضارب بوز ..

**بعزق :** ( الأراجوز ) ياختى روحى كده وقال إيه حاوى توت وأنتى شبه البرغوت ومسكالى كتكوت وأنت عاوزه

ضرب الثبوت ويسمو أبوك الحوت . وامشى لا أضربك  
 بالشلوت ( الجمهور يضحك ويعزق وفرغلى ينفعل  
 لوفة وأمورة . فتمسك بعزق وتنزل فيه ضرب متواصل  
 وقوى . وعم سيد وجلال ودومة ) ( دومة يحوش  
 ويضرب فى نفس الوقت لبعزق . الذى ياخذ علقه  
 ساخنة وتدخل عدلات لتبعد جلال عن أمورة  
 ( استعراض للحنافة )

### استعراض الحنافة

أمورة : طيب .. خد .. خد ..  
 بعزق : أى .. أى ..  
 أمورة : خد دى كمان  
 بعزق : يا أخوانا حرام .. أى .. أى ..  
 عم سيد : حوش .. حوش  
 جلال : حلق .. حلق  
 دومة : أضرب . أضرب .. أذى  
 بعزق : أى .. أى .. الحقونى .. الحقونى ..  
 الشيخة بطة : بوة كفاية ..  
 عم سيد : أبعد - يلا . حوش يا جلال  
 بعزق : طيب .. طيب .. حاضر ..  
 عدلات : تعالى ياختى تعالى . بس ابعدى عن سى جلال .



والرجالة . وتعالى معايا ياختى .. هات يادومة كباية  
مية بسرعة ..

**أمورة :** ماهو أنا لازم أخلص على الواد المايص ده .. قال إيه  
أراجوز

**لوفة :** أنا حاقطعلك خبره . ( يجرى نحوه ) سيبونى عليه  
( وهو يدعى ذلك ) محدش يحوشنى أه . لازم أموته ..

**القط :** أيوه ياست عدلات أدى الميه حوشيهم الله يسترك  
( بغيظ ) الله يقطع اللي كان السبب ..

**فرغلى :** والله أخر مجدعة . ( لبعزق ) بس أنت مش أنت . أنا  
كنت فاكرك إنك بتخلص لكن بقى ..

**بعزق :** ما أنت شايف . الحارة عليا بس لو إيدى تطولها .  
أفرجكم عليها ..

**أمورة :** ياواد . وأنت هفية .. غيرش إنك صعبت عليا ..  
**بعزق :** ( يضحك بصوت عالى ) ها . ها . قلت ياواد . هو

الأخ يبقى أيه بقى  
**جلال :** ياجدع أنت أتلم . واتكل على الله وروح لخالك .

**عم سيد :** خلاص بقى وكفاية وانفد بجلدك واطلع من الشارع  
بسلام

**لوفة :** تعرف . أنا حاقطعه . أوعى . محدش يحوشنى .  
**أمورة :** خلاص ياابا . الواد ضعيف يموت فى أيدينا تبقى

مصيبة . ويحسبوه نفر علينا  
**عدلات :** اسم الله عليكى يا أختى . ياحنينة والله أنا فى

- خدمتك . بس أنت أشرى كده وشوفى حاعملك فيه آيه .  
تشكر يا قبط .
- أمورة : أنا رهن الإشارة . أشر أنت بس يا جميل .
- القبط : الله . الله . ماطولك ياروح . جرى آيه أنت راخر .
- أمورة : ما خلاص قلنا تشكر . لم العبارة .
- فرغلى : أهو كده يا أمورة أنت ست الحارة والشارع والحى كله  
ما فيش راجل زيك فى الحتة ( يقذف بها للجميع ) .
- جلال : خلاص يا فرغلى لم الموضوع وخلى كل واحد يروح لحاله .
- عم سيد : يا أخوانا ما لوش لزمة الكلام الكتير . خلاص لم  
حالك واتكل على الله يالله يا بنى الله يرضى عليك .
- بمعزق : ماشى بس برضه مسير الحى يتلاقى وساعتها  
كل واحد يعرف نفسه . أنا ماشى أه . بس راجع .  
( يخرج )
- أمورة : مع السلامه يا أخ . ها . ها . أوعى تتكعبيل فى غلة .  
بص قدامك ها . ها .. ( يضحكون ) .
- الشيخة بطة : تعالى ياخويا وروق دمك والنبي دانت تساوى عندى  
الدنيا كله ( لوفة )
- القبط : أمة . أمة . كلمية بقى يا أمة . كلمية هو . يللا يا  
أمة فرصة
- الرجل ١ : ( من القهوة ) يا أخى الزهر معكوس
- الرجل ٢ : استنى لما أشوف زهرى .
- الرجل ١ : الخانة مقفولة

الرجل ٢ : مش مشكلة نفك من فوق . يادومة غيرلى الحجر  
والولة لحسن دى مكتومة

الشيخة بطة : أيوة خلاص ياواد . حا أكلمه أسكت بقى خلاص  
سيبنى خلينى أروح له ( فى دلال ) أيوة . ياسى لوفة  
اسم الله عليك . ياخويا روق كده وأنت تبقى زى الفل  
لما تبقى رايق كده ويتضحك .

لوفـة : ياشيخـة . أنا حاوى . وأنت كوديا . طب تركب إزاي .

الشيخة بطة : يا أخويا رايد الك الخير والشغل معايا كله مكسب .  
وأنت أيدك خفية وسريع وجاهز . هـى هـى . ( بدلع )  
وسيد المعلمين . وأنا معاك . قلت أيه !!!

لوفـة : وبعدين . ياستى سيبنى فى حالى .

الشيخة بطة : ولاقبلين . خالك فى مصلحتك .

لوفـة : أنا مشغول مع أمورة دلوقت .

الشيخة بطة : يا أخويا أنت ظالمها معاك . البنت حلوة وكبرت ولازم  
تتجوز .. والقط أبنى رايدها .. واهو يبقى زيتنا فى  
دقيقنا .

أمـورة : ( مندهشة ) أنتى بتقولى أيه ياشابة .

الشيخة بطة : يابنتى القط رايدك .. وأنتى اتدورتى وبقيتى حلوة  
والقط أولى بيكى

الـقـط : أيوة يا أمة .. أنا أولى بيها ..

أمـورة : ها . ها . ها . وشویش يا حبايب واللى ماسمعش  
يسمع واللى ماعرفش يعرف وشویش ( انتبه الجميع

- لها ويا ويتأملونها .. ويندهش كل الحاضرين ) .. قال إيه  
الكوديا عاوزه تجوزنى للقسط يابنى روح أنتجوزلك فار  
( الجميع يضحك ) الاقولى إذا زنقك كلب تعمل إيه ..  
الشيخة بطة : بس .. جرى إيه .. هو ماحدش قادر يملك والا إيه ..  
لوفنة : خلاص .. كفاية كده يا أمورة ..  
جلال : لمى الدور يا أم القط .. ماتخلصنا يا عم لوفة ..  
أمورة : يخلص إيه ياسى جلال ..  
رجل : ( زبون القهوة ) شفت أنت أترنقت أزاي ..  
رجل ٢ : وماله أنا برضه قاطع عليك السكة  
رجل ١ : حا أزنقك تانى ..  
رجل ٢ : العبرة بالآخر ..  
الشيخة بطة : طيب وماله بقي سى جلال .. !! يعنى ماحدش مالى  
عينك خالص كده ...!!!  
أمورة : إنتى إيه حكايتك ..  
جلال : هو إحنا مش قد المقام وإلا إيه ..  
أمورة : أنت صديقى وابن حنتى ويس ..  
جلال : كلام غريب .. مش مفهوم ..  
الشيخة بطة : كلام غريب قوى .. أنتى ياختى طبيعية ..  
جلال : وأنا مش قادر أفهمه ..  
لوفنة : أنا ما أقدرش أفرض عليها أى حد أو أى حاجة ومش  
عارف أعمل معاها إيه ..  
عم سيد : يا أخى أتحرك كلمها لاغيها ..

- جلال :** يا عم سيد أنا قلت وعملت والباقي عليك ..
- الشيخة بطة :** وأنت يا لوفة .. أنت كمان راجل غريب يالهوى هي الدنيا جرى فيها آيه ..
- الراجل مدوخنى ..** وبتنه مدوخة الجدعان .. عجائب ..
- فرغلى :** ( يقترب ) الراجل ده مش طبيعى . ( يشير إلى أمورة ) والبت دى كمان غريبة ..
- جلال :** على كل حال كل شئ بالراحة ..
- الشيخة بطة :** ياسيدى الجماعة دول راكبههم أسياد .. أيوه أنا حا أعملهم زار .. البنت وأبوها .. ياسى جلال هاتلى قطرك وقطرها .. أه ياخويا ..
- الرجل ١ :** ( يلقي بالزهر ) دوش هاها .. ( يصفق )
- الرجل ٢ :** ( يلعب ) قفلت خلاص
- الرجل ١ :** استنى بقى لما ألعب أنا .. وأبقى افتحلك بمزاجى
- الرجل ٢ :** ماشية معاك حلاوة .. حاجة غريبة ..
- عدلات :** ( تدخل ) يسلم فمك يا شيخة بطة .. وبالذات هي ..
- الشيخة بطة :** أنا داخله أجيب العدة والقطر بتاعة والحريم
- لوفسة :** وليه مخها ضارب ..
- أمورة :** أسياد آيه وزار آيه ..
- لوفسة :** كلام فارغ
- عدلات :** أسكت ياراجل لحسن يؤذك أنت وبتنتك ..
- جلال :** كل شئ بالحناق إلا الجواز بالاتفاق .. وأنا عملت اللي على .. ولازم هي تشعر بالباقي ..

عدلات : يسلم فمك .. شفت ياخويا .. هما مش عاوزينك ..

أبعد عنهم ياخويا .. أن اهه .. أتفق معايا أنا ..

عم سيد : يا جلال أصبر كل شئ بأوان .. والأوان قرب قرب أوى وأن ..

( تدخل الشيخة بطة ونسائها ومعهن عدة الزار )

الشيخة بطة : هى .. هى .. رقيتك واسترئيتك ومن شرهم نجيتك ..

وبالزار والفرقة راعيتك .. وبدم الفراخ الحمر والديك

الأسمر حميتك ..

القط : ( يتراقص ) شيخ محضر يا شيخ محضر .. واللى

عليه عفريت يحضر ( يبدأ استعراض الزار ) ..

أمورة : ( تدور فى حالة ذهول ) ..

الشيخة بطة : وحجابك مكتوب .. وعليهم مقلوب وحدفوهم بالحصى

والطوب .. حى حى وأنت يا خيبة يابلية .. ياللى من

دون الرجال نيتك مش هية وخطوتك معدية وأنت

عدمان وصدمان وفى دماغك خرفان .. ويلعب الحاوى

ولهان ومحتاج لحجاب يتوبك من الحاوى والهباب ده

عشان أتجوزك .. وما تخرجش من الباب ( يستمر

الزار بعنف والجميع يدور فى قوة وتصاعد )

أمورة : بس .. بس

ياولية .. يامجنونة .. سيبينا فى حالنا

لوفة : تعالى .. يا أمورة .. تعالى

نهاية مشهد

( إظلام )

## الفصل الأول

### المشهد الثانى :

- شارع درب الجماميز .. يبدو الشارع كما هو بأهله  
وجلال وعم سيد فى مكانهما ودومة فى القهوة مع  
الزبائن وبائعة اليا نصيب وبائع العرقسوس وفرغلى ..  
أبوة جاي .. الشيشة حمى .. والقهوة زيادة ..  
دومة : والشاى ده يبقى على بياضة  
زبون : السحلب محوج يادومة ..  
بائع البطاطا : الفرن والع .. والولة زائدة .. والبطاطا معسلة قوى  
جلال : ( فى ضيق ) أنا مش عارف هى رفضانى ليه ..  
( يمر دومة ) الواد ده بيتصنت علينا فى الراححة  
والجاية ..  
بائع العرقسوس : المثلج .. شفا وخمير ياعرقسوس ..  
بمعزق : ( يدخل معه عدته ) توت .. توت .. سوس .. سوس ..  
فرغلى : تانى .. حانعيده .. وقعتك سودة  
دومة : هو حر سيبه لنصيبه ..

باتعة اليانصيب : سيبك .. سيبك .. مش حا يصيبك إلا نصيبك ..  
 بعزق : ( معه الطبال ) أراجوزى كونوزى .. توت . توت ..  
 جلال : أنت جيت تانى .. أنت باينك عاوز تتضرب ..  
 عم سيد : هو أنت ماكفكش اللي حصل المرة اللي فاتت .. يابنى  
 فضها سيرة واتكل على الله  
 بعزق : أنا جاي أخلص تارى .. بعد اللي حصل واللى  
 جralى ..  
 جلال : أتكلم أحسن لك لأن المرة دى بقى أنا اللي حا أقفلك  
 ياعرق سوس : سوس .. سوس .. توت .. توت .. وأنا جاي  
 بعزق : ومستعد للكل .. وليك وليها وكل الحارة أه ..  
 عم سيد : يابنى روح لحالك بالسلامة ..  
 بعزق : توت توت .. فين السفروطة المحقوقة .. هاها .. أهى  
 خافت واستخبت ..  
 أميرة : ( تخرج من الحارة بانفعال ) خافت أيه ياموكوس  
 وأنت قفاك معكوس .. وإن ماسكتش راح أدقك  
 وأبعزقك وأملك .. خد .. خد .. ( تضربه وتكتفه  
 وتضعه وسط الحلبة ويلتفت حوله الجهمور .. يقدم  
 استعراض الحاوى فى أداء رستيف ) جلا .. جلا ..  
 توت حاوى توت وتعال شوف البرغوت .. واللعب ع  
 الزبون وهو قاعد مربوط ومرهون .. وشوبش ..  
 ( تصفيق حاد ) وجلا . جلا .. فازوكة بازوكة ..



واللعبة ممسوكة والقافية مجبوكة والرخوة للبرغل لموها  
مسكوكة . وده برغل هفيه وادى الجراب .. ويلا أخرج  
يا زرياب ( يخرج ثعبان وتلفه حول رقبه بعزق )

بعزق : ياناس الحقونى .. دى حاتموتنى ..

عم سيد : خلاص يا أمورة ..

( يضحك ) سبيهولى يا أمورة .. ( ينسحب للخارج  
فرغلى وعدلات والقط )

لوففة : ( يحضر ) خلاص يا أمورة .. الواد حايفطس ..

بعزق : يا أهل الحتة .. خليكو شاهدين عليهم وأنا حا أورهم  
وأودهم للقسم ..

أمورة : أسكت قال بعزق .. وأنت متبعزق .. خد ( تضربه )

لوففة : كفاية كده يابنتى .. البرغل اللى فشلك حايفطس فى  
أيدك .. كفاية لمى السروح ويلا نروح

أمورة : ده برغل بجج وكان لازم يتلم عشان يبطل يتلامض  
وكمان مايجيش هنا تانى ( يدخل كمسطبل .. وعن  
بعد القط وفرغلى وعدلات ) ..

لوففة : ( فى ذعر شديد ) يلا .. يلا .. لمى السروح .. دى  
الحكومة فشلك .. يلا نفرقع ..

الكمسطبل : عندك أنت وهى وهو .. أيه ده .. أنت مكتفاه  
كدة ليه .. ( لبعزق ) وأييه اللى فى رقبتك ده ..  
( استعراض الشرطة )

أمورة : ( تفك الثعبان بسرعة ) مرحب . أبدا دحنا بنلعب

- معاه .. يعنى بروق مع الزباين .  
**الكمسطبل :** يللا بسرعة فكية ..  
**بعمزق :** الحمد لله . جيتم فى وقتكم .  
**لوفة :** ( فى ذعر ) إحنا بنلاعبه يعنى . عشان نزود الحوة .  
 يعنى . أه مش كده ( لبعزق )  
**الكمسطبل :** أيه ياخويا . حوة . قدامى أنت وهو وهى .. يللا  
 ياخويا ..  
**جلال :** خلاص ياخضرة . دول مع بعض ..  
**لوفة :** أبوة صح مع بعض ..  
 ماقلنا من الأول يابنى . قلنا لك روح لحالك عاجبك  
 كدة .  
**لوفة :** إلحقنا ياعم سيد . لم الموضوع .  
**أمورة :** جرى أيه يا ابا . أنت خايف من أيه . ولا يهملك ..  
**دومة :** وعندك الشاى بالحليب للحكومة ..  
**الكمسطبل :** لا يا خويا . مش عاوزين  
**عم سيد :** معلىش أشرب الشاى برضه وبعدين نروح كلنا معاكم .  
 سيد أوعى تسيبنى خليك معايا ( لبعزق ) إحنا كنا  
 بنلعب معاك . مش كدة ده إحنا بنحبك . وإحنا  
 صحاب هة ..  
**جلال :** الله هو أيه الحكاية ياعم سيد هو خايف كدة ليه ..  
 أتلم ياجدع أنت ( لبعزق )  
**الكمسطبل :** ( بعد شرب الشاى ) يللا يا أخوانا . يللا معانا .

- بعزق :** أيوة يللا بينا يا حضرة .
- أمورة :** ماتفرحش قوى كدة ( تهدده )
- لوفنة :** تعالى معانا ياعم سيد . وأنت يا جلال .
- دوممة :** وأنا حا أحصلكم .
- فرغلى :** عالم مفترية .. ماتخافيش الا بعينها ..
- عدلات :** هىء . هىء . يللا لما نشوف حاتعمل آيه . الله سى جلال . أنت رايح .. وأنت عليك بايه . من ده كله .  
( تدخل بطة )
- الشيخة بطة :** وماله يابنى الناس لبعضها برضه الحتة لازم تروح معاهم عاوزنى معاك ياخويا ( لبعزق ) مالوش لزمة يابنى ودول طيبين .. لم الموضوع .. أه
- لوفنة :** تشكرى يابطة .. رينا .. يستر ..
- الكمسطيل :** يلا ياخويا . بلاش عطلة ..
- جلال :** أنا جاي معاك يا أخ ( لبعزق ) عشان نلم الموضوع برضه .. يللا بينا ( يتحركون للخارج . زبائن القهوة ) ..
- يون ١ :** قفشتك
- يون ٢ :** جبستك ..
- ( نهاية المشهد )
- ( إظلام )

## الفصل الأول

### المشهد الثالث :

( قسم شرطة السيدة زينب حيث الضابط النبتجى  
ولوفة ويندق ويعزق وجلال وعم سيد والكمسطبل  
وجندى آخر )

الضابط : هم . عملالى فتوه ومكتفه الراجل ومعلقه فى رقبتـه  
التعبان . أنتى عارفه دى تعتبر أیه . وأیه عقوبتها .

لوفـة : ( فى رعب ) يا حـضرة الظابط إحنا ماقصدناش . دى  
الحكاية

الضابط : هس اسكت أنت . خلينا نشوف حكاية الأخ ده إيه ..  
الكمسطبل : يافندم أنا لما وصلت لقيتهم مكتفينه ومقعدينه وسط

الحلبة والناس حواليه وهو متكتف وخايف وحالته زى  
النيلة وكمان التعبان فى رقبتـه .. ويبطلعوا من قفاه  
مناديل ملونة . ومن تحت كتاكيت .

الضابط : الله . الله . وكمان كتاكيت . ومناديل ملونة . طب  
إيه كمان ..

الكسطل : والبنت دى .	
مورة : ( مقاطعة ) متقولش بنت . أه .	
لضابط : الله جرى أيه يابت .. وكمان بتردى .	
أمورة : الله هو أنا عملت أيه ..	
الضابط : الله . الحكاية اتقلبت . ويقت هى اللى بتسأل .	
جلال : يا حضرة الظابط . المسألة بسيطة ومكنش فيه أى خلاف ولا حاجة	
الضابط : طب البلاغ ده أيه .	
عم سيد : ده كيدى . يا حضرة الظابط ..	
لوفة : إحنا ناس فى حالنا يا حضرة الظابط أنا وبنتى والناس مش عاوزين يسبونا فى حالنا .	
أمورة : إحنا بس كنا بنلاغيه يابيه ..	
الضابط : أيه ياختى بأيه	
أمورة : بنلاغيه . يعنى بناخد وندى معاه . أه . بحسن نية .	
	يعنى . مش كده يا أخ .
لوفة : ده بيلعب معانا يابيه ..	
عم سيد : بيساعده بعض يعنى . مش كده برضه يابعزق	
	يابنى ..
جلال : طبعا . هو نفسه قال كدة .	
الكسطل : أنا ماشفتش غير أنه متكتف .	
لوفة : أيوة بس زى ماقلنا لك هناك بنلعب سوا عشان نزود	
	الحوه .

- الضابط : على كل حال . كله يتسجل فى المحضر . افتح يابنى المحضر .
- عم سيد : بنقول يعنى ياحضرة الضابط نسويها ودى واهو الراجل معانا ومش متأخر
- الضابط : طيب والبلاغ المقدم لنا باعتداء لوفة والمدعو بندق على الأراجوز بعزق . هة أساميكم أيه بالكامل .
- أمورة : أمورة لوفة .. وأبويا لوفة لوفة .
- الضابط : خليه هو يتكلم .
- لوفة : تمام يافتندم .. لوفة لوفة .
- الضابط : أسماء غريبة قوى .. طيب ومعاك بطاقة .
- لوفة : ( يرتبك ) بس فى البيت يابيه ..
- عم سيد : أنا أضمنه يابيه . ومعايا الأخ جلال كمان .
- الضابط : هة . طيب بتشتغل أيه ..
- لوفة : حاوى أنا وبنتى يابيه .
- أمورة : أه حواة يابيه . تحب تشوف .
- الضابط : استنى أنتى . هة . وضريتوه ليه .
- لوفة : لا يابيه . إحنا ماضرينهوش .
- بعزق : تسمح لى يابيه .
- الضابط : فيه أيه . عاوز تقول أيه .
- بعزق : أنا يا بيه .. كنت بالعب معاهم .
- الضابط : يعنى أيه . فهمنى ياسيدى .
- بعزق : إحنا أصحاب يابيه وأنا بتاع أراجوز وهما بتوع

حاوى . وأنا عجبني لعب الحاوى . بقيت ألعب  
معاهم . واتعلم اللعبة وأساعدهم يعنى كدة ..  
جدعنة والقط رزقى برضه كده جدعنة .. دى جدعة  
قوى يابيه ..

**الضابط :** أبوة ياسيدى وكانت حاطة التعبان على رقبتك  
ليه بقى .

**بعزق :** ده لزوم اللعب يابيه .. إنها تكتفنى كدة يعنى . لكن  
تكتفية أى كلام . أه كدة يابيه . ويعدين التعبان  
مطرم .. يعنى مفيش خوف منه . والناس مبسوسة  
وبالطريقة دى نلم الحوه كويس .

**الضباط :** حوه آيه . ؟

**أمورة :** يعنى الأبيح يابيه . الفلوس أه .. ما هو الواد ده  
مجدع ( على بعزق )

**الضابط :** استنى أنت . ويعدين يابعزق .

**بعزق :** يابيه كله لعب فى لعب . يعنى أكل عيش . استزراق  
يعنى .

**أمورة :** تمام يابيه .

**الضابط :** قلتلك اسكتى . وإلا .

**لوفنة :** خلاص يابيه . إحنا تحت أمرك .

**عم سيد :** أهو ذى ما قالك يابيه .

**الضابط :** والبلاغ .. ؟

**جلال :** كيدى ياسعادة البيه .

- أمورة :** أيوة كيدى . عاوزين يوقعونا فى بعض .
- الضابط :** هه . ناوية على مشكل تانية .
- أمورة :** لا يابيه . طب هوريلك لعبة على الطائر كده يابيه .
- بص . جلا . جلا . فزوكة بزوكة .. ودلوقت حاطل من جيب صاحبنا ده كتاكيت . بص يابيه . أدى جيوبه فاضية . أهم ( تلعب مع بعزق ) . تمام يابيه .
- الضابط :** تمام .. وبعدين ؟
- أمورة :** واهه . دخل جيوبك يابعزق . ( يدخل جيوبه ) . أنا أيديا أهم فاضيين .
- تمام يابيه . ؟
- الضابط :** تمام ..
- أمورة :** جلا . جلا . فازوكة . بازوكة . ( تضع يدها فى جيب بعزق وتخرج كتكوتين ) ( يندهش الضابط ) شفت يابيه . أيه رأيك .
- الضابط :** عفارم علىكى .
- لوفة :** ( يلتقط أنفاسه ) شفت يابيه إحنا فى الخدمة ياسعاد البيه . نمشى بقى .
- الضابط :** خلاص يا أبنى أقفل المحضر . وخليه صلح وخلصنا . ( لبعزق ) هه . عندك أى كلام .
- بعزق :** لا يا أفندم صلح يابيه . إحنا مع بعض ياسعادة البيه . وأهم الشهود ياسعادة البيه .
- الضابط :** خلاص .. يلا . مع السلامة .



**الجميع :** متشكرين يا بيه . سلامو عليكم .  
**الضابط :** ( لعم سيد ) على ضمانتك يا عم سيد ..  
 رقبتى يا بيه ..  
 إحنا فى الخدمة . وعلى ضمانتنا يافندم .  
**عزق :** سلامو عليكم .  
 ( يطلق زغرودة أراجوز )  
 ( نهاية المشهد )  
 إظلام

## الفصل الأول

### المشهد الرابع :

( منزل لوفة .. يوجه لوفة الحديث لدومة )

**دومة :** والواد بعزق كان قاعد مع أمورة وعم سيد وجلال بعيد  
ببواقب .. وعدلات وأمورة مسكوا فى بعض وأنا  
حببت أجرى أقولك ..

**لوفة :** طب وسمعت أیه ..

**دومة :** كتير .. قال أیه .. الواد الأراجوز عاوز يتعلم من  
أمورة شغل الحاوى .... ويلعبوا سوا ..

**لوفة :** هة .. ببقول أیه .. أیه كمان ..

**دومة :** والواد عاوز يسكن هنا ..

**لوفة :** وجلال .. وسيد ..

**دومة :** جلال حايطق من الغيظ .. وعم سيد مرحب بيه وأمورة  
متحمسة قوى ..

**لوفة :** هو إحنا ناقصين .. له حق جلال ..

**دومة :** والواد كدة شكله عينه فيها ..

- لوففة :** هو أنا خلصت من أشكال جلال .. لما يطلعلى ده راخر  
 با أقولك أيه ركز معاهم
- دومفة :** لا ماهو أنا مركز معاهم قوى ..
- لوففة :** ( يفكر ) أسمع روح أنت ابعثلى بطة .. والقط  
 وعدلات .. هما دوول الللى ممكن يساعدونا أه  
 يساعدونا ويخلصونا من الجدع ده .
- دومفة :** طيب إزاي .
- لوففة :** هو ده وقته أنت شايف ده ديتة مصيبة .
- دومفة :** يعنى أنت شايف كدة ..
- لوففة :** أيوة الشيخة بطة ونسوانها .. يلا ماتضيعش وقت  
 روح ابعثهم وتعال بس متخليش حد يحس بيك .  
 بسرعة .
- دومفة :** أهو .. ( يخرج سريعا )
- لوففة :** قال ياقاعدين يكفيكم شر الجايين . هو إحنا ناقصين  
 كمان أراجوز ومشاكل وقسم ويلاولى ( الباب يدق )  
 ( يتجه للباب ويفتح تدخل الشيخة بطة والقط )
- الشيخة بطة :** مساء الخير ياخويا . أدخل ياقط . واسمع عمك لوفة ..
- لوففة :** أهلا ياشيخة . أدخل ياقط تعال مش وقته . المهم أنا  
 عاوزك .
- الشيخة بطة :** القط تحت أمرك ياخويا . وأم القط كمان . هو أنت  
 لوحذك والا إيه . ( تنظر حولها ) آمال اسم الله عليها  
 فين .

- لوففة :** دلوقت أقولك . أقعدوا .
- القط :** ( يجلس ) عنينا ليك ياعم لوففة . ( الباب يطرق  
يفتح لوففة تدخل عدلات )
- عدلات :** مساء الخير ياعم لوففة . خير ياخويا . يوه . دا الحبايب  
كلهم هنا . عاجبك كدة بنتك .
- لوففة :** خشى يا عدلات عاوزك . معلش حقك عليا .  
( يتجهان للجلوس )
- دومة :** الحمد لله محدش شافنى . وأنا جاى . بأقولك أيه .  
القعدة منصوبة والكلام على ودنه .
- لوففة :** عظيم . نتكلم بقى .
- الشيخة بطة :** خير ياخويا فيه أيه .
- لوففة :** الواد الأرجوز اللي طلعلنا فى البخت .
- عدلات :** قطيعة . أهم قاعدين محلقين على بعض .
- الشيخة بطة :** ماله راخر .
- القط :** دانا نفسى أقطع زمارة رقبتة .
- لوففة :** حلو هو ده . إحنا عايزين نطقشه من الحى . هو أحنا  
لسة خلصنا من جلال لما يطلعلنا العفريت ده .
- عدلات :** لا . لاياسى لوففة . مالكش حق سى جلال ياخويا .  
سببىهولى بس أنت وأنا أولى بيه . بس خليها تبعد  
عنه وبلاش حكاية الصورة دى ( تغمز )
- لوففة :** ياستى قرقرشية ياريت تخلصينا منه ويبعد هو راخر .  
هو أنا ناقص جلال ويعزق كمان .. المفروض جلال

يخلصنا منه .

الشيخة بطة : خلاص ياخويا . أنا فى الخدمة . نرمى بلاوينا عليه .  
هى شغلانة .

القط : تحب نسرقه النحاس .

عدلات : يوه ياقط . يخيبك . والنبي دمك خفيف .

الشيخة بطة : الحريم عندى كتير . والبلاوى كتير ونفسكه نزنه علقه  
حريمى تتوبه ولا يهكم قولى تحب يبات فى القسم ..

لوفة : لا . كفاية ينعرب ويتكل على الله هو كان شهيم  
معانا . وإحنا برضه لازم نكرمه بنفس الطريقة .  
وكمات عشان نبعد عن الجماعة دول .

عدلات : قصدك أيه مايدافعوش عنه .

لوفة : أبوة يعنى يتورط فى معاكسة واحدة فى الأول .

عدلات : ( تضحك ) وماله . دى سهلة .

القط : وأنا وجلال والرجالة على القهوة ودومة معانا ونقوم  
على طول والضرب يشتغل لحد ماتتوبه ونظلمه برة  
الحقة . وننقل عليه الشارع .

لوفة : تمام المهم ده يتم فى السر وبأسرع مايمكن .

دومة : أنا جاهز على الخط ودانى جاهزة .. وح أبلغ أستاذ  
جلال ..

لوفة : ياللا ياخويا من غير مانضيع وقت . دلوقت اتكلوا  
على الله وأنا مستنى دومة

دومة : وأنا أول الشغل مايدأ حابلقك على طول . بس تكون

جاهز تحضرها من أولها

الشيخة بطة : يللا بينا ياقط وأنت يادومة فتناك بالعافية يا خويا .

عدلات : خدينى معاكى بالمرّة . ( يتحركون للخروج يفاجئهم عم

سيد عند الباب حيث يصابون بارتباك ويدرك هو ما يحدث ) .

عم سيد : الله ده الحبايب كلهم هنا . خليك يا جماعة . هو أنا

جيت قومتمكم

الشيخة بطة : أبدا ياخويا . اسم الله عليك وإحنا كنا خارجين .

عم سيد : والا إذا حضرت الشياطين .

الشيخة بطة : اسم الله على مقامك . دانت بركة الحى كله يا عم سيد .

عم سيد : الله يكرمك . يا أم القبط .

عدلات : ( تضحك ) يوه .

القبط : وماله القبط يا عم سيد .

عم سيد : بركة يابنى . بركة . كلك بركة . حتى أسأل أمك .

الشيخة بطة : يباركلى فيك ياخويا . أقعد بالعافية .

عم سيد : لوفة . أنت ناوى على إيه .

لوفسة : فى إيه .

عم سيد : ماتلفش وتدور . أيه اللى جمع دول عندك ومعاك مش

هما دول اللى راحو القسم وبلغوا .

لوفسة : أبدا . بطة جت تزورنى . هى وعدلات والقبط . والواد

دومة كان جايبلى شوية حاجات كدة .

عم سيد : مضبوط . حتى بالأمانة الاجتماع كان مهم . ومغلق .

- لوفة :** أبدا
- عم سيد :** كان باين عليك . ويعدين أنا فاهم . وأنت فاهم .
- لوفة :** ياسيدى أنا مش عاوز مشاكل .. ووجع دماغ والواد دة أبتدا بالمشاكل من ساعة حكاية القسم دى . وأنت عارف المسألة دى بالنسبة لى وأمورة بقت معاه على طول . وأنا عقلى طار . وأنت السبب فى ده كله .
- عم سيد :** كله بالهداوة والأصول . ويعدين أنت زعلان من أیه . ده غير جلال
- لوفة :** يعنى الواحد يطلع من حفرة ينزل فى دحديرة .. طيب برضه جلال أرحم وأهو ابن الحتة .  
( يدخل جلال فى نفس اللحظة )
- جلال :** صح يا عم لوفة أنا أولى وأحق بيها .. لأنها بنت حتى .. وأنا باحبها فعلا وأنت عارف ..
- عم سيد :** ياخويا جتك خيبة .. ما أنت .. أهه .. بقالك قد أیه .. عملت حاجة .. ثم هى مش بتحبك ..
- لوفة :** ما هو أنا مش بإيدى حاجة . طيب أعمل أیه .
- جلال :** يا عم سيد مش كده .. هى برضه عايزة تاخذ وقتها . ده حب وجواز ..
- عم سيد :** خلاص .. قول لنفسك .. الواد ده من ساعة .. مادخل الحارة وهو عاجبها حتى وهى بتضربه ..
- لوفة :** يادى المصيبة .. أراجوز .. تحب أراجوز .
- إحنا لازم نخلص منه بسرعة .. أه ..

عم سيد : يالوفة اتقى الله .. مش كدة .. الواد طلع جدع فى القسم ..

جلال : خلاص يمشى من غير مشاكل .. وبالسلامة لحسن أنا ناويله على نية سودة ..

عم سيد : هو أنت والا لوفة .. والا الشبخة بطة .. هى أيه الحكاية

لوفة : المهم يمشى وخلاص ..

جلال : أنا رايح أقطع خبرة وأخلص عليه .. ( يخرج مندفعاً )

لوفة : ( يلاحقه ) أسمع هو حاينضرب حاينضرب أصبر عليه ..

( نهاية مشهد )

إظلام



## الفصل الأول

### المشهد الخامس :

( درب الجماميز حيث تعلق الكهرياء فى الشارع  
ودكان فرغلى المزين . أهل الشارع والشيخة بطة  
ومجموعتها ومزيكة حسب الله . يركب طفل مختون  
على حصان أبيض ومعه أهله وحشد يصفق ويغنى )  
استعراض

( زفة المطاهر )

دقوا المزاهر .. لزفة المطاهر ..  
يا أم المطاهر .. زغرطى وقولى ..  
الملح رشولى .. والطبل وقولى ..  
يا عريسنا يازينا .. والخير ملا أيدينا ..  
ولفرحتك جينا .. وليك وغنينا ..  
( يزغردون ويرددون الكلام . فرغلى والقبط والشيخة  
بطة وعدلات وجلال وبعزق وعم سيد ولوفة ودومة  
والقهوة . والزبائن والشارع كما هو بشكل عام )

- فرغلى :** ( يضحك ويحدث لوفة ) حمد الله ع السلامة .  
وعقبالك بالوفة
- لوفة :** كله مردود . تشكر ياخويا .. رايح تبلغ هة .. دلوقت تشوف ..
- فرغلى :** ياعم وأنا مالى . خلينى فى حالى . الله يسهلك .  
وسهلهم ..
- دومة :** ماهو واقع واقع . أه .
- فرغلى :** هومين .
- جلال :** روميو .. أراجوز زمانه .. هاها ..
- ( دومة على القهوة والقط ولوفة والشيخة بطة وعدلات فى موقف آخر من طرف الشارع عن بعد )
- دومة :** أه ..... هو فاكر نفسه أیه ..
- القـط :** دلوقت يشوف وكله ع المكشوف .
- لوفة :** بس لو يجى لوحده .
- بطة :** مايهمكش . هى هى . حانصطاده .
- ( يتحرك يعزق مع عم سيد فى منتصف المسرح .  
تصطدم به سيدة وتشتبك معه )
- السيدة :** ( بانفعال ) مش تفتح يا أعمى . جتك البلا وانت عامل كدة زى الأراجوز ..
- بعزق :** هو أیه اللى حصل يا أم قويق .
- السيدة :** ( يزداد انفعالها ) نعم ياخويا . لقح بلاويك علينا واستعبط . وأعمل نفسك مش فاهم وإيدك دى ،

قطع إيدك . ياخيال المآتة . ياقليل الحيا ..  
مش عيب تمد إيدك كدة . إيه ماعندكش أم ولا أخت .  
وكمان فى وسط الشارع ياعينك .. ياغبائرك يا أخى ..

عم سيد : فية إيه ياست إيه اللي حصل  
الست : نعم ياخويا وأنت كمان . تكونش معاه .. عيب عليك  
ياراجل وعلى سنك إيه ماشفتوش عمل إيه .. أما  
بجح وقليل الأدب والنبى ما أنا سيباه . يالهوى  
يالهوى . الراجل لقح جتته عليا .. إيه .. مفيش  
رجالة . فين أهل الشهامة والمجدعة . فين النخوة .  
يالهوى . يالهوى ( تتحرك الحريم والجميع تمسك  
السيدة بعزق الحريم حوله . تقف أمورة وتلحق به فى  
الوسط والباقي يتابع عن بعد )

أمورة : نسوان قليلة الحيا  
عم سيد : فعلا  
السيدة : الراجل البجح عمال يشتم  
بعزق : حاعاكس فيكى وأنتى تقولى للغراب قوم . وأنا أقعد  
مطرحك .

السيدة : ( تصرخ ) والنبى لأوريك . وأنت رخرة ( أمورة )  
حكايتك إيه

عم سيد : ولية قليلة الحيا .  
السيدة : والنبى ما أنا سيباه إلا فى القسم ده مسكنى . أيوة .  
والنسوان أهم شاهدين راجل ماعندوش دم ولاخشا .

- فرغلى :** يا عينى . واده شغل مضبوط قوى وترتيب معلم فهلوى  
**الشيخة بطة :** جرى أيه ياسماوى . ماتسكت وتخليك فى حالك .  
 أنت عاوز جنازة وتشيع فيها لطم . مش كدة .
- جلال :** الواد ده لازم ينطرد من هنا خالص .. ده ماعندوش دم  
 ولاخشا .
- الرجل ١ القط :** شرف الحتة . هو إحنا ماعندناش دم والا إيه .  
**رجل ٢ :** مش ممكن نسيبه كدة  
**السيدة ٢ :** أه . ماهو إن طلع العيب من أهل العيب يبقى مش  
 عيب ..
- جلال :** مستنى أيه يا أخى ( بعزق ) ماتمشى .  
**سيدة ١ :** يالهوى بيقولى . مرضعة قلوون .. يالهوى  
**عم سيد :** خلاص ياستى حقك عليا أنا .. وأنا حاتصرف معاه .  
 وأجيليك حقك وأنا ولوفة حانضربه . ونخليه يلبوس  
 رأسك كمان .
- السيدة :** يالهوى . يالهوى . أه . إن كان كدة معلش .  
**بعزق :** لا لحد كدة ولا . نروح القسم أرحم  
**السيدة :** يالهوى . شايف بيقول أيه .  
**أمسورة :** ( تضحك ) فى الحقيقة هو على حق .  
**الشيخة بطة :** خلاص بقى يا أختى حقك عليا أنا وهو حايعتذر لك  
 ويسيب الحارة ويمشى وميجيش هنا تانى . مش كدة .  
**بعزق :** خلاص حقك عليا . بس بعيد لبعيد وزى ما قالت  
 الشيخة بطة . حاسيب الشارع .. لأ السيدة زينب

- بحالها . وما جيش هنا تانى . بس خليكى بعيد  
**السيدة :** يالهوى يانى . مش عاوز يقرب ويعتذر . بالقرب منى .  
**لوفة :** عداك العيب يابنى . أنت كده راجل محترم .  
**أمورة :** ( تندفع ) شوفوا بقى . كده الدور انكشف وهو مش  
 حايشى من هنا . واللى حايقربله على جتتى . أه .  
**جلال :** وأنا مع بندق . واللى عاوز حاجة يقولنا .. والراجل  
 حايشى بالزوق  
**لوفة :** خلاص يا أستاذ جلال . سيب الجدع يروح لحاله .  
 وأنت يابندق مالوش لزمة المشاكل . وسيبوا بعزق  
 يخرج من الشارع وخلاص يادار مادخلك شر .  
**عم سيد :** لا . هو ساكن عندى . وأنا حا احميه .  
**لوفة :** إيه . ياسيد جراك إيه .  
**عم سيد :** أيوه .  
**أمورة :** ينصر دينك .. أهو كده .  
**جلال :** خلاص ياعم سيد .. الراجل ماشى وخلاص ..  
**بائع البطاطا :** ياللى الفرن زادت وولعت قوى .. ياباطا .. طا ..  
**دومة :** الجدع ده عامل مشاكل من ساعة ماجه .. إيه يا أخى  
 ماتشى وتروح لخالك .  
**أمورة :** أخرس يا واد قطع لسانك .  
**جلال :** سيبه يمشى يا أمورة .. وخلينا فى حالنا .. كفاية كدة .  
**أمورة :** ( بمعنى ) أنا عارفة إنك مش طايقه ..  
 لكن بقى أنا عاوزاه .. أه .. وأنت مش وصى على ..

- لوفة :** أمورة .. مش كده يابنتى .. بلاش مشاكل ..
- عدلات :** جرى إيه يا أختى .. سى جلال عنده اللي مكفيه ..
- وزيادة ..
- تعال ياسى جلال .
- جلال :** ماشى ياأمورة .. استنى ياعدلات .. مش كده ..
- اسكتى
- عدلات :** يوه كسفتنى ياسى جلال .. الله يسامحك ..
- لوفة :** لا يابنتى جلال جدع وابن حلال .
- أمورة :** أيوه بابا .. ماقلناش حاجة .. بس
- جلال :** ماشى يا أمورة .. بس الواد ده مش حايقعد فى الحتة برضه
- دومة :** أه .. مش حانسببه .. وعندك اتنين سماوى فى حجرين وزود النار عليهم حبتين .
- ( تدخل صحفية ومعها مصور تسأل عن الحاوى الذى يقطن هنا )
- الصحفية :** سلامو عليكم .. ياترى فى الحاوى اللي ساكن هنا ..
- دومة :** أهه ياهانم .. عم لوفة .. أجدع حاوى فى الدنيا كلها .
- الصحفية :** أهلا يا عم لوفة
- لوفة :** أهلا وسهلا يابنتى .. أتفضلى ( يجلس ويجلسها بجانبه على القهوة )
- الصحفية :** أنا صحفية من مجلة ( ظل ونور ) وده الأستاذ المصور .

- لوفة :** خير يابنتى فى الخدمة .
- الصحفية :** أنا بأعمل تحقيق صحفى عن الفنون القديمة اللى انقرضت ..
- وطبعا أجملها وأصلها فن الحاوى .
- لوفة :** فعلا يابنتى الحاوى انقرض ومابقاش .. فاضل منهم غير كام واحد .. يعنى معدودين على الصواب ..
- الصحفية :** وأنته بقالك كام سنة حاوى ياعم لوفة .
- لوفة :** أنا حاوى من أكثر من ٤٠ سنة .
- الصحفية :** وبتشتغل لوحك .
- لوفة :** لا أنا حاليا معايا أمورة بنتى الوحيدة . وهى بتساعدنى وتلعب معايا
- الصحفية :** ممكن تقدم لنا بعض الألعاب وتحكيلنا عن تاريخك مع اللعبة إمتى اتعلمتها وتاريخ حياتك .. ( للمصور )
- حاول تاخذ له كام صورة يا أستاذ لمعى ..
- المصور :** حاضر ( يلتقط مجموعة من الصور للوفة فى أوضاع مختلفة )
- بمزق :** ( يقترب من الصحفية ) وأنا بقى الأراجوز .. وراخر قرب ينقرض وهو من أجمل الفنون زى مانتى شايقة ..
- لوفة :** ( يشخط فيه ) أمشى ياغتت الست جاية عشانى يلا روح فى داهية . ( يضحكون زبائن القهوة والجميع )
- جلال :** خلاص يا أخ بالسلامة بقى ..

أمورة : جلال خليك فى حالك .

جلال : كده .. طيب . يلا بقى بدل متنضرب تانى .  
( لبعزق )

بعزق : ماشى .. أنا ماشى دلوقت يا أمورة . وراجع تانى  
وثالث .. بس لازم نقصر الشر دلوقت .. سلام ( يتجه  
خارج الشارع )

الصحفية : جميل يا عم لوفة الموضوع جميل قوى وإن شاء الله  
حايנزل الموضوع على طول العدد الجاى .. خلى  
بالك .. وأنت يا أمورة يا أجمل حاوى عندنا ..

أمورة : شكرا .. مع السلامة

( تخرج الصحفية والمصور )

نهاية مشهد

( إظلام )



## الفصل الثانى

### المشهد الأول :

- ( حى ضرب الجماميز كما هو وجميع أهل الشارع كما  
هم يجلس جلال وعم سيد ولوفة ودومة فى القهوة )  
عم سيد : ( يفتح المجلة ويتصفحها ) .. لوفة .. ( بصوت عال )  
لوفة .. صورتك وكلامك أهم فى المجلة ..  
جلال : ( يأخذ المجلة ينظر فيها ) تمام يا عم لوفة ..  
بقيت مشهور يا عم .. تعال شوف المجلة .  
لوفة : ( يقف مكانه ) ورنى كده .. الصور واضحة .  
دومة : ( يجرى يأخذ المجلة بسرعة ويعود بها إلى لوفة وهو  
يلوح بالصورة فى الشارع ) .. بص شوف عم لوفة .  
أعظم حاوى .  
لوفة : ( يأخذ منه المجلة ) هات يادومة ورنى .. ( ينظر )  
فعلا الصورة واضحة وحلوة .. الكلام بالحروف الكبيرة  
وبعدين الباقي مكتوب ( مندهشا ) ياه على صفحتين  
بحالهم ..

- عم سيد : يلا ياعم هنيا لك .. شهرة عظيمة ..
- جلال : وصورة أمورة كمان على جنب .. بس اللي أنا راسمها أحسن .
- أمورة : ( تدخل ) ياه .. الله .. ورننى يا ابا .. الله .
- عدلات : ( تدخل عدلات والشيخة بطة . ويتابع فرغلى عن بعد ويجلس القط على القهوة معه مجلة أخرى
- عدلات : ( تزغرد ) مبروك ياعم لوفة .. هنيا لك يا شيخة بطة يلا بقى خلىنا نفرح ..
- الشيخة بطة : من بقك لباب السما . ربنا يهديه هو وينته .. وهما عمليين زى الشريك المخالف .
- فرغلى : أيوه . ناس هايسة .. وناس لايسة .
- لوفة : أه .. قاسم السماوى اشتغل ..
- فرغلى : ياعم لا قاسم ولا حاجة .. الله يسهلك
- عم سيد : ( يضحك ) المهم فعلا شئ يفرح .. صورة المكتبة بتاعتنى باينة واليا فطة كمان . آمال إيه .. درب الجماميز . أهه .. منور
- جلال : درب الجماميز بأهله وناسه الحلوين ..
- عدلات : آمال حلوين بيك يا أخويا .. ربنا يهديك ليا يا أخويا ..
- فرغلى : أنتنى اللي لازم تخلصى عليه .. وسرعة ..
- لوفة : ( يمسك المجلة يقلب فى الصفحات يفاجأ بصورة وخبر مكتوب يجعله مندهشا وينفعل بشكل غير

عادى ) .. آيه ده ياه للدرجة دى .. ياساثر .. رينا  
يكفيننا شره .

أمورة : فيه آيه يا ابا .. هو إيه ده اللي يكفيننا شره ..

لوفة : مافيش .. ماتخديش فى بالك .

أمورة : لا يا ابا .. أنت شوفت حاجة غريبة هنا فى المجلة .

خضتكَ وزعلتكَ .

لوفة : لا يا بنتى .. ماتخديش فى بالك . ده أنا افتركت

فجاءة .. حاجة كدة .

عم سيد : فيه إيه يالوفة .. إيه يا أمورة ..

أمورة : مش عارفة يا عم سيد .. لكن أبويا اتغير

مرة واحدة كده .. مش عارفة ..

لوفة : أطمئنى يا بنتى .. والمفروض تفرحى بالكلام الجميل

والصور الحلوة دى ( يدخل بعزق فى نفس التوقيت

وهو محمل عدد من المجلة وينادى )

بعزق : أراجوزى .. الحاوى .. ولوفة الغاوى ملك الحاوى ..

أمورة .. مورة الحلوة الغندورة ..

أمورة : ( وهى غير طبيعية ) أهلا يا بعزق شفت المجلة .

بعزق : وعمال ألف بيها فى الشوارع . وأغنى وفرحان قوى

بيكم ..

لوفة : خلاص ياسيدى متشكرين .. فارقنا بقى ..

جلال : يا جدع إنت .. أنا مش قتللك ماتجيش هنا تانى ..

إنته إيه .. غاوى تنضرب .

- بـعـزق :** اسمع .. خليك فى حالك ..
- جـلـال :** ( ينفع ) يعنى إيه .. اسمع يا جدد أنت ..
- أـمـورة :** جرى إيه .. كفاية خناق بقى . تعبنا من الخناق .  
كفاية . كفاية .
- بـعـزق :** أنا حا اسكت عشانك .
- لـوفـة :** إنته تمشى عشان يسكت ويبطل الخناق  
إنت من يومك وش مشاكل
- عم سيد :** هدى نفسك .. يا جماعة اهدوا . مش وقته . اسكت  
يا جلال دلوقت مش كده ..
- جـلـال :** حاضر يا عم سيد .. ولو إنك يعنى ..
- عـدـلات :** خليك معايا ياخويا . استنى حا أجبلك كركديه عشان  
يروق دمك ياواد يادومة
- دـومـة :** أيوه جاى .. عندك الكركديه .. للروقان  
وللأستاذ الفنان .. وعم لوفة كمان ..
- بـعـزق :** خليه على حسابى أنا يادومة للجميع
- لـوفـة :** ( بإنفعال شديد ) مش عاوزين منك حاجة .. خلاص  
يا أخى . خلاص .. خلاص .. ( يدخل الشارع أربعة  
رجال أشداء يسألون على لوفة )
- رجـل ١ :** سلاموا عليكم .. فین عم لوفة ..
- دـومـة :** أهه .. ملك الحواة .. أه .. أه صورته .. أهه ..  
إنتم جايين عشان عاوزينه أه .. ماهو يبقى مشهور ..  
أيوه جاى .

- رجل ٢ : هو اللى هناك ده . فعلا شكل الصورة اللى فى  
المجلة .
- رجل ٣ : خلاص .. مانضيعش وقت .. ( يتجه له هو والرجال  
الأربعة ويحيطيون به )
- عم سيد : ورحمة الله .. خير .
- رجل ١ : عاوزين عم لوفة ..
- لوفة : أيوه ياسيدى أنا أهه .. إنتم إيه ..
- دومة : عاملين زى المباحث .. تشرخوا حاجة ..
- رجل ٢ : مش عاوزين حاجة .. خليك فى حالك ..
- بعزق : يعنى عاوزين إيه . الرجل أهه قدامكم .. قولوا  
عازوين أيه ..
- رجل ٣ : عاوزينه هو .. اتفضل معانا ياعم لوفة ..
- لوفة : فين ياسيدى .
- رجل ٤ : تعال معانا وإنت تعرف ..
- رجل ١ : يلا .. مافيش وقت ..
- أمورة : الله فيه إيه ياجدع أنت وهو  
عاوزينه فين .. عاوزين إيه ..
- رجل ٢ : خليكى فى حالك انتى .. يلا مافيش وقت ..
- رجل ١ : أظن إنت سمعت قلنا إيه .. يلا معانا ..
- لوفة : يعنى إيه .. هو بالعافية ..
- رجل ٢ : أيوه بالذوق فى الأول .. وبعدين فيه طريقة ثانية ..
- رجل ١ : عم لوفة عاقل .. يلا من غير مشاكل يالوفة ..

- رجل ٣ : التعليمات كده .. ولازم تيجى معنا
- رجل ٤ : وفورا وما تضيعش وقتك ووقتنا ..
- بعزق : هو إيه ...
- ( يقف ويشوح فى وجههم ) يواجهه رجل واحد بقوة .
- ( حتى يسكت بعزق )
- عم سيد : المسألة بالعقل .. يعنى يروح .. معاكم فين ..
- الرجل ١ : اطمئنوا هو مطلوب فى مقابلة . وماتخافش مافيش حاجة تخوف ..
- الرجل ٣ : بس إحنا بنفذ تعليمات ..
- لوفة : مقابلة مين . يعنى مين اللى باعتكم ..
- الرجل ٤ : لا .. هناك حاتعرف ..
- الرجل ١ : إحنا .. مانتكلمش فى حاجة ..
- دومة : جرى إيه يا أخوانا .. هى الحكاية سايبه إيه ياجدعان ( يستغرب أهل الحى )
- الرجل ٢ : مافيش داعى للمسائل دى .. دى مقابلة عادية ..
- أمورة : خلاص نروح معاكم ..
- الرجل ١ : للأسف مطلوب لوحده ..
- الرجل ٣ : وإحنا مسئولين نجيبه تانى لحد هنا ..
- لوفة : خلاص يا اخوانا أنا جاى معاكم ..
- أبا : أمورة :
- لوفة : ماتخافيش يابنتى .. العمر واحد والرب واحد .. مهما كان ماتخافوش ياجماعة ..

- الرجل ١ : عين العقل يا عم لوفة ..
- الرجل ٢ : أطمئنوا يا جماعة .. ( يحيطون به من كل جانب )
- الرجل ٣ : يلا يا جماعة ..
- ( يتحركون تجاه الشارع )
- أمورة : ( تصرخ ) ابا .. خدنى معاك .
- بعزق : ماتخافيش .. إحنا معاكى .. ومش حانسبيه ..
- لوفة : ماتخافيش .. خلو بالكم منها .. أنا راجع إن شاء الله
- أمورة : ماتغبش يا ابا .. أنا مستنياك ..
- لوفة : يلا يا جماعة .. سلاموا عليكم
- ( يتحركون تجاه الشارع )
- أمورة : ابا .. ابا .. ( تصرخ )
- بعزق : أمورة .. مش كده .. ( تجرى خلف أبيها )
- ( يمسكون بيها )

نهاية مشهد

( إظلام )

## الفصل الثانى

### المشهد الثانى :

حجرة مكتب فخمة الأثاث .. مما يدل على ثراء صاحبها .  
بها صالون جلد شيك ، ومكتب ومكتبه ، تليفونات  
وأباجورات وطاولات وثلاجه صغيرة .  
الدهشورى صاحب المكتب يجلس إلى مكتبه . لوفه  
يقف وسط الحجرة وحوله الرجال الأربعة فى مواجهة  
الدهشورى ومعهم المجله . الدهشورى يمسك بنسخة  
أخرى من المجله فى يده )

الرجل ١ : تمام ياباشا .. المذكور وصل ..

الدهشورى : أهلا .. حمد الله على السلامة ..

لوفة : ( فى ذهول ) إنت ..

الدهشورى : ( لرجاله ) خلاص أنتم . خليكم لحد ما أطلبكم ..

( الرجال الأربعة يخرجون .. يقف الدهشورى ويتحرك

ويخرج من خلف المكتب ليقف فى مواجهة لوفة ..

أخيه الأكبر ) أخيرا .. اتقابلنا تانى .. أهلا

بيك .. وحشتنى ..



- لوفة :** إنت .. باعتلى رجالتك يخطفونى ..
- الدهشورى :** حاشى لله ياراجل .. يخطفوك إيه .. أنا قتلهم يجيبوك بس .. من غير ماحد يمسلك أى طرف .. هما ..
- لوفة :** لا .. أبدا .. كانوا زوق ( بسخرية )
- الدهشورى :** المهم .. حمدا لله على السلامة
- لوفة :** على كل حال .. أنا برضه شفتك فى المجلة .. ومالحقتش .. لأن قلبى انقبض ساعة ماشفتك وساعتها عرفت إن أنا فى خطر ..
- الدهشورى :** حاشى لله راجل .. خطر إيه بعد الشر دانت أخويا شقيقى
- لوفة :** ويارىته ماكان ..
- الدهشورى :** ياساتر للدرجة دى .. لسه قاسى رغم السنين دى كلها ..
- لوفة :** إنته ماخلتش لحد حاجة كويسة يفتكرك بيها .. يارىتك مت
- الدهشورى :** ( فى ألم وسخرية ) الحمد لله لسه عايش والحمد لله زى ما أنت شايف ..
- لوفة :** المهم جايبنى ليه .. عاوز إيه تانى .. هو أنت ماكفكش اللى اتعمل والا إيه ..
- الدهشورى :** ( فى تأثر ) كنت فاكرك حاتقبلنى .. بلهفة وحب .. وإحنا ماتقابلناش من أكثر من ٢٠ سنة .. إيه يا أخى

- طيب دا أنت حتى مالکش أخوات ولاحد غيرى .. وأنا  
ماليش حد غيرك .. فعلا فرحت لما عرفت مكانك ..  
وقلت حانتقابل تانى أبوه فرحت قوى كمان ..  
لوفة : ياخسارة .. كان نفسى كده . لكن أنت ماخلتش فرصة  
لحاجة أبدا  
الدهشورى : خلاص آن الآوان .  
لوفة : والدم اللى فى إيدك .. دم الشهدا الأبرياء ..  
الدهشورى : أنا مظلوم .. ( بادعاء ) لقيت نفسى حا أموت أنا  
راخر .. قلت ياواد إهرب وانفد بجلدك وخسارة  
السلح ..  
لوفة : تقوم تسببهم يموتوا .. من غير سلح ..  
الدهشورى : ماهو لوكان راحلهم .. أنا كنت حا أموت معاهم .  
لوفة : شهيد  
الدهشورى : بس الحياة حلوة .. وأنا قلت بدل ماضيع أنا  
والسلح ..  
هما حيموتوا كده ولا كده ..  
انفد أنا بعمرى وبالسلح كمان واستفيد بشفته ..  
لوفة : يعنى تسرق السلح وما توصلوش لهم .. وتسببهم  
يموتوا .. وجاى تقولى إنك مظلوم .. وإنك مقدرتش  
وعاوزنى أصدقك ..  
الدهشورى : شوف هوكان فيه إخبارية عن المجموعة وجماعة  
الكامب كانوا عاملين كمين لنا كلنا .. وكل اللى

رايحين كانوا حايوتوا زى ما حصل

لوفة :

والاخبارية دى منين ..

الدهشورى :

لا .. مش كده .. والله ما أنا ..

لوفة :

واحد زيك يعنى

الدهشورى :

مش مسألة زى أنا .. نفدت بجلدى وبالسلاح ..

لأنهم كانوا حايدوه ويموتونا بيه .. يعنى أنا لما هربت

خدمت الجميع ونفدت بعمرى .. ومنعت عنهم السلاح

بتاعنا .. والكامب كله كان صاحى ومستعد ..

وعشان كده الكل مات وأهل السويس كلهم

عارفين كده .

لوفة :

وأنت لحقت نفسك فى الوقت المناسب فعلا أهل

السويس مش ناسيين خدمتك ليهم .. وعشان كده

سبتلهم البلد ومشيت ..

الدهشورى :

هو ده اللى حصل .. مش مهم تصدقنى والا لا ..

لكن خلينا فى دلوقت .. إحنا ولاد النهاردة ..

لوفة :

أبدأ إحنا ولاد أيامنا وعمرنا وأفعالنا .. وحياتنا

كلها .. من يوم ما عرفنا الدنيا لحد ماموت ..

الدهشورى :

أنا شرحتك ظروفى .. أقولك .. ( يقدم له مثلجات

من الثلاجة وبعض الفاكهة ) . ( يجلسه ويجلس ) ..

خد واجب الضيافة الأول .. أصلك أخذتنى على

مشى ( يضحك ) .. والله زمان .. حمد الله على

سلامتك ..

- لوفة :** شكرا .. مش عاوز منك حاجة ..
- الدهشورى :** ياراجل .. مايبقاش قلبك أسود .. خد .. ( يعطيه علبة عصير ) ده عصير مستورد لكن ممتاز قوى .. وإيه حكايتك .. لسه بتشتغل الشغلة الحقيرة دى ..
- لوفة :** ( فى سخرية ضاحكة ) معاك حق .. عصير مستورد .. ومكتب شيك وحرس خصوصى وعربيات كبيرة . من السرقة طبعا ..
- الدهشورى :** ( بغضب ) لوفة .. مش كده ..
- لوفة :** هو إيه اللى كده .. أه سرقة .. السلاح .. أنت مش رحت بيه الصعيد وبعته هناك .. يبقى ده من ثمن السلاح .
- الدهشورى :** ( يضحك عاليا ) سلاح إيه يا أبو سلاح .. ( يضحك ) .. ده ٢٥ سنة ثم دوول كانوا شوية ملاليم .. وأنا مليونير دلوقت .
- لوفة :** يعنى زيه بنفس الطريقة .. !! سرقة .
- الدهشورى :** هو الكفاح والشطارة .. يبقوا سرقة .. ماهو أنتم كده .. كل الكسالى .. والعامّة .. والجهلة .. والدهماء .. والحاquدين والموظفين .. الخايين .. يتهموا اللى زينا بالسرقة .. بدل .. مايشوفوا التعب اللى إحنا تعبناه عشان نوصل كده ..
- لوفة :** أكيد اللى إنته فيه ده .. برضه فيه دم ناس تانيين ..
- الدهشورى :** دم .. دم .. إيه حكايتك يا أخى ما إحنا كمان بندفع

دمنا وأعصابنا وحياتنا تمن .. أنا ياما حفيت .. ومنت  
على الأرصفة واتشردت .. واتشحتط .. واتبهدت  
وماكانش حد بيسأل فيا خالص .. اشتغلت شيال ..  
وعامل تراحيل .. وكتفى معلم لحد دلوقت مطرح  
قصعة المونة وحوشت القرش على القرش ولفيت الدنيا  
.. وعملت كل حاجة وأى حاجة .. لحد ما وصلت  
وبقيت كده .. وقدرت أدخل فى النشاط السياسى  
وأبقى راجل مهم ولى كلمة وشخصية وسط المجتمع .  
يعنى الواحد تعب كتير .. وشاف كتير ودفع  
كتير ..

**لوفة :** على كل حال ياسيدى ماتزعلش دفعت وتستاهل ..  
وربنا يزيدك

**الدهشورى :** قولى بقى أنت لسه بتشتغل الشغلة دى ليه .. دى  
شغلة شحاته وتسول .. ليه كده ..

**لوفة :** إسمع .. أنا ما اسمحالكش تتكلم كده عن شغلنا  
وشغلة أبونا واصلنا ما أنت برضه لسة الحاوى .. والا  
إيه .. ( بغمز ولمز ) .. يعنى كل واحد حاوى  
بطريقته ..

**الدهشورى :** أنا راجل مجتمع وسياسى .. يعنى شخصية سياسية  
ونائب .. بقى شخصية ..

**لوفة :** ماتفرقش .. إن كنت سياسى والا حاوى .. ماهى  
واحدة ..

الدّهشوري : أنت متسول .. جربوع .. يعنى أنا عندى حصانة ..

والكل يتمنى رضايا لكن أنت حتة عسكرى يحطك  
فى الحجز مع البلطجية والمتشردين ..

لوفّة : أنا فنان . حاوى .. فنان .. بحبه بأصالته ..

بأخلاقه .. أخلاق الفنان الحقيقى اللى بيحب فنه  
ولعبته .. والناس ... طبعاً ده شىء أنت نسيته  
ماتعرفوش من زمان ..

الدّهشوري : أنت اللى خايب .. الحياة النهاردة اتغيرت .. وظروفها

اختلفت أنت لا محترم ولا حاجة .. واللى بيتفرج عليك  
بيحتقرك وبيرميلك قرش ويمشى .. ويقول راجل  
مجنون والا متسول ولا حرامى .. حاجة كدة ده لو  
البوليس ماقبضش عليك بتهمة التسول ..

لوفّة : برضه ممكن .. وجايز لكن ربنا يستر معانا .. والناس

برضه فى القسم بتحترمنا وتقدرنا .. وكمان بيفرقوا  
بين الفنان .. وبين المتسول والحرامى ..

الدّهشوري : طيب ياسى فنان .. على كل حال آن الأوان إن

حضرتك تبطل شغل التسول ده .. وتبقى محترم  
وتحترم سنك وتقعّد فى البيت أنت وينتك

لوفّة : عوطلى يعنى .. وأكل منين .. الا اتكل على البنت

وأبقى عالة عليها

الدّهشوري : ياراجل ماتبقاش عبيط .. عوطلى أيه .. وينت أيه .. أنت

حاتعيش معزز مكرم .. وأنا مستول عنك وعن بنتك ..

**لوففة :** آه .. مش با أقولك عوطلى . وده مقابل آيه  
بقى .

**الدهشورى :** يا أخى بلاش حكاية عوطلى دى وبعدين مافيش  
مقابل ولا حاجة .. أنا مش عاوز منك أى حاجة ..  
عتاوزك تقعد فى البيت معزز ٢٤ قيراط  
وتأكل وتشرب وتنام وتلبس وكل مصاريفك  
وطلباتك انا مسئول عنها هو مش أنت أخويا  
الكبير .. أنا عاوز أعوضك عن كل اللي راح ..  
وأقدملك شئ بسيط عن كل اللي واجهته فى  
حياتك . وأظن دى أقل حاجة ممكن أقدمها لك وأنا  
فى إمكانياتى دى كلها ..

**لوففة :** بس أنا مش عاوز ياسيدى كتر ألف خيرك وأنا  
مبسوط ومستورة والحمد لله

**الدهشورى :** يا أخى إذا ماكنش عشانك يبقى عشان العروسة  
الجميلة اللي عندك أظن إن حقها تعيش حياة  
محترمة وتتجوز ويقالها بيت محترم .. من غير  
المرمطة دى ..

**لوففة :** البنت مبسوبة وكويسة وعايشة ومش ناقصها حاجة  
والحمد لله .. ياسيدى متشكرين للشعور الجميل ده ..  
( بمغزى )

**الدهشورى :** شوف يالوففة .. المسألة دلوقت اختلفت .. أنت  
أخويا .. وأسمك هو اسمى .. وأنا راجل فى وضع

حساس مايسمحش بأى تهاون أو أى شئ يضر  
أسمى أو يهمنى ..

**لوفة :** أحنا بعيد عنك .. ياسيدى أنت فى حالك .. وإحنا  
فى حالنا

**الدهشورى :** مابقاش ينفع يالوفة يمكن الأول كان جايز .. لكن  
دلوقت .. فات الأوان والوضع انكشف .. وأنت لازم  
تبطل شغل الحاوى ده وتقعده فى البيت .

**لوفة :** مش ممكن .. ماينفعش ..

**الدهشورى :** مش بمزاجك .. ده بالأمر ..

**لوفة :** بالأمر .. يعنى أيه ..

**الدهشورى :** زى مايقولك كده .. بالأمر .. وخلاص ومافيهش  
مناقشة كمان .. وأنا دلوقت با أطلب منك وبا  
انصحك بينى وبينك ويهدوء ..

**لوفة :** ( ضاحكا ) كمان .. للدرجة دى ..

**الدهشورى :** أيوه وأكثر كمان .. أنا على كل حال حا أصبر  
عليك .. وأديك فرصة تفكر بهدوء بينك وبين  
نفسك .. وشور على بنتك وأكيد هى كمان ..  
حاتوافقنى على كده ..

**لوفة :** كلامك من غير تفكير مرفوض .. وأنا مش حا  
اخاف منك ولا من مركزك .. ولا رجالتك .. وأنا  
با أقولك أهه

**الدهشورى :** فكر بالراحه ..



**لوفية :** مش حا أفكر .. ومش حا ابطل .. والى الشوارع كلها ..  
والبلد كلها وأنا مش خايف منك .. ومن غير سلام  
( يخرج )

نهاية مشهد  
( إظلام )

## الفصل الثانى

### المشهد الثالث :

حى درب الجماميز كما هو أهله وجميع من به  
وهم يلتفون حول لوفة بعد عودته من تلك الزيارة  
الغريبة ..

عم سيد : حمد الله على السلامة يالوفة ..

فرغلى : خضتنا ياراجل .. الحمد لله .. أنت رينا بيحبك ..

واهى ياعم جتلك على الطبطاب ويابختك

جلال : طول عمرك راجل فقرى .. غاوى فقر ..

بعزق : يا أخوانا . الحمد لله لرجوعك ياعم لوفة وأهم حاجة

سلامتك عندنا

أمورة : نورت الحتة يا ابا .. ده راجل سو .. ماعندوش دم ..

طيب يقولوا حاجة .. مش يسبوننا كدة على نار ..

ماحناش عارفين أنت فين ..

جلال : أخوة بقى يا أمورة .. ومشتاقله وبعدين أهو عاوز يعوضه ..

لوفة : والله كويس بتقول آيه ياجدع أنت ..

- جلال :** أنا قصدى يعنى ..
- بعزق :** كلام خايب زى صاحبه ..
- جلال :** أسمع ( باندفاع )
- عم سيد :** هه .. ناكر ونكير .. مش كدة .. مش فى كل وقت ..
- بعزق :** عم لوفة راجل فنان ويحب فنه مش ..
- لوفة :** مسألة أكل وشرب .. ودى حاجة فى دمه ..
- لوفة :** فعلا يابعزق .. أول مرة تقول حاجة صح دى حاجة فى
- الشيخة بطة :** دى فنى هو خيلى ومش حايطله إلا لما أموت ..
- الشيخة بطة :** ( تدخل ) بعد الشر عليك يا أخويا من الموت .. إنشا
- اللهم :** الله العدوين واللى يكرهوك .. دانت أيدك تتلف
- فى حرير ..**
- عدلات :** بس العيشة الحلوة برضه .. لها معنى ( بغمز ) ..
- أمورة :** يعنى حد يلاقى العز ويرفضه ده حتى حرام ..
- عدلات :** با أقولك آيه .. خديه ياختى ورينا يسعدك
- بيه ونقطينا بسكاتك**
- فرغلى :** ( يعلق عن بعد ) الله يسهل لعباده .. عقبالنا
- يارب ..**
- دومة :** وأنت مالك يا أخى .. سيب الناس فى حالها .
- عم سيد :** الفن مش محتاج يتناقش قدام الفلوس .. أو أى حاجة
- ده كلام لازم يترفض ..**
- لوفة :** وهو ده اللى حصل .. لكن هو مصر .. ومش ناوى
- يسكت ..**

بـعـزق : ( بحماس ) وإحنا مش حانسكت لوعمل أى حاجة ..

إحنا ما بنخافش من حد ..

أـمـورة : يسلم فمك ..

جـلـال : أنا شايف أن الحوار السلمى مع الرجل أحسن كتير

ونقسم البلد نصين ..

أـمـورة : أسمع روح قسم بعيد يا اخويا .. ما حدش طلب منك

حاجة ..

جـلـال : يعنى كده .. أنا غلطان ..

( يدخل رجال الدهشورى فى البداية ثم يدخل

الدهشورى وسط بقية رجاله ليصاب أهل الحى بحالة

وجوم وإعجاب وذهول ورفض وقبول عجيبة من الجميع

مع التباين فى المشاعر ) .

رجـل ١ : الدهشورى باشا وصل ..

رجـل ٢ : ( يقترب من لوفة ) تعال ياعم لوفة . قابل الباشا .

جـاى بنفسه يزورك ..

فـرغـلى : الله ام صلى على النبى . يا اهلا بالباشوات . ناس

هايصه . وناس لا ييصه

دوـمـة : وقدم المشاريب على ميه بيضة والكلام حا يحلو

والقاعدة .. حاتكبر وتبقى آخر مزاج ..

جـلـال : ( يتقدم ماداً يده ليسلم على الدهشورى مرحبا

فى قلق ) .. أهلا وسهلاً .. يا فندم شرفت درب

الجماميز ..

( يبدو لوفة مندهشاً .. بعزق يبتعد إلى حد ما وبجانبه  
أمورة )

عم سيد : ( من موقعة قريباً ) .. أهلاً . اتفضل . هات كراسي  
يادومة .

لوفة : أهلاً ياباشا .. خطوة عزيزة . ( بنبرة مضموغة خاصة  
يدركها الدهشوري )

الدهشوري : ( وهو ينظر حوله ويتطلع للحى وأهله فى غطرسة  
وتطرف ) .. أنيك يالرفة .. شايف أنا جيت  
أزورك .. أزاى .. وسط ناسك وجيرانك عشان أشرفك  
وأتعرف على الحى بتاعك الجميل ده .. وجيرانك  
الناس الطيبين دوول ..

دومة : ( يضع الكراسى وتراييزة صغيرة أمام الدهشوري ) ..  
كلك بركة ياباشا .. والباشا يشرب أيه ..

الدهشوري : قهوة مضبوطة يادومة .. وشوف الرجالة كمان يشربوا  
أيه خليههم يقعدوا عندك على القهوة يادومة ..

دومة : أوامرك ياباشا .. والبن محوج والمزاج عال العال ..

الدهشوري : ( ينظر تجاه أمورة ) أظن أنتى أمورة .. شفت  
صورتك .. تعالى يا أمورة سلمى على عمك أنا جاى  
عشان أزورك .. وأشوفك ..

لوفة : سلمى على الباشا يابنتى ..

أمورة : ( تتحرك وتسلم فى جفاء ) أهلاً ياباشا خطوة  
عزيزة .. كان كفاية تبعت واحد من رجالتك واحنا

نجيـلك كلنا .. حتى كان ممكن ننقل الشارع كله  
معانا .. بالمباني كمان ياباشا ..

الدهشورى : باين عليك خلفت يالوفة بجـد .. واللى خلف  
ماماتش .. ( يضحك مغالبا غيظه )

لوفـة : إحنا تحت أمرك ياباشا . دى زيارة غالية قوى .. ولها  
سبب ..

عم سيد : الراجل جاى يزورك وسط جيرانك والحق بتاعك  
ويعبرلك عن حبه وأخوته ليك ..

الدهشورى : عداك العيب ياعم سيد . ونعم الناس . راجل عاقل  
ومحترم فعلا ..

جلال : وحضرتك ( فى تحلق ) محترم جدا أنا متابع نشاطك  
السياسى .. العظيم .. والله أنت راجل مكافح  
فعلا ..

الدهشورى : متشكر خالص .. والأستاذ ..

جلال : أنا جلال الرسام .. فنان يعنى وابن الحته ..

الدهشورى : بس واضح إنك فنان عاقل . وعارف مصلحتك ..  
مش ..

لوفـة : هو عارف مصلحته قوى ( فى سخرية )

أمـورة : ورسام ماهر قوى .. وجاهز دائما فى كل وقت وكل  
فرصة ( بغمز ولمز )

جلال : أمورة .. أنا محترم .. ومافيش داعى ..

بعمـزق : ( يتحرك محاولا الابتعاد يلحظه الدهشورى يستغرب )

أنه لم يقترب منه ويسلم عليه )

الدّهشوري : والأستاذ أيه بقی .. أنا شایفه واقف جنبك يا  
أمورة ..

أمورة : يعزق .. فنان واعی .. لاعب أراجوز مافيش كده ..  
ابن بلد وكنمته حلوة ولعبته مطلوبه فى كل وقت وكل  
مكان ..

الدّهشوري : أرزقى يعنى ..

بمعزق : ( باندفاع ) لا ياباشا .. فنان مش أرزقى .. أراجوز  
محترم .. له كلمته الشريفة ولعبته الجميلة .. وجبه  
للناس وحب الناس لفنه .. أظن سعادتك سمعت عن  
فن الأراجوز ..

الدّهشوري : ( يضحك ساخرا ) الأراجوز .. فعلا أراجوز خفيف  
الظل .. تعرف أنا بقالى فترة ماشفتش حاجة من  
دى .. ماتورينا حاجة يا أخى ..

لوفة : مش كده ياباشا ..

الدّهشوري : ويتشتغل فين بقی .. فى الحوارى برضه ( بعنف )  
والموالد مش كده وتقعّد تشتم فى الناس وتقولهم  
يا ولاد الكلب والناس تضحك .. مش كده هو ده بقی  
الأراجوز والفن ..

بمعزق : عندك ياباشا ..

الدّهشوري : عندك أنت .. شوية مقاطيع وبلطجية ومتسولين فى  
الشوارع والحوارى . وتقولى فن . فن أيه .. والبوليس

يلمكم تحرى وتقولى فنانين ياشيخ كفاية بقى .. البلد  
بتعانى من أمثالكم ..

واحنا عمالين نحرق نفسنا وأنتم دايرين فى الشوارع  
تشحتوا وتقولوا فن جتكم الهم ..

دهشورى : ( يقف ) عندك ياباشا أهلا بيك أه ..

لكن فى حتنا وتشتمنا وتهنا - كده .. لا ..

بمعزق : الكلام مع اللى زيك مايفدش كتير .. لأنك جاي

مشحون ومتسلط وعندك كلمتين عاوز تقولهم ..

أمورة : ( تقاطعه ) أسمع ياباشا .. دومة جاييلك القهوة ..

حضرت .. أشربها .. وشرفت ..

لوفنة : عيب يا أمورة . إحنا مانطردش حد من عندنا . لكن

لحد كده وكفاية ..

الدهشورى : أه .. دى مش دباته .. دى قلوب مليانة ..

انكشفتم .. كنتم مستنين منى كلمة عشان تطلعوا زى

الكلاب وبالذات الواد ده الصايغ ..

بمعزق : باشا .. ( يقف ) يقف رجال الدهشورى يبقى

مكانه ) ..

عم سيد : بعزق .. خليك مكانك يا ابني اخزى الشر .. الراجل

ضيف عندنا ..

الدهشورى : ( يقاطعه ) هما خلوا فيها ضيف

جلال : ياباشا حقك علينا .. اتفضل بس اهدى أنت واشرب

القهوة .. ( يشير إلى رجال الدهشورى ) اقعدوا



يا جماعة أشربوا قهوتكم ومشاريبكم  
بـعـزق : باقية ياباشا .. ومسيرنا نتقابل بس مش هنا ..  
وساعتها حا ارد عليك

الدهشورى : اللي زيك .. أنا ما أحبش أسمعه ..  
الشيخة بطة : ياباشا روق دمك .. والنبي أدقنك شوية زار يروقوك  
ويخلوك زى الفل أه .. أيه رأيك .. نعملك دقة الباشا  
واللورى .. طيب دانت حتى زى الفل .. راجل قيمة  
ومنظر وابهمة .. وادى الرجالة واللا بلاش .. مش  
عدمان وصدمان وخرفان .. زى المدهول ده .. ( تشير  
إلى لوفة ) والنبي الناس دى مش وش نعمة .. ياخويا  
روق دمك رقيتك واسترقيتك من عين الحسود وفيها  
عود .. ( ترقيه وهو مندهش ومبسوط وتدق له دقة  
الباشا هي ونسائها وترقيه ويدورون حوله حتى يهدأ  
الجميع )

الدهشورى : انتى فعلا ست مدهشة ولطيفة والزار بتاعك ده ..  
شئ ظريف خدى .. ( يعطيها كمية من النقود ) ..  
أنا حا ابقى ابعثك عشان تيجى تعملى حفلة زار  
عندنا للباشوات وحریمهم .. فعلا أنتى مدهشة ..  
الشيخة بطة : أنا فى خدمة الباشوات وحریم الباشوات ياباشا ..  
ياسكر ..

لوفـة : ولية ما عندهاش مبدأ وطينتها زيه ..  
أمـورة : ما أنت عارف يا ايه .. دى بتاعة كله ..

بمعزق : ناس استغلالية . بتوع فرص ولعب على الحبال . كل واحد يلا نفسى ..

جلال : ( يتحرك يجرى يحضر منظر طبيعى ) .. دى هدية من عندى لمكتب الباشا .. حاجة كده على قد الحال .. لكن المنظر جميل ..

الدهشورى : ( مبسوط ) شكرا .. فعلا أنت فنان عظيم .. بتفهم ..

بمعزق : فعلا بتفهم .. من أين يأكل الكتف .. انتهاز فرص ..

جلال : أسمع .. خليك فى حالك .. لحسن

بمعزق : طبعا ما هو الفرص .. واستغلالها برضه ذكاء ودهاء ويا بخت ..

جلال : الكلام بتاع يا بخت ده يتقال لغيرى ( يشير إلى أمورة ولوفة )

لوففة : أنت زودتها ( لجلال ) بخت أسود ومهيب ياريت ما كان ولا طلع أخويا ولا أعرفه ..

الدهشورى : للدرجة دى وفى وسط الحى بتاعك . وقدام ناسك . على كل حال تشكر ( يقف )

عم سيد : مش كده .. هو ما يقصدهش يا باشا ..

أمورة : والا .. ماهى المسألة بقت على المكشوف وما فيش لف ودوران

فرغلى : يا خسارة .. ده مكسب كبير للحارة بس هما مش فاهمين ..

- دومّة :** ياعم فيه ناس غاوية فقر ..
- الدهشورى :** على كل حال .. كفاية كدة أنا جاى فى كلمتين  
وخلص ..
- لوفّة :** عارفهم وسبق وقتلك رأيى .
- الدهشورى :** قدام كل الناس . عشان يبقوا شهود عليك أنا ..
- ( يلتف حوله رجاله بسرعة وينظر أهل الحى ) با اعلن  
على لوفّة وينته قدام أهل الحى أنهم سيسبوا شغلة  
الحاوى دى ويبجوا يعيشوا عندى معززين مكرمين  
وجميع طلباتهم مجابة .. أظن أنا كده مش غلطان ..
- جلال :** عداك العيب ياباشا ..
- الشيخة بطة :** يسلم فمك .. بركة .. ( تزغرد )
- عدلات :** يارتنى قربتك ياخويا ..
- دومّة :** أدى الناس المتجهة ..
- فرغلى :** مش با أقولك ناس هايسة وناس لايسة ..
- لوفّة :** شفت الناس الذوق .. الفلوس تعمل أكثر ..
- أمّورة :** ماكشش العشم أبدا منكم للدرجة دى ..
- بعزق :** ياساتر الناس بتبيع بعضها بسرعة
- شفت ياعم لوفّة .. أهه .. كله انكشف ..
- عم سيد :** مش كده يابعزق .. الناس قصدها خير ومصلحتهم ..  
بس بهدوء
- بعزق :** ده راجل فنان .. عاوزين تقتلوا فنه ..
- ويخلوه يندفن بالحيا .. عشان يرضى الباشا ..

**الدّهشوري :** يا جدد أنت أنا مش عاوز أقزيك لكن أنا أقدر افصك ..

**بمعزق :** فعلا تقدر يا باشا .. كفاية اتنين من اللي معاك دوول .. ( مشير إلى الرجالة ) أنا عارف وكمان تقدر تعمل حاجات كتير .. لكن ما يخدش الروح إلا إلى خالقها ..

**عم سيد :** بمعزق ماتدقش رأسك فى الصخر يا ابنى طاطى للريح .. مش كده ..

**أمورة :** خلاص يا باشا .. سيبنا فى حالنا أنا وأبويا .. مش عاوزين منك حاجة ..

ومش حانيجى ناحيتك وحانفضل فى حالنا .. وأنت فى حالك

**بمعزق :** الباشا مش عاوز كده يا أمورة .. الباشا عاوزكم تقعدوا فى البيت وبلاش شغل الحاوى ..

**الدّهشوري :** أسم الله عليك .. ما أنت بتفهم أهه .. أمال يا أخى مالك من الصبح أنت كده تمام ..

**بمعزق :** أبوه يا باشا أنا فهمك وفاهم قصدك ..

**لوفة :** شوف يا باشا . إحنا حانبطل الحاوى ومش حانروح عندك .. وده آخر كلام عندى .

**الدّهشوري :** على كل حال أنا جيت عشان أعرف أهل الحى إن أنا راجل كويس .. موش زى ما أنت بتقولهم .. وإن أنا عامل خاطر لصلة الرحم ... وأنت حر .. وأنا حر ..

( يتحرك للخروج هو ورجاله )

عم سيد : يارب استر يارب .. ليه كده يالوفة .. كل شئ بالهداوه ..

بعمزق : ياعم سيد ده راجل مستقوى .. وماينفعش معاه غير كده ..

لوفة : بس أنت حشرت نفسك معانا .. وأنت يابنى مش قد الناس دوول

بعمزق : وماله أنا معاكم على الحلوة والمرة ..

جلال : ( بسخرية ) يعنى فى الهوا سوا ..

عم سيد : جلال .. الموضوع يابنى صعب .. ومايستحملش ..

لوفة : سيبه ماهو انكشف

جلال : عم لوفة .. أنا قصدى الخير ليكم .. وكمان أهل الحى قلبهم عليكم

أمورة : تشكر على كل حال . أنت عملت اللى عليك والباقي يخلصنا ..

بعمزق : واللى يخلصكم يخلصنى يا أمورة .. أنا مش ممكن اتخلى عنكم أو ابعد عنكم لآخر عمرى ..

لوفة : الدهشورى حطك فى دماغه يابعمزق وخلى بالك من نفسك وأنت بتلف لم نفسك اليومين دوول شوية ..

بعمزق : الله .. أجمل كلام ياعم لوفة با اسمعه منك دلوقت .. لأول مرة أحس قلبك على .. ومش ضدى

لوفة : وقفتك وكلامك كانوا أحسن شاهد عليك ..

- أمورة :** عشان تعرف إن أنا كنت على حق يا ابويا .. وأنت كنت معارض ..
- لوفسة :** يابنتى ماهو برضه المسألة دى وموقفه حاجة .. ومسألة حبه ليكى وارتباطك بيه حاجة ثانية ..
- بعزق :** ليه ياعم لوفة . أنا با اعتبر نفسى ابنك . وأمورة دى هى كل شئ عندى
- لوفسة :** يابنى أديك شايف أنا عايز أمورة تعيش بطريقة ثانية .. غير عيشة أبوها .. عيشة الفنان المتسول .. وأنت ..
- بعزق :** ماتكملش .. خلاص ياعم لوفة ..
- أمورة :** ابا . مش كده .. ثم إن الفنان عيشتة أحسن عيشة ومش متسول وإحنا حانطور شغل العرائس وحانقدم فن عظيم ..
- لوفسة :** على كل حال ربنا يسهل ..
- بعزق :** أنا مش حا أغير موقفى لا منك .. ولا من أمورة .. ولا من الدهشورى وأنا حا ابدأ المعركة معاه .. ومش حاستنى لما يبدأ هو ..
- لوفسة :** خلى بالك من نفسك
- أمورة :** وأنا معاك يابعزق ..
- بعزق :** يلا وادى البارقان .. والعدة والعرايس والكلام عندى جاهز
- أمورة :** يلا نقول

- بعـزق : وكان وكان .. وياما كان  
 أمـورة : كان فيه زمان  
 بعـزق : قال أيه مكان آخر جنان  
 أمـورة : وقبة قاضية من الأمان ومان وبار  
 بعـزق : وبارومان .. وبارلمان آخر روقان  
 أمـورة : ولعبه كله فى الأمان . ومن زمان . كان الحيتان .  
 بيلعبوا أى جبان  
 بعـزق : لو خاف وبان  
 أمـورة : ويلا بان  
 بعـزق : آن الأوان . نقول كمان . كلام زمان  
 أمـورة : فى المجدعة .. والفرقة . وفى المنصة طرقة ..  
 بعـزق : واحنا كلامنا كله فعل . من غير ماتاكل حتى فجل .  
 أمـورة : ولاحتى يبقى الوز عجل  
 بعـزق : والفرد كان بمكوة رجل  
 أمـورة : قال أيه زمان .. وياما كان  
 بعـزق : المهرج والأرلكن .. واللعب له أصلا مكان واسع  
 وضالع فى الأمان  
 أمـورة : وكان وكان  
 بعـزق : وياما كان .. ( يعود جلال وفرغلى وشخص غريب  
 وخلفهم الدهشورى الذى يقف دون أن يراه أحد لسمع  
 جزء من اللعب ) ..  
 لوفـة : ( يضحك هو وعم سيد ) أيه الكلام ..

الحلو ده ياواد يابعزق . لحقت تقوله .. وتكتبه أمتى ..

بعزق : ارتجالي ... الزجل عندى ارتجالي ..

ماهو أنا برضه مثقف يعنى ..

لوففة : بس أنتم دلوقت ولعتوا الدنيا زيادة ..

والأخبار زمانها وصلت ..

الدهشورى : لا .. المرة دى أنا سمعت بودانى وشفت بعنيا والبادى

أظلم وأنتم حريين .

( يخرج وسط ذهول أهل الشارع جميعا وصمتهم )

( نهاية مشهد )

إظلام



## الفصل الثانى

### المشهد الرابع :

شارع درب الجماميز فى حالة غريبة غير  
طبيعية وأهل الحى جميعهم فى الشارع بين  
مندهش وحزين ... ومذهول توجد خارج الشارع  
سيارة مستشفى الأمراض العقلية وبالداخل بعض  
الممرضين يرتدون البلاطى البيضاء وبعض رجال  
الأمن ) ..

عم سيد : يا حول لله . هو أيه اللى بيحصل ده .. لدرجة دى ..

جلال : حاجة غريبة .. إزاي ..

أميرة : ( تصرخ ) أبويا مش مجنون .. دوول هما اللى  
مجانين .. والله لاوريهم . أنا عارفة .. آه .. ده شغل  
الراجل المهفوف ده ..

بعمزق : بالراحة .. احنا مش حانسكت ولانسيبه أبدا ..

تمرجى ١ : يلا بلاش عطلة .. احنا لازم نرجع بيه المستشفى  
فورا ..

- تـمـرـجـى ٢ : ده حالته خطيرة جدا وهايح جوة ويكسر الحاجة .. ده  
 خطر على الأمن .. والناس ولازم فوراً يروح المستشفى  
 الشيفـة بـطـة : جتكم نيلة .. الرجل عاقل وزى الفل ..  
 رـجـل أـمـن : خلاص ياستى أنتى .. خليكى فى حالك ..  
 فـرـغـلى : يا جماعة مش كدة .. طيب يروح معاكم .. بس  
 بالهداوة  
 تـمـرـجـى ١ : تحب تشرف معاه  
 فـرـغـلى : ( فى رعب ) وأنا مالى .. ولا هو عمى ولا خالى ..  
 دـوـمـة : هو أيه اللى جرى فى الحى .. ياساتر استر زود النار  
 يا بنى وكتر الولعة .. لحد ما أجيلك ..  
 أـمـورة : أنا مش ممكن أسببه .. لو خدوه حا أروح معاه ..  
 بـعـزق : واحنا معاه ومعاكى .. ( يوجه الحديث للممرض ) ..  
 أسمع احنا مش ممكن نسيبكم تاخدوه كدة ..  
 رـجـل الأـمـن : اتلم .. وخليك فى حالك ..  
 التـمـرـجـى ١ : خليه يجى فيه قميص لمجنون تانى .. يبقى بالمرة ..  
 التـمـرـجـى ٢ : فعلا هو باين عليه مجنون .. شكله كدة ..  
 ( ينظر له بتفحص ليرعبه ) .. أنت مالك شكلك مش  
 طبيعى ..  
 أوعى تكون هريان من عندنا واللاحاجة .. ( يدور  
 حوله ) .. وأنت بتشتغل أيه ..  
 بـعـزق : ( يرتعد ) جرى أيه يا جـدـع أنت ماتتلم ..  
 ( يخرجون وهم يكتفون لوفة ويلبسونه قميص أبيض )

- متجهين به خارج الشارع ) ..  
**أمورة :** ابا .. مش حا اسيبك يا ابا ..  
**لوفة :** لا خليكى عاقلة .. استنى عشان تعرفى تتصرفى مع بعزق والجماعة ..  
**عم سيد :** أهو ده الكلام .. احنا حانتصرف على طول مش حانسيبك ..  
**بعزق :** أيوة .. مش حانسكت .. حانقلب الدنيا ..  
**التمرجى :** مش با أقولك الجدع ده مجنون راخر ماتيجى نخده ..  
**رجل الأمن :** التعليمات واحد .. هو ده .. يلا بينا ..  
**الشيخة بطة :** ترجعلنا بالسلامة .. رينا معاك .. رينا ينتقم منهم ..  
**جلال :** قلبى معاك ياعم لوفة ..  
**لوفة :** ماتخافوش علىّ . أنا راجع تانى ..  
**أمورة :** إن شاء الله يا ابا راجع ..  
**بعزق :** ماتخافش على أمورة .. مش حاسيبها ساعة واحدة ..  
 أنا معاها ورينا معانا ( يخرجون مع لوفة الممرضين والأمن وبعض أهل الحى فى حالة حزن شديد ..  
**عم سيد :** با أقولك أيه أمورة .. تعالى يابنتى لعمك الدهشورى باشا .. وتستسمحه عشان يفرجوا عن أبوكى ..  
**بعزق :** جرى أيه ياعم سيد . ده راجل دوون ومش ممكن تروح له أبدا ..  
**أمورة :** أيوة .. أنا حا اقف فى وشه مش حا أسلم له أبدا ..  
 واحنا بدأنا معاه الحرب وحانكمل للآخر ولازم نتحمل .. واحنا عارفين أنه قوى ومش سهل ومش

حايسبنا كده ..

يعنى لازم نواجهه .. ومانخافش منه أبدا  
بس هو الأقوى .. واهه أبوكى أخدوه المستشفى ..  
حاتعملى أيه

الشيفخة بطة : بعزق ده مجنون .. حايضيعك ماتسمعيش كلامه ..  
روحي ياختى استسمحيه وطلعى أبوكى .. المية يابنتى  
ماتجريش فى العالى ..

دومة : رينا على المفترى .. والمستقوى رينا معاك ياعم لوفة .  
( بيكى )

بعزق : ماتعيطش يادومة .. احنا رجالة والرجالة يتحملوا ..  
ويواجهوا الشدايد وفى الحرب ماينسحبوش أبدا مهما  
كان التمن حتى لو دفع الواحد عمره كله  
معاك حق ..

أمورة : عم سيد : بس بالعقل .. ولا ترموا بأنفسكم إلى التهلكة ..  
بعزق : وكمان مانسلمش للعدو كدة .. لازم نكمل للنهاية ..  
جلال : والله أنت سبب البلاوى دى كلها كانت دخلتك علينا  
شتم ..

عدلات : والنبي الجدع طيب وكلامه حلو بس هو يعنى مجبكيها  
حبتين .. ( لجلال ) با أقولك أيه خليك معايا يا أخويا  
تكسب ..

بعزق : يلا يا أمورة .. نبتدى .. احنا عندنا الرد جاهز ...  
ونبتدى عشان يوصله بسرعة ..

- أمورة : يلا ..
- بعزق : الحاوى .. اللاوى .. ترلاوى ..
- أمورة : آه ياعبد اللاوى .. يافهلاوى ..
- بعزق : آه ياخويا حكايتك دى غناوى ..
- أمورة : آه غاوى .. ياناوى .. وأنا الهاوى ..
- بعزق : وسياسى .. دايم سلاوى . وأنت السماوى .. وأنا الحاوى ..
- أمورة : وياقاسم أنت السماوى .. ألعيبك دى شغل قهاوى ..
- بعزق : ( يضحك ) وكلامك ده كله حصارى وأفعالك دايم دى بلاوى ( يضحك الجميع ) ( يدخل رجال أمن ينتشرون فى المكان ويتابعون فى صمت ) .. قال غاوى سياسة وفهلاوى وأنت متنيل غلاوى ..
- أمورة : ( تضحك ) وأنت متنيل غلاوى ( ينقض رجال الأمن على بعزق يقبضون عليه يحدث هرج وذهول وسط الشارع وأمورة تصرخ مندهشة وبعزق يضحك )
- أمورة : بعزق .. وأنت كمان حاخذوك على فين ياترى ..
- بعزق : ماتخافيش عادى .. ولايهكم ماتخافيش ..
- عم سيد : لا حول الله .. قتللكم ..
- جلال : أهه .. عملى فيها بطل .. أشرب بقى ..
- بعزق : ماتخافوش راجع ..
- عم سيد : ( لرجل الأمن ) هو يابنى أنتوا واخدينه على قين ..

رجل الأمن : فيه ضده بلاغات عن نشاط ضد الأمن العام .. وأمن  
الدولة .. ويقول كلام فى السياسة .. واحنا مضطرين  
نقبض عليه .. عشان نتحقق من صحة البلاغات  
والتقارير اللى عندنا ..

أمـورة : بعزق خلى بالك من نفسك ..  
بـعزق : ماتشغليش بالك .. إن شاء الله سليمة .. خلى بالك  
أنتى من نفسك ..

رجل الأمن : خلاص يا أستاذ .. أتفضل وبلاش عطلة ..  
يلا ياجماعة ..

( يأخذوه ويخرجوا وسط ذهول ووجوم أهل الحى ) ..

( نهاية مشهد )

إظلام

## الفصل الثانى

### المشهد الخامس :

نفس المنظر حى درب الجماميز الناس متواجدة نفس  
الشخصيات .. تبدو السعادة على عم سيد وأمورة ويعزق  
والعكس بالنسبة لجلال والآخرين فى حالة إندهاش )

أمورة : حمد الله على السلامة يابعزق ..

بعزق : الله يسلمك .. الحمد لله ..

عم سيد : وأنت يابنى أفرجوا عنك إزاي ..

بعزق : النيابة هى اللى أفرجت يا عم سيد .. حققت وجمعت

التحريات وراجعت الشكاوى والتقارير اللى بيقلوا

عليها لقوها كلها كيدية وما فيش لها أى أساس ..

أمورة : ويعدين ..

بعزق : ولا قبلين .. بعد ثلاث أيام من التحقيق والتحرى

أتأكدوا من برائتى .. فقرر وكيل النيابة الإفراج عنى ..

عم سيد : طيب وصاحب الشكاوى ..

أمورة : ( تضحك ) آه .. صاحبنا يعنى ..

**بمعزق :** ماقدرش يتحرك مع النيابة .. وقرروا على طول الإفراج  
عنى حتى بضمان السكن ومن غير أى حاجة ..  
وكيل النيابة الله يكرمه كان راجل محترم وبعد  
ماخلص إجراءات الإفراج .. أتناقش معايا شوية فى  
تطوير فن الأراجوز .. وازاى نخدم بيه حياتنا وأطفالنا  
فى التعليم والمدارس .. وكل حياتنا فى المدن والقرى  
بشكل عام .. وبالأذات أنه فن محبوب للجميع ومؤثر  
والكلمة فيه مباشرة زى المسرح بالظبط .. الله ..  
شوف البلد لسة فيها ناس محترمة ..

**عم سيد :** فعلا ده كلام كبير ياولاد .. وهو ده المفروض  
يتعمل ..

**بمعزق :** شفت ياعم سيد .. أهه رينا وفقنا من غير مانسلم  
أو نستسلم لصاحبنا الباشا ولسة حانوريه ..

**أميرة :** بس أبويا .. حانعمل أيه ..

**بمعزق :** صبرك . برضه رينا حاينصرنا عليه وكله بالصبر  
والعقل والأصول ..

**دومة :** ينصر دينك والله مجدع ..

**فرغلى :** سبحانه .. واللى نقول عليه

**عم سيد :** فرغلى لم الدور .. مش تقوله حمد الله على  
السلامة ..

**جلال :** ( فى مداراه ) نورت يابمعزق ..

**بمعزق :** تشكر يا أستاذ جلال



- عم سيد : وناوى على أيه يابنى  
 الشيفخة بطة : ( تدخل وهى تزغرد ) حمد الله على السلامة يا  
 أخويا ..  
 والنبي أنت طيب وتستاهل السلامة ..  
 عدلات : الحى والشارع نور برجوعك بالسلامة ياسى بعزق ..  
 دومة : وعندك شريات على حساب دومة لكل أهل الشارع ..  
 أمورة : لا يادومة ده على حسابى أنا ..  
 بعزق : المهم يا جماعة دلوقت نستعد وأنا ياعم سيد ناوى  
 أعمل مشروع العرايس والأراجوز .. واحنا الحمد لله  
 مش ناقصنا حاجة ..  
 عم سيد : طيب والباشا .. ولوفة اللى فى المستشفى ده ..  
 بعزق : ده موضوع أمره سهل حانتصرف برضه ونروح  
 المستشفى ونقابل الدكاترة المسئولين هناك ونراجع  
 التقارير الطبية والكشف وطبعاً هو ماعندوش حاجة  
 وبالتالي حايبقى مافيش مشكلة إن شاء الله ..  
 أمورة : أبوه كده .. هو ده الكلام .. وحشنى أبويا ( ينسحب  
 جلال ويخرج دون أن يشعر به أحد ويشاور لفرغلى عن  
 بعد ثم يختفى ) ..  
 دومة : والله عفارم عليك . أنت راجل ومجدع واهو ده  
 الكلام . هو ده الشغل .  
 بعزق : كل شئ بيحى بالراحة .. وسيبك من الحاجات والحركات  
 أياها .. ومن غير خوف لأن الحق عمره ماي موت أبداً .

- عم سيد : الله ينور عليك يابنى .. ربنا معاك واحنا معاك ..
- أمورة : وأنا معاك وجنبك ومش حاسيبك أبدا .. مهما كان ..
- بعزق : مهما كان .. ومهما قالوا ..
- أمورة : ومهما قالوا .. ويعد كده إحنا اللي حانقول وللكل ..
- وهما يسمعوا ويس .. ( يدخل الدهشورى هو ورجاله حوله وهو فى حالة تحد وعصبية شديدة لوجود بعزق أمامه ) ..
- الدهشورى : هه .. خرجت .. ماشى .. بسيطة ..
- بعزق : ( يضحك هو وأمورة بسخرية ) أيه رأيك بقى . روح أعمل بلاغ تانى ..
- أمورة : مش كل حاجة حاتقدر عليها ..
- بعزق : ومش كل الناس حايسمعوك .. يعنى وكيل النيابة ..
- كان فاهم وعارف البلاغات .. وعشان كدة أفرج عنى على طول ...
- الدهشورى : ياسيدى بسيطة .. ماهياش آخر المطاف يعنى .. المهم اللي جاى مش اللي رايح .. ورينى بقى حاتعمل أيه فى اللي بعد كدة ..
- بعزق : على كل حال . الخوف مالوش طريق عندنا وإن كنت أنت قوى .. فيه اللي الأقوى منك .. وبعدين البلد فيها ناس كويسين .. زى ما فيها ناس زيك
- الدهشورى : ألزم أدبك ( يتحرك رجاله ) لاسيبوه دلوقت .. لسه ماجاش وقته ..

أمـــــورة : أسمع أأزم حدودك بدل ما طلبلك البوليس وأقول جاى  
يتهجم علينا فى الحى هو ورجالته .. وأهل الحى كلهم  
شاهدين عليك .. ( تضحك ) وساعتها تبقى تدور  
على حد يخرجك بضمان ( تضحك )

الدهشورى : أبوكى أتجنن فى المستشفى

أمـــــورة : أبويا مش مجنون وحايخرج ..

الدهشورى : أبقى قابلىنى

أمـــــورة : حانقابلك .. وحايخرج .. وحاوريك

بعمـــــزق : خلاص فات الأوان ومابقاش فيه فرصة لأى كلام ياعم  
سيد

أمـــــورة : الصنف ده ماينفعش معاه الذوق

الدهشورى : على كل حال أنا زى أبوكى .. وأنتى لسة محتاجة

تربية .. وأنا حا أكمل اللى أبوكى ماعملوش . لأنه

ياعبنى أتجنن ودخل المستشفى ..

أمـــــورة : قتللك .. أبويا ما اتجننش وأنا متربية أحسن تربية ..

بعمـــــزق : خلاص يا أمورة هدى نفسك وسيبك من كلامه شوف ياباشا

.. احنا حانكمل الطريق للآخر .. وده آخر كلام عندنا ..

الدهشورى : ماشى يابعمزق . ( يضحك ساخرا ) ابقى دور على

اللى حايلملك لما تتبعمزق .. ( يضحك رجاله

ويخرجون

نهاية مشهد

( إظلام )

## الفصل الثانى

### المشهد السادس :

- مستشفى الأمراض العقلية .. يبدو مكتب الأطباء  
يوجد طبيبان يجلسان و بعزق ويندق وعم سيد ..  
الطبيب : فى الحقيقة حالة لوفة معقولة بس ..  
بعزق : بس أيه .. الراجل سليم مية فى المية ..  
طبيب ٢ : مش أنت اللى تقول كدة .. احنا اللى نقول لأن ده  
شغلنا ..  
أمورة : هو يقصد أنه أصلا سليم ما عندوش حاجة ..  
طبيب ٢ : مين قال أنه سليم .. آمال جابوه ليه ..  
طبيب ١ : المسألة أن أحيانا يبقى فى حالة غير طبيعية فعلا  
والتفاهم معاه يبقى صعب  
بعزق : لأنه مظلوم وجابوه غلط يعنى بلاغات كاذبة .  
ووسايط .. وحاجات كدة يعنى ..  
أمورة : آه أخوه عاوز يخلص منه وجابوه هنا  
وقالوا عليه مجنون .. عشان يخلص منه ..

**الطبيب ١ :** على كل حال الملف بتاعه موجود . والكشف عليه والتقارير موجودة .. وحانحاول نعيد الكشف عليه من كونسولتوا كامل وناء على قرار الكونسولتوا حانقدر نحدد الوضع ..

**بمعزق :** أظن كدة ممكن يبقى الموضوع مطمئن  
**أمورة :** ماهو يمكن التوصية برضه تخليهم مايخرجهموش حتى لوكان سليم

**عم سيد :** أنا شايف إن الدكاترة كلامهم معقول وعلى كل حال اللي فيه الخير يقدمه ربنا

**ممرض :** ( يدخل ) الحالة رقم ٨ هابصة وعاملة مشاكل وعمال يزعق وعاوز الدكتور

**طبيب ١ :** عم لوفة  
**الممرض :** هو .. وكمان ما أكلش من إمبرح أبويا  
**أمورة :**

**بمعزق :** ماتخافيش .. ده دليل على أنه بخير ..

**طبيب ١ :** طيب أنا جايلك حالا .. ( للممرض ) أسمع جهاز غرفة الكشف الكبيرة وبلغ الدكاترة عشان كونسولتوا الحالة ٨

**الممرض :** حاضر يادكتور ( يخرج )

**طبيب ٢ :** ( يقف ) أهو من ساعة ماجه عامل مشاكل وتقولى ده راجل عاقل .. ده أخطر واحد عندنا ..

**بمعزق :** مش كدة يادكتور خلى الكلام بعد الكونسولتوا ..

- طبيب ١ :** خلاص ياسيدى ..قلنا حانعمل الكونسولتوا عاوز آيه تانى.  
( يخرج طبيب ١ ويبقى طبيب ٢ يجلس مع بعزق وأمورة وعم سيد )
- عم سيد :** إن شاء الله رينا يوفقنا ..
- طبيب ٢ :** الحكاية آيه . فيه تقرير بخطورة الحالة . وساعات تلاقيه كويس وساعات يبقى عصبى قوى زى ماسمعتم وفيه توصيات عليه ..
- بعزق :** التوصيات دى بقى .. من اللى جابه وعاوز يعمله مجنون والراجل سليم وزى الفل ..
- أمورة :** أبويا .. ماعندوش حاجة .. هو إحساسه بالظلم بيخليه يشور ويزعق وكدة يعنى ..
- طبيب ٢ :** وآيه مصلحته فى كدة
- بعزق :** الحكاية طويلة . لكن التحدى بين الأخين هو اللى عمل الحكاية دى
- طبيب ٢ :** أخين .. بتقول أخين . يقوم يدخل أخوه المستشفى المجانين .. ويحطله كمان تقرير منيل بالشكل ده فى الملف ..
- بعزق :** بالضبط كدة
- طبيب ٢ :** مايبقوش أخين .. يبقوا عدوين
- أمورة :** وعشان كدة عاوزين نعمله كونسولتو عشان نشبت إنه سليم ويخرج من هنا

- طبيب ٢ : عندك حق أنا رايح أشوف الموضوع ( يخرج طبيب ٢ يدخل الدهشورى ورجاله إلى المكتب ) .
- الدهشورى : ( يضحك ) آه .. أهلا .. أنتو هنا . كويس يلا عشان ندخلكم بالمرة
- عم سيد : مش كدة ياباشا . هدى المسألة وكله ممكن بالهداوة ..
- بمعزق : سيبك منه ياعم سيد .. دلوقت رينا حاي نصرنا عليه
- أمورة : ويخرج معانا أبويا كمان
- الدهشورى : ( يضحك فى غيظ ) أبقى قابلينى .. أنا حا أوريكم ..
- بمعزق : ماشى .. أبقى ورينا .. لما نشوف ..
- ( يدخل طبيب يجد الدهشورى ورجاله )
- طبيب ١ : الحمد لله هدى وبقى تمام .. ودخلناه الكونسولتوا ..
- وإن شاء الله حايبقى كويس خالص
- بمعزق : متشكرين يادكتور
- أمورة : يعنى هو كويس .. قتلته إن احنا هنا ..
- طبيب ١ : أيوة وكان مبسوط جدا .. وبعد الكونسولتوا حاتشوفوه كمان ..
- أمورة : تشكر قوى يادكتور ..
- الدهشورى : هوا أيه يادكتور .. ده حالته خطيرة ومش ممكن يشوفه حد .. ثم أنه مش محتاج كونسولتوا ..
- والتقرير الأولى بيحدد كل اللى عنده .. يعنى مالوش لزمة كل ده ..

- طبيب ١ : وأنت مالك .. أولاده مش شغلك .. ده شغلنا إحنا ..  
ثم أنت مين
- الدهشورى : أنا أخوه الدهشورى باشا .. نائب ..
- الطبيب : أهلا وسهلا . بس مدام بنته وجوزها هنا ..  
وبعدين الكونسولتسوا والتقرير الطبى مش من حقك  
تتدخل فيه ..
- الدهشورى : بس يعنى .. أنا با أقول .. ( يغير من لهجته )  
هو مدير المستشفى فين .. لوسمحت ..
- الطبيب ١ : ( ينظرله بإندهاش ) .. فى إجازة .. وأنا القائم  
بعمله .. أى خدمة
- الدهشورى : يعنى .. أصل ..
- الطبيب : لوسمحت إلزم حدودك وخليك فى اللى يخصك ..  
وشغلنا إحنا مسئولين عنه ..
- الدهشورى : أنا النائب ..
- الطبيب : مالوش دخل بشغلنا .. ( يضغط على الجرس )  
( يدخل الساعى ) .. هات قهوة للنائب
- الدهشورى : شكرا .. مش قصدى
- ( يدخل طبيب معه ورقة طبية والملف الخاص بلوفة )  
ويتحدث مع طبيب فى سرية يأخذ طبيب ١ الملف  
ويوجه الحديث لبعزق وأمورة وعم سيد ) ..
- طبيب ١ : التقرير الخاص بالكومسيون .. ممتاز .. مبروك إيه  
بعزق : إيه



- أمـورة : الله يبارك فيك .. ( تضحك وتبكي )
- طبيب ١ : فعلا لوفة سليم ومش محتاج أى علاج
- عم سيد : الله أكبر
- بعـزق : ( يقف ) يحيا العدل .. والطب
- الدهشورى : ( بانفعال ) إيه الكلام الفارغ ده .. إيه يادكتور
- طبيب ١ : وتقدرؤا تاخدوه معاكم كمان
- أمـورة : صحيح حايروح معانا ..
- طبيب ١ : فعلا .. وده مش كلام فارغ يا حضرة النائب .. وأظن
- عيب إنك تشتمنا وتتدخل فى شغلنا .. لحد كده وما
- أسمحش ليك ..
- طبيب ٢ : حضرتك اتفضل قهوتك ياباشا ( بحزم )
- الدهشورى : أنا حا أوريكم .. ده مش ممكن يخرج من هنا . أنا
- حا أروح لوزير الصحة
- طبيب ١ : عيب كده .. اتفضل حضرتك .. أشرب قهوتك ..
- وشرفت
- الدهشورى : أنا مش حاسكت
- ( يدخل لوفة إلى غرفة المكتب معه تمرجى ..
- وهو سعيد )
- أمـورة : أبويا .. الحمد لله يا أبويا ..
- بعـزق : عم لوفة الحمد لله على السلامة
- لوفـة : دهشورى .. السرير بتاعى فاضى ومستنيك ..
- إيه رأيك

عم سيد : أهلا بالوفة ..

لوفسة : كويس .. بخير .. متشكر يادكتور ..

الدهشورى : ( يقف فى حالة إنفعال شديدة ) ..

أنا حا أوريكم كلكم .. وأنتم حا انقلكم من هنا ..

وأنت وبتتك والمجنون ده .. حا أوريكم حا أوديكم فى

داهية كلكم . أنا حا أوريكم .. أنا الدهشورى .. أنا

الباشا .. أنا النائب ..

نهاية مشهد

( إظلام )

## الفصل الثانى

### المشهد السابع :

حى درب الجماميز والشارع فى حالة سعادة وازدهار  
وتعالىق وفرح واحتفال يبدو أهل الشارع جميعا  
متواجدين سعداء

**دومة :** وعندك كل المشاريب والشارع وأهل الحى والشاربات  
على حساب القهوة وصاحبها ..

**فرغلى :** وعندك زفة لوفه .. بدل زفة المطاهر على حسابى ..  
ومن عندى ويطلع من المحل بتاعى ..

**الشيخة بطة :** ودقة الباشا للحبيب الغالى لوفة باشا .. غصب عن  
الباشا ..

**عدلات :** ياما نفسى ياسى جلال بقى رينا يهديك .. وتبقى  
زفتنا كده فى الحارة

**جلال :** ياعدلات رينا يهديكى وتسببيني فى حالى ..

**عدلات :** خليك . بس هية مش سائلة فيك .. ومعاها حبيب  
القلب .. وأنت خليك فى القلب

- جلال :** أتهدى بقى رينا يهدك ..
- عم سيد :** نورت الشارع والحى والحارة ودرب الجماميز كله يالوفة
- لوفسة :** الله يخليكم كلكم ياسلام .. وحشنى الشارع ..  
والحارة ..
- بعزق :** شفت كلامى ياعم لوفة .. والله أنت عندك حق .. بس  
خلى بالك هو مش حايسبنا ..
- لوفسة :** رينا يستر وإحنا مابقناش بنخاف من حاجة خلاص ..
- أمورة :** أبويا .. ده راجل غدار قوى ومش عارفين هو ناوى  
على إيه ..
- بعزق :** المعركة معاه فى أشدها .. وخلاص مابقناش فيه فرصة  
للرجوع لازم نكمل للآخر
- لوفسة :** على كل حال إحنا مع بعض أيد واحدة وحانواجه ..  
سوا ورينا يقوينا عليه
- أمورة :** يعنى أنت خلاص يا ابا .. عفيت عن بعزق ورضيت  
عنه ..
- لوفسة :** أيوة يابنتى . بس كل شئ بأوانه ولما نخلص من  
مشكلة الدهشورى ... حانشوف موضوعك ..
- بعزق :** خلاص ياعمى .. أنا موافق .. ومش حا أسكت ..  
عن الدهشورى .. إلا لما نخلص منه ..
- ( يأتى دومة وفرغلى والشيخة بطة وعدلات وكل أهل  
الحى عدا جلال الذى يخرج دون أن يشعر به أحد ) ..  
تبدأ زفة لوفسة وبعزق وأمورة وسط الشارع

والزار والرقص والجميع فى سعادة يغنون ويرقصون ..  
تنطلق رصاصة من الأمام يصاب الجميع بذعر ويتفرق  
الناس ثم تنطلق رصاصة ثانية .. وثالثة من جانب  
ثالث .. يقع الناس فى رعب وذ هول من هول الصدمة  
ويصرخ الناس ويجرى آخري .. ثم يصاب بعزق  
برصاصة فى كتفه ليقع على الأرض ..

بمعزق : ( يقع مصاب ) أى ..

لوففة : بعزق فيه إيه ..

أمسورة : أنصاب برصاصة فى كتفه ..

عم سيد : ياسا تر استر يارب

دوممة : ألحقونا بسرعة

بمعزق : ( يتحرك ) خدينى على جنب

لوففة : ( يقف ) .. ( يصرخ ) حتى ولومش حانخاف من

رصاصك أنت ورجالتك .. ( تنطلق رصاصة تصيب .

لوفة يقع ) ..

أمسورة : أبويا .. أبويا ..

بمعزق : عم لوفة

عم سيد : ألحقونا ياجماعة الرجل إنصاب

دوممة : بسرعة اطلبوا البوليس والإسعاف .. ( تنطلق

الرصاصات تدوى من كل جانب وأصوات

مختلفة وصرخات وتعليقات أضواء خافتة ..

ضاحكات عالية )

( صوت بعزق ) .. لا حانخاف ..

يا لوفة .. ولا حانموت !!

لوفة : أنا وراك يادهشورى

نهاية مشهد

( إظلام )

## الفصل الثانى

### المشهد الأخير :

( تبدو خشبة المسرح مظلمة غير واضحة المعالم دائرة ضوء على الدهشورى يقف بمفرده وهو يمسك ميكرفون ويتحدث فى مستوى خاص به فى المسرح )

الدهشورى : الله على ما أقول شهيد مافيش أحسن من الخير والضمير والإنسانية أنا هنا .. ومن أجل حقوق الإنسان وحمايتها .. لا بد من حياة كريمة لكل فرد .. وكل مظلوم .. لا بد من الدفاع عنكم .... و .... أداء بانتوميم فى حركات هتافية صامتة مستمرة تتداخل ... الأصوات .. تنزل موسيقى الزار يتحرك كأنه يهتف ويتراقص على صوت الزار أثناء الكلام السابق .. وتتزايد الإيقاعات حتى تصل إلى ضوضاء هستيرية وهو يهتف وسطها ..

انتهت





# الفهرس

رقم الصفحة

٣ ..... بائع الأقنعة

٥٥ ..... درب الجماميز



## صدر من الكتاب الأول

- |                  |        |                                   |
|------------------|--------|-----------------------------------|
| عاطف سليمان      | قصص    | ١ - صحراء على حدة                 |
| وليد الخشاب      | نقد    | ٢ - دراسة فى تعدى النص            |
| أمينة زيدان      | قصص    | ٣ - حدث ســـــــراً               |
| صادق شرشر        | شعر    | ٤ - رسوم متحركة                   |
| عبد الوهاب داود  | شعر    | ٥ - ليس سواكما                    |
| طارق هاشم        | شعر    | ٦ - احتمالات غموض الورد           |
| مصطفى ذكرى       | قصص    | ٧ - تدريبات على الجملة الاعتراضية |
| محمد السلامونى   | مسرحية | ٨ - كلودديوس                      |
| محسن مصيلحي      | مسرحية | ٩ - مسرحيتان من زمن التشخيص       |
| هدى حسين         | شعر    | ١٠ - ليــــكن                     |
| محمد رزىق        | مسرحية | ١١ - أحلام الجنرال                |
| محمد حسان        | قصص    | ١٢ - حفنة شعر أصفر                |
| عطيه حسن         | شعر    | ١٣ - يستلقى على دفء الصدف         |
| حمدى أبو كيله    | دراسة  | ١٤ - النيل والمصريون              |
| عزى عبد الوهاب   | شعر    | ١٥ - الأسماء لاتليق بالأماكن      |
| خالد منتصر       | قصص    | ١٦ - العفو والسماح                |
| مصطفى عبد الحميد | دراسة  | ١٧ - ناقد فى كواليس المسرح        |
| عبد الله السمطى  | نقد    | ١٨ - أطياف شعيرة                  |
| غادة عبد المنعم  | نصوص   | ١٩ - أنـــــــا                   |
| ليالى أحمد       | قصص    | ٢٠ - سارق الضوء                   |
| جليلة طريطر      | نقد    | ٢١ - رجع الأصــــداء              |

ماهر حسن	شعر	٢٢ - شـرـوـخ الـوـقـت
عاطف فتحي	قصص	٢٣ - أغنية للخريف
صلاح الوسيمي	مسرحية	٢٤ - بائع الأقنعة
شوقي عبد الحميد	قصص	٢٥ - أفراخ الحمام
خالد حمدان	شعر	٢٦ - كوجهك حين ارتحال الصباح

### لجنة الكتاب الأول :

غير ملزمة بإعادة أصول الأعمال إلى أصحابها سواء نشرت أو لم تنشر

## المؤلف

صلاح الدين حسين الوسىمى

- خريج أكاديمية الفنون - بكالوريوس فنون مسرحية عام ١٩٦٨ .
- يعمل بإدارة المسرح بالهيئة العامة لقصور الثقافة من عام ١٩٦٩ وحتى الآن .
- شغل منصب سكرتير تحرير مجلة « المسرح » التى تصدرها الهيئة العامة للكتاب فى الفتره من عام ١٩٨٦ وحتى عام ١٩٩٢ .
- له أكثر من سبع نصوص مسرحية غير منشورة .
- له كتاب قيد النشر عن الناقد المسرحى الراحل " جلال العشرى " .

طبع بالهيئة العامة لشئون المطابع الأميرية

---

رقم الإيداع ١٤٧٩٥ / ١٩٩٧

الترقيم الدولي ( 1 - 973 - 235 - 977 I. S. B. N )



مكتبة جامعة الكويت  
الكويت





يعتمد الكاتب في المسرحيتين على تقديم نماذج شعبية من مجتمعنا  
المصري الراهن ، ليرسم صورة حية لأهل البلد وحياتهم اليومية  
ومعاناتهم الدائمة . ويستفيد من التراث الشعبي ليثري تجربته ، ويكشف  
الإمكانات الفنية لهذا التراث من خلال البناء الدرامي للمسرحيتين .

المجلس  
الأعلى  
للثقافة  
١٩٩٨

